



琬琰廣錄

吏部尚書

陳脩 江西弋陽人

志銘 解縉

詹同 直隸婺源人

傳 黃佐

吳琳 湖廣黃岡人

傳 黃佐

張紉 冒人

碑 唐龍

劉崧 傳 黃佐

蹇義 四川巴縣人

謚忠定

郭璉 直隸新安人

謚文瑞

王直 江西泰和人

謚文瑞

何文淵 江西廣昌人

謚忠肅

王翺 直隸益山人

謚忠肅

李秉 山東曹州人

謚襄敏

崔恭 直隸廣平人

謚莊敏

姚夔 浙江桐廬人

謚文敏

狀子英 誌銘 楊士奇

碑銘 楊榮

碑銘 李賢

狀車綸 壙誌 子喬新

碑銘 彭時 記事 崔銑

誌銘 劉健

見南部

誌銘 商輅 碑銘 彭時

尹 旻 山東歷城人 謚恭簡 誌銘 李東陽

耿 裕 河南盧氏人 謚文恪 碑銘 徐溥

李 裕 江西豐城人 誌銘 張濬

王 恕 陝西三原人 謚端毅 誌銘 王鏊 碑銘 李東陽 傳 王慎

屠 瀟 浙江鄞縣人 謚襄惠 見左都

倪 岳 廬天上元人 謚文毅 誌銘 李東陽 傳 吳寬

馬 文升 河南鈞州人 謚端肅 小狀 王尚綱 傳 袁襄

焦 芳 河南泌陽人 見內閣 誌銘 劉忠

許 進 河南靈寶人 謚襄毅 碑銘 李東陽 張邦奇 誌銘 劉忠

劉 宇 河南鈞州人 見內閣

張 絲 陝西安定人 行實 弟維

劉 機 順天大興人

楊 一清 雲南安寧人 見內閣

陸 完 直隸長洲人

王 瓊 山西太原人 謚恭襄 碑銘 霍詒

石 瑤 直隸藁城人 見內閣

喬 宇 山西樂平人 狀 陳璘

楊 旦 福建建安人 傳 汪汝

廖 紀 直隸東光人 謚僖靖

羅 欽順 江西泰和人 謚文莊 碑銘 嚴嵩

李承勛 湖廣嘉魚人 謚康惠

桂萼 江西安仁人 見內閣

方獻夫 廣東南海人 見內閣

汪鉉 直隸婺源人 謚恭和

許讚 河南靈寶人 見內閣

熊決 江西南昌人 狀雷禮

唐龍 浙江蘭谿人 謚文襄 誌銘徐階 碑銘嚴嵩

周用 直隸吳江人 謚恭簡 狀嚴訥 誌銘徐階 墓表嚴嵩 傳顧憲祥

聞淵 浙江鄞縣人 謚恭簡 傳汪道昆

夏邦謨 四川涪州人

李默 福建甌寧人

萬鏜 江西進賢人

吳鵬 浙江秀水人 狀董份 誌銘徐階 傳潘晟

歐陽必進 江西安福人

郭朴 河南安陽人 見內閣

嚴訥 直隸常熟人 見內閣

胡松 直隸涿州人 謚莊肅 誌銘李春芳

楊博 山西蒲州人 謚

高拱 河南新鄭人 見內閣

張瀚 浙江仁和人 謚恭懿 狀陸光祖 誌銘陸樹聲 碑銘王錫爵 傳馮夢禎

陸光祖 浙江平湖人

謚莊簡 誌銘 王錫爵 墓表 朱廷益 狀 陳懿曲

見南史

見南史

見南史

見南史

見南史

見南史

見南史

見南史

見南史

吏部左右侍郎

師 逵 山東東阿人

見南史

黃宗載 江西豐城人

見南史

魏 驥 浙江蕭山人

見南史

王 讓 山東益都人

見南史

鄭 誠 江西南城人

誌銘 揚榮

洪 璵 浙江淳安人

誌銘 王直

李 數 順天涿州人

張用瀚 河南郊縣人

趙 新 浙江富陽人

曹義 應天句容人

俞山 浙江秀水人  
墓表 李賢

項文曜 浙江淳安人

李賢 河南鄧州人  
見內閣

孫弘 陝西渭南人

姚夔 見前

崔恭 見前

尹旻 見前

葉盛 直隸崑山人  
碑銘 彭時

陳俊 福建莆田人  
見南吏書

黃鎬 福建侯官人

耿裕 見前

黎淳 湖廣華容人  
見南禮書

徐溥 直隸宜興人  
見內閣

劉宣 江西安福人  
見南工書

揚守陳 浙江鄞縣人  
誌銘 何喬新  
碑銘 王與  
傳 程敏政

張悅 直隸華亭人  
見南兵書

彭韶 福建莆田人  
見刑書

周經 山西陽曲人  
見禮書

吳寬 直隸長洲人  
見詹書

秦民悅 直隸舒城人

侶鐘 山東鄆城人

林瀚 福建閩縣人

韓文 山西洪洞人

王鏊 直隸吳縣人

焦芳 廣東順德人

梁儲 浙江仁和人

江瀾 直隸南宮人

白鉞 直隸南宮人

張絲 直隸南宮人

王瓊 河南內鄉人

柴昇 湖廣鍾祥人

孫交 山西沁水人

李瀚 直隸丹徒人

靳貴 直隸清苑人

傅珪 四川巴縣人

劉春 廣西全州人

蔣冕 山東沂州人

王璟 直隸太倉人

毛澄 直隸太倉人

見禮書

見戶書

見南兵書

見戶書

見內閣

見前書

見內閣

見禮書

見前

見前

見南工書

見戶書

見內閣

見禮書

見前

見內閣

見前

見禮書

毛紀 山東掖縣人

見內閣

王鴻儒 河南南陽人

見南戶書

廖紀

見前

羅欽順

見前

秦金 直隸無錫人

見南兵書

胡世寧 浙江仁和人

見兵書

汪俊 江西弋陽人

何孟春 湖廣郴州人

碑銘 顧璘

賈詠 河南臨潁人

見內閣

孟春 山西澤州人

汪偉 江西弋陽人

溫仁和 四川華陽人

見詹書

董玘 浙江會稽人

誌銘 徐階

余枯 江西鄱陽人

碑銘 張岳

徐縉 直隸吳縣人

唐龍 見前

嚴嵩 江西分宜人

見內閣

周用

見前

許誥 河南靈寶人

見南戶書

張潮 四川內江人

見詹書



霍 韶 廣東南海人

見南禮書

席 春 四川遂寧人

張邦奇 浙江鄞縣人

見南兵書

李如圭 湖廣澧州人

顧 璘 應天上元人

歐陽鐸 江西泰和人 謚恭簡

狀 弟德 誌銘 鄒守益 碑銘 王世貞

王學夔 江西安福人

張 治 湖廣茶陵人

見內閣

徐 階 直隸華亭人

見內閣

韓邦奇 陝西朝邑人

劉儲秀 陝西咸寧人

王 道 山東武城人

碑銘 嚴嵩

潘 潢 直隸婺源人

丁汝夔 山東霑化人

王邦瑞 河南宜陽人

見兵書

李 默

見前

應大猷 浙江仙居人

葛守禮 山東德平人

程文德 浙江永康人

見掌詹

孫 陞 浙江餘姚人

見南禮書

郭朴

見前

鄭曉

浙江海鹽人

見刑書

吳山

江西高安人

見禮書

馮天馭

湖廣蘄州人

茅瓚

浙江錢塘人

袁煇

浙江慈谿人

見內閣

巖訥

見前

張永明

浙江烏程人

見左都

李春芳

直隸興化人

見內閣

朱衡

江西吉安人

毛愷

浙江江山人

胡松

見前

吳嶽

山東汶上人

林樹聲

直隸華亭人

王本固

直隸邢臺人

殷士儋

山東歷城人

見內閣

林爌

福建閩縣人

見南禮書

呂調陽

廣西臨桂人

見內閣

靳學顏

山東濟寧人

張四維

山西蒲州人

見內閣

魏學曾

陝西紫陽人

劉光濟

直隸江陰人

諸大綬

浙江山陰人

墓表

羅萬化

陶大臨

浙江會稽人

傳

王世貞

吏部尚書陳公墓志銘

解縉

余奉

詔纂脩

大明實錄觀自歲癸卯戡定陳氏

彭蠡之戰至動星象衆庶咸見而四方豪傑之士雲

合響應輻輳而爭趨之雖湯武之得士未能如是何

其盛哉至歲甲辰即王位而浙江取次平若廣信

陳公脩太祖之允註眷者也是以首擢理官講畫

律令崇寬厚而省繁苛復倫要而黜姑息光明正大

四方翕然知有一統之制作由此始焉繼而又為兵

刑之大者也唐世府兵之制稍為近古而未精密乃

擢公兵部郎中而所以任將帥養士卒得內外相維

之體兵農相咨之意遂為萬世之法而公之昭顯成  
德益以著焉 太祖初即位山東新山念濟南重經  
王氏之亂民墜塗炭尤甚大將多練兵屯田其間非  
公莫可治也遂擢濟南知府居二年而政成 太祖  
嘉之以天官六曹之長而明經習制建官均職惟公  
是宜擢拜吏部尚書引據古典參酌時宜審地劇易  
制事繁簡貴賤踈數遠近寬嚴課功覈實賞錫黜陟  
之類皆公啓之未幾卒于位繼之者莫能移易也今  
嘗謂 太祖之治天下也其事有緒而若素定于猷  
猷之中誠所謂天授之者而一時勲舊臣才碩德道

全方備皆非近世之所能髣髴其一二者也於戲盛  
哉今尚書之公沒四十餘年始得其子九成為之狀  
求為之刻詞于石按狀陳氏自彬始有聞于信之弋  
陽生應隆應隆生文光號南隱贈迪功郎生萬理字  
德甫號梅澗任信州路歷山長教授贈黃巖州知州  
生三子曰誼曰天驥曰敏學字志仲號亦梅官至平  
江路總管府治中弘字仕遠蔭韶州路乳源縣主簿  
公之父也母張氏生至正辛酉九月十九日歿於洪  
武辛亥七月十三日享年五十有一塋梧桐鴻夫人  
楊氏今年九十餘公歿二年九成奉母隱居于桂徙

南寧今家于貴縣之郭門有子三人曰鏞曰銘曰鐸  
鏞之子璉銘之子瓚鐸之子璫為之詞曰

廣信之山龍虎蔚盤弋陽九華連峯噴岼篤生偉人  
逢時經綸悉所宜歸乘運躍鱗 聖人好生明刑飭  
法與定章條惟存欽恤制兵之宜因仍歷世富農講  
武經久無弊山東初下兵民雜居朱幡皂蓋往來無  
綏基年政成歸掌銓衡平均四海位冠六卿我抽石  
室用纂六經敬服德業副其聲稱著之簡冊復為此  
銘邦家之光閭里之榮

翰林院學士承旨兼吏部尚書婺源詹公傳

黃佐

詹同名書字同文後以字行徽州婺源人四世祖青  
始以武弁起家後宋高宗南渡官至武德大夫殿前  
統制其後脫尺籍與編氓伍曰安知吾子孫不有以  
文學興者乎至鼎生同文年十二三從鄉先生學有  
俊聲時元學士虞集弟磐為蒼梧尹見而奇之妻之  
以子授易於甘楚材學春秋於劉彭壽二人皆當世  
名儒以經術名世而同文天資俊爽見趣卓絕能盡  
造其間與至正中舉茂才異等為彬州學正遇亂寓

黃州仕陳氏因占籍武昌甲辰王師下武昌遂來歸  
上厚待之暇則與之講論經史同文占對不窮上益  
加禮重及還京師除博士屬中書省已而集功臣胄  
子於內府命同文教之更其官為國子博士其僚友  
治一經者猶不能盡通同文乃能淹貫群籍隨叩而  
鳴每講易與春秋尤獨超詣聽者豁然賦性爽敏涵  
操濟發為文操筆立就水湧山立可喜可愕與上同  
遊每應制有作上未嘗不稱善也歷選考功郎中起  
居注翰林待制洪武元年轉直學士始賜名同更以  
同文為字嘗訂正音樂進所訂釋真樂章下太常用  
之二年遷侍讀學士四年升吏部尚書六年為學士  
承旨仍兼吏部尚書甄別人倫鋪張神藻為朝野所  
推服後致仕卒同操行耿介始終清白所著有海天  
集天衢吟嘯集其子徽仕至左都御史兼吏部尚書  
父子世為家宰亦薦紳盛事也

吏部尚書黃岡吳公傳

黃佐

吳琳黃州黃岡人世為詩禮名家父應澍勤儉好施  
教於其鄉號西山先生琳性資純篤力於問學通毛  
詩小戴記王師平陳友諒上方徵用荆楚名儒詹同  
薦琳通經學古且能文章遂召為國子助教與同並  
教胄子才藻瓌麗琳固讓同至於商確經義亶亶不  
倦則琳所長也每遇上聽政之暇有所咨詢輒進嘉  
言天下陰受其賜後遷浙江按察司僉事克振風紀  
及貳離臺國課以辨已而入為起居注獻納益勤進  
兵部尚書方試京闈髦士有司以主文請上思琳優

於經學遂命琳與司業宋濂柄其事及撤棘衆謂得人  
洪武六年改吏部尚書錫之誥命有學術既醇踐  
履尤正之褒與詹同迭視部事尋亦老致仕既家居  
朝廷嘗遣使察之使者潛至其旁舍見一農夫孤坐  
小几起而拔稻秧徐布於田貌甚端謹使者乃問曰  
此有吳尚書在家否乎農人歛手對曰琳是也使  
者還以其狀聞上益重之時又有吳彤文朗者臨川人  
元至正丁亥進士亦以文學聞乙未秋七月拜國子  
博士成均初設其建立規制及銓選祠祭之事彤皆  
與焉丙午正月轉同知嚴州府事後終北平按察副使

禮部侍郎署吏部尚書恭和劉公傳 黃佐

劉崧字子高吉安恭和人元季嘗領鄉薦遇亂不及  
會試教授鄉里淹貫經籍尤長於詩洪武三年以材  
學舉至京師授兵部職方司郎中高皇帝雅知之嘗  
祭方丘崧與吳琳宋濂輩侍從應制賦詩六年陞秩  
北平按察司副使居官以清苦自持十年考績偕諸  
道憲官入朝會更定外官九年為任上賜慰諭曰今  
天下太平爾等膺名秩食厚祿而民隱未盡昭恤非  
爾之責與惟是新制考績必待九年其各還司慎乃  
憲度毋玩民事毋干天紀後此能復見朕則爾等為



奉職矣居無何坐事輸作京師尋放歸鄉十三年春  
正月丞相胡惟庸等誅罷中書省惟設六部上特賜  
手勅起崧為禮部侍郎賜以誥曰國家以禮導民將  
使天下之人皆由之其品節之分制度之詳亦既考  
定而頒行矣非得明達朝章者典之豈足以儀表中  
外乎爾崧學通古今舉止詳雅故命爾為禮部侍郎  
爾其敬以持身恭以將事俾朝廷之禮粲然有倫則  
海內嚮風而有化民成俗之效矣往居廼職爾惟懋  
哉未幾命署吏部尚書五月甲午雷震奉天殿上謂  
崧等曰朕自積位以來十有三載夙夜兢兢業不敢怠

荒惟恐治不古若間者上天有警朕心不寧此必朕  
有失德政事有平卿等宜悉陳朕得失毋有所隱崧  
等頓首曰人君一心上通乎天災咎之至惟修德行  
仁可以弭之今陛下遇災能懼省躬思過復開導臣  
等盡言臣聞惟德動天無遠弗届能修人事所以消  
天變也上曰唐虞之時君臣更相戒勅卿等輔朕當  
以古人為法盡心無怠尋以老疾乞致仕許之賜以  
勅諭曰君子之生也莫不由父母之賢師友之訓以  
成其材及其壯也則推而行之以致君垂拱利澤群  
生斯仲尼之道君子之志也卿學問該博踐履篤實

負成已成物之器備剗繁治劇之才正宜佐朕以理  
天下柰何年齒衰耄難於步趨故不忍復煩以政特  
賜致仕卿其去朝歸於鄉里宜慎所養以樂餘年十  
四年三月上思其老成宿學遣子以國子司業起之  
一見歡甚賜以鞍馬居位未十日遽得疾猶強坐授  
訓諸生疾革祭酒李敬問所欲言崧曰天子遣崧教  
國子將責已成功而遽死乎無一語及家事卒年六  
十有一上重惜之親為文以祭之曰惟爾有學有行  
敦譽儒林朕嘉爾能屢常擢用邇者遣使召司業成  
均簡在朕心期於成效夫何不數日間遽然而逝朕

甚悼焉已令有司備禮殯殮靈車歸葬特以牲醴致  
祭崧博學有志行家素貧及貴未嘗增置產業居官  
十歲不以妻子相隨清苦如布衣時其為北平按察  
副使携一童往至則遣還每夜孤燈一榻讀書不輟  
至五鼓則衣冠起坐待旦值北平兵革之後招徠逋  
逃慰安反側惟務寬厚以存大體尤慎威刑之用遇  
小人險狡輒先事防制溫顏巽詞而見者凜然及致  
仕歸益自謙下學問之功老而彌篤與人言未嘗及  
官政歲歉其姻族之人不能以自養者輒周給之崧  
數歷中外尤以文學受知於上其為文雅粹而有唐

人風韻所著有北平八府志東遊錄嶺南錄及詩文  
十八卷藏於家有職方集行於世

吏部尚書鷄菴張公祠堂碑

唐龍

張先生統字昭季號鷄菴富平人也平生精學砥行  
執於大義著為文章錯綜經典揚推故實勒成一家  
之言洪武初舉明經教授京兆歷陞雲南布政司布  
政使特皇師甫戰聲教未融制度闕亡典章沉鬱先  
生至闢庠序度土田制兵賦修城堡建壇壝定法令  
陳儀軌布條格法若畫一民若安堵治行推為天下  
第一璽書褒美特進吏部尚書并命禮官傳布以風  
天下迨靖難之師次於金陵先生酌飲不入口自經  
於吏部之寢堂夫人暨其子收其屍殮之載而葬於

鄉里後長子悟以懷才舉得從縉紳遊昔武王陳師  
牧野夷齊叩馬而諫左右欲兵之武王乃義而釋之  
餓於首陽鯁鯁以死夫自有夷齊然後人臣之節顯  
是故包胥哭於秦庭王燭經於晝邑忠臣節士泯泯  
乎而起焉自有武王然後人臣之度彰是故齊桓釋  
射鉤之憤晉文忘斬祛之讐即五霸亦無修怨之事  
矣先生信以持義義以成信是故生則守官危則授  
命死不離次非今之夷齊乎文皇帝包荒含垢以體  
天道俾得反葬其骨曲全其家顯榮其子非今之武  
王乎夫先生死且百餘年於斯耿光尚湮君子憫之  
既嘉靖紀元詔天下甄錄遐遺用廣褒勸陝西路乃  
叅政潘子墳蒞其事學官王道褒然後舉先生以告  
焉潘子曰臣以守死為難國以顯忠為大先生死不  
泯泯而今乃泯泯乎遂列牘請於巡撫御史大夫王  
公巡按御史喻君並欽休烈即其邑建祠秩祀逸典  
修焉龍乃執簡賜言曰節亮者動光德樹者風遠而  
是舉也豈惟發潛闡幽不遺先生王之典刑而已抑  
所以仰昭聖度如天之無不燭地之無不載乎至於  
植彞訓補國遺其庸殆又多焉吁至矣

先考少師吏部尚書贈太師謚忠定府君行狀

蹇英

先考諱瑨既仕 太祖高皇帝賜名義而字耳之蹇氏世家重慶之巴縣繇宋以來代有顯宦自高祖以下皆隱德弗耀曾祖諱繼祖曾祖妣辛氏祖諱均壽祖妣雍氏考諱源斌妣胡氏繼羅氏先考生而岐嶷聰明過人客有過門聞其聲咸異之尤為祖母所愛常抱置膝間屢有星鑑者稱為國器八歲從鄉先生授學日記數百言曉其大義未幾喪母夫人哀毀踰禮尤善承順繼母繼母愛之如已出暨長選補郡庠

生學業日進同輩莫不推讓洪武甲子科以書經中  
鄉試明年中會試禮部登進士第除中書舍人授從  
任卽時年二十二丁卯三月丁繼母憂自陳 高帝  
帝顧問曰豈蹇叔之後乎遂 親書義字賜之易其  
舊名賜路費乘傳而歸終喪復舊職庚午歲滿一考  
例當調用上曰待終三考調仍復舊職建文中陞  
吏部右侍郎授嘉議大夫 太宗文皇帝嗣登大寶  
段本部左侍郎數月陞本部尚書授資善大夫永樂  
二年兼詹事府詹事三月授資政大夫六年奉 勅  
兼輔導 皇太孫 七年 上巡狩北京命輔 皇太

子監國尋召詣行在 顧問畢命歸賜鈔萬緡九年  
秩滿賜宴 奉天門賜勅獎 諭曰尚書喉舌之司  
吏部天官之重非得異才難堪是任惟卿練達明敏  
才猷茂著昔事 太祖高皇帝克盡乃心奉公守法  
肆朕卽位之初特簡擢以居茲職卿秉心正直不附  
權勢無縱詭隨竭誠無隱退無後言於國家有所裨  
益誠所謂淳良篤實之臣者也今歷任九載考績無  
過特用嘉獎卿尚益懋忠勤益勵直操以表率庶僚  
以輔朕至治詩曰靡不有初鮮克有終職此為戒欽  
哉十年 賜誥命贈祖封父皆資政大夫吏部尚書

贈祖妣妣皆夫人封英母劉為夫人十四年夏有疾  
皇太子遣禮部官賚詩賜問繼遣中官賚令諭問  
疾有曰卿當體余之意勿以政事為懷稍歇思慮順  
養氣體為久遠之計余日聽政每以卿平日規諫之  
言行之如有未當即與諭德議其可否卿當勉加湯  
藥蚤圖痊安慰余之望端陽日又遣中官賜詩并宴  
于家重陽冬至皆賜詩及宴繼遣中官督工增造廳  
事十七年丁父喪訃聞上及皇太子皆遣官賜  
祭皇太子賜詩示慰問寬勉之意且賜白金百兩  
命馳驛歸未幾奉 上命起復遂詣行在謝 恩仍

奉 命回京輔導十九年冬侍從 皇太子如行在  
至中都奉 命諭輔 皇太孫還南京既而侍從  
皇太孫赴行在時以親服未終乞回南京守制 上  
允其請繼奉 勅書巡撫京畿次年五月復 命行  
在二十二年八月 仁宗昭皇帝嗣位特陞少保仍  
兼吏部尚書從二品二俸兼支九月少傳兼吏部尚  
書賜冠袍象笏玉帶繩愆糾繆銀章十一月陞少師  
仍兼吏部尚書洪熙改元賜誥褒贈三代曾祖祖考  
皆榮祿大夫少師兼吏部尚書曾祖母祖母妣皆贈  
一品夫人加贈英母劉封英繼母張皆一品夫人賜

第南京舊內之東四月賜蹇忠貞印一且賜勅  
褒諭勅曰曩朕監國之時卿以先朝舊臣擢兼  
詹事日侍左右時肇建兩京政務方殷隨事籌畫適  
中惟難卿以善翊君以義徇國勞心焦思不恤身家  
載歷艱虞未嘗有咨嗟之意及朕嗣承大統贊襄治  
理用濟斯民喻朕於道不懈益恭二十餘年夷險一  
節朕篤不忘茲以已意創製蹇忠貞印一枚賜卿用  
藏于家傳之後世俾尔子孫知前人顯榮於國者良  
不易致耳加保守朕之子孫亦知卿弼予於艱體朕  
愛卿之心保爾子孫庶幾上下相安與國咸休書曰  
惟后非賢不乂惟賢非后不食自古君臣相遇難矣  
往績惟茂永終是圖五月命同太師英國張公少  
保戶部尚書夏公監脩太宗皇帝實錄是月仁  
宗皇帝賓天宣宗皇帝嗣位復命同張夏二公  
監脩仁宗皇帝實錄書成賜銀幣鞍馬筵宴宣德  
元年八月扈從親征武定州及歸賜人口犀帶十  
一月賜火者二人以給使令二年七月賜金銀  
紗布三年八月賜玉帶扈從巡邊十月奉勅輟部  
事勅曰卿祗事祖宗多歷年所忠謨謹議積效誠  
朕嗣統以來尤資贊輔夙夜在念圖善始終蓋以卿



春秋高尚典劇司優老待賢禮非攸當况師保之重  
寅亮為職不煩庶政乃副倚毘可輟吏部之務朝又  
在朕左右相與討論至理共寧邦家職名俸祿悉如  
舊卿其專精神審思慮益致嘉猷用稱朕眷注老成  
之意四年復賜人口并麒麟綵段五年二月賜  
銀章有忠厚寬弘之褒七年賜新第于文明門內又  
賜筵宴器皿及鈔萬緡八年正月元夕遣中使賜筵  
宴及鈔萬緡于家自是凡遇節日咸賜筵宴于家  
是秋寢疾遣范太監領太醫院判韓叔暘往視復遣  
吳太監慰賚有加九月考滿賜勅曰卿歷事祖

宗于今四紀始擢禁近進政本之地學廣識明小心  
恭恪老成忠厚端靜和平有重臣之體若佐仁考  
於監國尤積勞動忠貞之褒王音孔彰肆朕繡承  
式資贊輔忠言謹議累效厥誠朕志保民孜孜夙夜  
卿同斯志謀猷入告裨益為多今考九載之績深用  
嘉念特宴勞於禮部仍賜勅獎諭於予朕惟祖  
宗之付畀允篤于敬罔敢怠忘亦惟祖宗之舊臣  
同德同心是毘是力卿尚益懋于誠益儆於終庶幾  
共光我祖宗之洪業十二月先考生旦賜廐馬  
一疋鈔萬緡九年九月賜廐馬楮幣命扈從巡

邊十年正月 宣宗皇帝賓天奉 皇太子即 皇  
帝位賜白金文綺時以 大祀南郊齋宿朝房是晚  
以憂念遘疾不能入朝十二日 上遣范太監領太  
醫院判蔣主善往視復 命回家調理十四日仍遣  
范太監率太醫院多官及名醫來視壽畫用藥復以  
藥方進 呈繼賜鈔萬緡及羊酒等物時先考自揆  
卧病不起泣謂范太監曰我以布衣荷蒙 列聖大  
恩不曾效報不幸 大行皇帝上賓 今嗣君即位  
我不能終事沒有遺恨矣今國家大事已定凡後行  
事只依 太祖高皇帝成憲天下生民之福也繼而

諭諸子曰尔子孫和順孝敬謹守法度無替我訓翌  
日范太監復至時病已亟惟拱手以視遂終于正寢  
嗚呼哀哉先考生於癸卯十二月二十日卯時享年  
七十有三 制贈特進光祿大夫太師謚忠定仍  
遣官造墳安塋子男四英芳芸荃女長適馬俊次適  
李誠英芳及二女皆劉夫人出芸孔氏出荃張夫人  
出英 先考捐館之明日 恩授尚寶司丞荃洪熙  
中授尚寶司丞前先考四年卒孫男四曰霖曰震曰  
霈曰露孫女一卜以明年二月十八日歸塋先塋之  
次嗚呼先考謹厚靜密凡言於 上議於 朝者退

未嘗自言在英母子固不敢有問其親故之厚者問  
或私請於先考曰公事 列聖所效謀謨不可使有  
聞於後乎先考荅曰 列聖聰明睿知吾辟如燭火  
之微何能少裨於日月以是不肖不孝不能有所備  
述謹撫平昔所聞於老長及考閱家藏 賜書而叙  
其月日為狀以干於大人先生之深知 先考者為  
墓銘及神道之碑以垂于永世云

少師吏部尚書贈特進光祿大夫太師謚忠定  
蹇公墓志銘

楊士奇

宣德十年正月十有五日少師吏部尚書蹇公薨於  
位先四日以疾聞 上遣太監范弘以醫來視賜鈔  
萬緡明日遣太監以衆醫偕來又明日疾革范復來  
問所欲言對曰 陛下初嗣大寶義獨寡祐不能効  
分寸裨益然區區犬馬之誠所望於 聖明者惟敬  
守洪武成憲始終不渝耳言已而絕訃聞 上深悼  
歎屬時 國有大事悉停諸祀特賜鈔萬緡勅工部  
治喪葬贈公特進光祿大夫太師謚忠定遣某官某

賜祭而官其長子英英等奉視歸葬有日求余為銘  
余與公同朝三十有五年而事仁宗皇帝自登  
儲至大位始終皆陪公公國家老成人所以啓益  
士奇蓋多不敢辭蹇氏世家重慶之巴縣宋以來多  
顯仕自公高曾而下始隱居不出曾祖繼祖妣羊氏  
祖均壽妣雍氏考源妣胡氏繼羅氏以公貴贈曾  
祖祖考皆榮祿大夫少師吏部尚書曾祖妣祖妣  
皆夫人公諱義字宜之生而岐嶷長端重不好弄而  
嗜學弗懈始從里社師中書左丞殷哲時為郡守一  
見異之引充郡學弟子員語其師曰是兒將來遠到

非吾所及當成就之而公不煩程督日益有進決武  
甲子中四川鄉試明年中禮部會試廷試賜同進士  
出身擢中書舍人授徵事郎見重太祖高皇帝每  
前奏事率稱旨而數見獎賚初名瑤一日奏事畢  
問汝蹇琳之後乎親灑宸翰書義字賜之以易舊名  
時丁羅夫人憂賜道里費且命馳驛歸蓋特恩云服  
闋仍舊職滿三載吏部奏當調特命終九載朝夕左  
右凡機密文字必以付公而小心敬慎久而愈篤建  
中文陞吏部右侍郎授嘉議大夫太宗文皇帝入  
正大統轉左侍郎數月陞吏部尚書授資善大夫時

政令制度有非洪武之舊者詔悉復之公從容為  
上言損益貴適時宜間舉數事陳說本末 文皇帝  
以公忠實悉從其言小人有譖公不忘建文者顯  
上聖明不聽有除官不得善地訴公不公者上皆斥  
之永樂二年冊 仁宗皇帝為皇太子命公為詹事  
時師傅皆以勲臣兼之而輔導責任文臣詹事蓋元  
僚也 上欲有諭皇太子率諭詹事任道意公亦委  
曲周悉皇太子尤愛重公所言靡不信用滿三載陞  
資政大夫七年 車駕巡守北京命 皇太子監國  
中外廢務惟諸王及連表有奏請詣行在餘悉啓聞  
處分公熟於典故達於政體孜孜無倦不動聲色而  
事賴以濟賜誥以其官秩封贈二代滿九載賜勅有  
秉心正直及淳良為實裨益國家之褒數奉命奠禮  
部事雖職務填委家之裕如十七年丁父喪歸 上  
及皇太子皆遣官賜祭 皇太子贈賻尤厚有詔起  
復公詣北京謝 上慰勞再三賜鈔千緡遣中官護  
送歸南京明年從皇太子朝北京遂命公巡撫直隸  
應天等府州閭兵民休戚及文武吏之賢否而升黜  
之公謂 國家多事之際悉以法繩吏人將不勝特  
出其太甚者數人餘多見寬假而兵民利弊當見革

者具奏行之 仁宗皇帝初嗣位一切政議預者三  
四人而公居首進少保兼吏部尚書二俸俱支賜冠  
服象笏及玉帶二遂進少傅及進少師賜師傳之臣  
銀章各一其文曰繩愆糾繆公首被賜 上諭之曰  
朕有過舉卿即具疏用此封識進來蓋望公等匡直  
也繼賜誥授榮祿大夫封贈三代及妻於公數人誥  
詞 上特增曰勿謂崇高而難入勿謂有所從違而  
或怠所以望公等者甚切也又念公侍從監國舊勞  
特製蹇忠貞印賜之而賜勅有以善翊君勞心焦思  
二十餘年夷險一節之褒時脩 太宗皇帝實錄命

公監脩 宣宗皇帝嗣位一切政議屬公數人如  
仁考之初繼奉命監脩 仁宗皇帝實錄書成賜白  
金文綺鞍馬扈從征庶人高照還寵賚尤厚復從輶  
邊既還以公年老不欲煩以有司之務賜勅曰卿事  
祖宗積劬勤誠朕嗣統以來尤資贊輔夙夜在念圖  
善始終蓋以卿春秋高尚典劇司優老待賢禮非攸  
當况師保之重寅亮為職不煩庶政乃副倚毗可輟  
吏部之務朝夕在朕左右相與討論至理共寧邦家  
其專精神審思慮益致嘉猷用稱眷倚老成之意繼  
賜銀章一其文曰忠厚寬弘蓋以褒德德云賜新第於

文明門內寵錫游加吏部言公歷少師九載降勅褒  
諭仍賜宴禮部是歲生旦賜欵萬緡廐馬一匹今  
上嗣大位之日賜白金文綺是夕齋宿於公得疾越  
五日竟不起享年七十有三公為人沈深質實和厚  
簡靜內有孝友之行事君有誠處人有量無所拂逆  
未嘗輕涉一語傷物至於議法亦不苟為包含必歸  
中正歷事五朝凡五十年所履坦坦無一日顛躓  
之憂退朝之暇手不釋卷貴而能護富而能約上  
前所言未嘗退以語人蓋天下有陰被其利者矣士  
奇嘗竊論之魯簡肅之忠實不欺李文正之也不為  
傷人害物張忠定之不飾玩好傅獻簡之遇人以誠  
范忠文之不設城府公蓋兼有之矣元配劉氏繼張  
氏皆封夫人子男四長英次芳次芸次荃英荃皆尚  
寶司丞荃先卒女二長適馬駿次適李成孫男四霖  
震雷露女一公之葬以薨之歲某月日墓在巴縣某  
鄉某原先塋之次銘曰

節乎蜀山浩乎蜀川厚精毓靈挺生偉人温中穆  
外履夷蹈素 皇明麗天奮躍自下在 帝左右  
秉恭與誠掌 帝之制播告四方進貳天官遂職  
冢宰簡用俊良性典至理 帝命游隆俾輔 聖

儲陳厥謀謨<sup>聖</sup>罔弗俞四紀在廷三翼升御肅肅師  
臣秉王之度一念惟仁永矢不渝寅畏小心保終  
猶初陰利遠人人則罔覺惟 帝昭明褒詔有數  
嗚呼忠定維國老成曷不慙遺翼我 聖明生榮  
死哀死且不朽昭德刊辭永告爾後

少師兼吏部尚書贈太師謚忠定蹇公神道碑

銘

楊榮

天眷我 皇明誕啓文明之運必篤生彌綸參贊之  
臣相與協恭和衷用臻於至治揆之西蜀蹇公槩見  
之矣公世家重慶之巴邑曾祖繼祖祖均壽考源域  
以公貴累贈封至榮祿大夫少師兼吏部尚書曾祖  
妣牟祖妣雍妣胡繼羅俱一品夫人公生而穎異首  
骨隆起風鑑者咸稱為國器及就學日記數百言郡  
守貳奇之選補郡庠生學業大進尋領鄉舉登洪武  
乙丑進士第授中書舍人初名瑑字宜之聞繼母喪



請守制 太祖高皇帝因問曰得非蹇叔之後乎公叩首不敢對帝嘉其篤實因更名曰義御書義字賜之建文時擢吏部右侍郎 太宗文皇帝入正大統轉左侍郎尋陞尚書永樂甲申兼詹事府詹事戊子命兼輔 皇太孫己丑 大駕巡幸北京留輔皇太子監國適秩滿九載賜璽書宴勞之公為宮僚長 皇太子禮遇尤厚少有疾輒遣人慰問嘗以公所居頗隘特命有司增建廳事每遇節日必賜宴飲賦詩寵異之己亥聞父喪 上及皇太子皆遣祭復賜教寬慰膊以白金襄事畢即命起復辛丑 皇太

子赴北京留公輔導 皇太孫尋侍從至北京奉命巡撫畿內明年還京甲辰秋 仁宗昭皇帝踐祚陞榮祿大夫少保兼吏部尚書食二俸踰月陞少傅兼官如故賜冠服象笏玉帶尋陞少師嘗賜繩愆糾繆銀章俾其有所匡正則封進之復賜銀印一文曰蹇忠貞印并璽書備言公忠勤之實以示褒崇 宣宗皇帝嗣統命監脩兩朝實錄宣德紀元扈駕征武定州賜人口寶帶金銀文綺丁未扈從巡邊還 上以公春秋既高且師保職惟寅亮詔輟公吏部之務庚戌春兩朝實錄成賜鞍馬白金文綺時先朝舊臣唯

公為首上深眷顧之嘗賜銀圖書文曰忠厚寬弘  
賜甲第于文明門之西北落成之日復賜宴器鈔幣  
凡節日遣中官宴賜于家秩滿賜宴禮部降詔褒諭  
及公誕辰賜廐馬鈔幣今皇帝即位賜賚特厚公  
舊有心疾至是復作上屢遣中官及太醫院名醫  
往視之復賜羊酒及鈔以慰勉之明日疾劇公泣謂  
太監范安曰義起自布衣荷列聖擢用無所補報  
今皇帝新承大統又不獲效忠沒有遺恨第自今願  
率由太祖皇帝舊章庶幾天下生民受福復諭諸  
子孫和順孝敬恪遵法度遂卒寔乙卯正月丁亥也

訃聞上為悼念命有司治喪塋贈特進光祿大夫  
太師尚書如舊謚忠定官其長子英尚寶司丞屬以  
國有大事停祭百日後命禮部尚書胡濙諭祭之給  
舟車歸其喪公生元至正癸卯十二月乙卯至是享  
年七十有三配劉氏加贈至一品夫人繼張氏封一  
品夫人側室孔氏子男四長即英次芳芸荃女二適  
馬俊李誠英芳二女皆劉出芸孔出荃張出洪熙時  
授尚寶司丞早卒孫男四霖震霑露孫女一英奉樞  
將以某年某月某日附葬鄉之先塋乃列附三代并  
公歷履之詳徵予銘其墓道之碑惟公稟含弘和厚

之資出當重熙累洽之運迨事列聖存膺重託獻  
納匡翼功在國家天錫之壽衰然為時元老蓋蜀之  
山川清淑之氣鍾之哲人者自尹吉甫佐周宣致中  
興之盛曠世鮮有其儔若公之遭際事業聞望足以  
繼休聲於千載之下於乎盛哉予與公相知既久故  
於英之請不辭謹摭其槩俾勒之石用垂不朽銘曰  
天眷國家篤生才賢光輔至治夫豈偶然維公之  
生實鍾間氣時焉斯出遭遇盛世起自巍科寓跡  
鳳池擢貳天官銓衡攸司紀元永樂為天官卿繼  
兼宮僚荐荷寵榮洪熙更化倚注尤厚進秩三孤  
厥績斯茂迨及宣德寵優舊臣不煩以政左右日  
親嘉謀嘉猷夙夕入告務底裨益孰曰言耄玉帶  
廐馬白金絲幣寵賚自天惟之惠祇承聖皇  
嗣位之初惟恪惟勤一致是圖惟公在廷五十餘  
年恩榮始終孰與比肩蜀山蒼蒼川流洋洋公所  
存者山川之光

吏部尚書致仕贈太保謚文端公王神道碑銘

李賢

公諱直字行儉別號抑菴系出瑯琊晉太傅導之後也導輔東晉遂家金陵後數世有崇文者仕唐為吉州刺史因家吉州又數世孫贄仕宋為戶部侍郎徙居泰和代有顯人曾祖以道祖子興隱居不仕父伯貞仕國朝為肇慶知府俱以公貴累贈少傅兼太子太師吏部尚書妣皆贈一品夫人公早喪母而父以事去賴祖母李夫人撫育自幼端重異於常見家貧力薄刻苦讀書永樂改元遂領鄉薦明年登進士

第時太宗皇帝篤意古學詔選進士曾榮等二十  
八人為翰林庶吉士俾讀中秘書冀成遠大之器公  
在選中感激奮志不數年文辭追古作者上以公  
卓越諸士召入內閣凡機密之政屬執筆焉尋授翰  
林修撰車駕巡幸北京仁宗為皇太子監國留  
務之重選任尤嚴時翰林則留黃淮楊士奇與公三  
人輔導公夙夜勤慎不懈中外咸倚重之及再幸北  
京公在扈從遂與脩太祖實錄未成以憂去服闋  
仍入翰林陞侍讀仁宗即位進侍讀學士宣宗  
為皇太子慎選官僚首陞公右春坊右庶子仍兼侍  
讀學士凡經筵講義及文武群臣誥勅皆以屬公又  
兼記注至於聖政聖訓之當書者皆錄之以備纂  
述進階奉議大夫宣宗即位與脩兩朝實錄成進  
詹事府少詹事仍兼侍讀學士有白金彩幣襲衣寶鏤  
之賚進階中順大夫今上嗣位詔脩先朝實錄  
以公總裁書成進禮部左侍郎仍兼學士賞賚如前  
久之以禮部缺人命公出涖部事宗伯胡公大喜闔  
部之政悉付之公處之裕然若素習者吏部尚書郭  
璉去位詔以公代之命下士類皆悅進階資善大  
夫歷再歲有無賴不得志者以選撥事嫁禍於公給

舍御史交章論列乃直公誣加授資德大夫正治上  
卿正統己巳秋北虜犯邊車駕欲親征公獨以為  
不可率廷臣上疏止之不獲特命公留守京師加太  
子太保兼吏部尚書尋進階榮祿大夫景泰初進少  
傅壬申兼太子太師進階光祿大夫公累疏求退不  
允天順改元皇上復位圖任舊人公艱於步履不  
能朝謁懇乞休致并辭師傅二職詔特許之賜以  
璽書有忠清之操簡于朕懷之語復出白金文綺寶  
鏐賜之給驛舟以歸公方面修髯器宇宏偉望之若  
神仙中人天性嚴重寡言笑居家儼然及至接人和  
氣可掬學富才敏詩文清緻四方求者接踵屢典春  
闈文衡得人最盛在翰林三十餘年恭勤不怠如一  
日與王文安公齊名時稱二王又以居第在東稱東  
王先生士類莫不拭目海內想聞其風采及位冢宰  
益加廉慎時方面官罷廷臣薦舉專屬吏部公益留  
意人才委任部屬凡御史出巡歸者必令報其高下  
以備拔用自是四方多蹠得人奔競之風為之一息  
居第隘陋曾不屑意一切世味安於淡薄朝廷重  
公之德每優禮之免其朝謁及退休居家杜門不出  
日課諸孫讀書而已所著有柳菴集若干卷行于世

天順六年九月二十二日以疾終于正寢享年八十  
有四訃聞上為之悼惜特贈太保謚文端遣官諭  
祭于其家復令有司營葬事公配陳氏累封一品夫  
人先公二年卒子男四人長曰積翰林檢討居母憂  
以卒次日積次日穆次日桐女三人長適梁相次適  
蕭積次適袁傑孫男十人曾孫男七人積等卜以天  
順七年正月六日葬于邑之信實鄉高坪之原乃以  
公所為墓誌示賢請銘其神道賢從公遊最久公未  
嘗待以屬吏又引之同升平生之知未有過於公者  
謹次第其事而系之以銘銘曰

國之明昌繫彼才賢有一挺生緊系豈偶然侃侃王  
公天賦其秀有聲燁然大江之右鑿坡鳳閣容與  
翱翔惟學之昌惟譽之芳遂秉鈞衡不倚不忒百  
司庶府位稱其德位稱其德又我烝民列聖汝  
嘉保傅師臣公之旋歸既祿且壽國籍著龜士仰  
山斗公之云亡軫我聖衷節惠二名錫命三公  
有美哀榮無然愧作銘在豐碑元老之墓

太子太保吏部尚書東園何公行狀

章綸

公諱文淵字巨川姓何氏江右廣昌人也先世諱垣者仕宋為寶謨閣學士廣東提刑階宣奉大夫謚文定坦生紹興太守聖能聖能生武平知縣行行生七二七二生桂芳桂芳生德元公之祖也贈正議大夫資治尹吏部左侍郎德元生景榮公父也贈正議大夫資治尹吏部左侍郎母吳氏封太淑人公生於洪武乙丑十二月三十日幼而英邁年七歲入社學從鄉先生讀書過目成誦群兒或竊瓜果以奉公却之曰童稚之年詎可習為盜賊哉識者嘆其不凡永樂



初選補邑庠生時父兄繼喪公晝則經營家事夜則刻苦讀書溷濡既久百氏無不貫通發為文章咸中  
拜度歲戊戌登李騏榜進士第越二年拜湖廣道監  
察御史以廉介自持立朝正色已而巡按山東山東  
豪右侵漁百姓兼軍衛多擾公數奸摘伏吏民畏之  
如神仁宗皇帝即位命考四川吏治公察其殿最而  
黜陟之人服其當又劾奏工部侍郎楊和黜退叅議  
金文斌副使張銘僉事張明等三百餘人威風凜然  
貪暴往往棄官去時蜀旱所臨郡邑輒雨人謂御史  
雨烏蒙土官知府祿昭妻與耆民什伽私昭知之什

伽惧罪潛逃赴京告昭謀反詔四川雲南貴州建昌  
行都司各以所部軍討之昭遣人訟寃公移檄止所  
調軍具以其事聞於上遂直其寃由建昌行都司入  
雲南經貴州出播州楊宣慰迎謁以銀器文綺來獻  
公笑而却之宣慰出語人曰此可見何公不可以利  
動宣德改元正月奉勅清理山西戎伍於其寃濫者  
直之欺隱者誦之民無有苟免而濫加者十一月詔  
遣御史有風力者體察南京弊政十三道御史咸推  
公復承命以往因奏曰人有誤觸刑憲初犯者令納  
鈔贖罪又言老人必選年高衆所信服者使勸民為

善不使非人以虐民害政因請通行禁約上皆從之  
歲丁未上賜勅命追贈考妣因告歸省及還遇盜行  
李為之一空而縣丞張履道家人寄白金十五兩獨  
存公至京舉以還之封識宛然人皆嘆服庚戌五月  
上以蘇松等郡素稱難治而任郡守者弗得其人乃  
命大臣各舉其賢能者任之時都御史顧佐薦公知  
温州府捧璽書馳驛赴任至則視民之利病政之得  
失而興廢之舊額田十畝以三畝為陸田俾輸麥稅  
其後田有賣買而民畏麥稅之重造版籍時莫肯收  
陸田者以故爭訟連年公請均陸田之稅與水田等

於是賦稅不虧而民甚利之郡所屬四縣稅課司河  
泊所舊征銀鈔既而禁用金銀商稅止輸鈔而舊課  
不除每歲役於官者買銀輸之民多破產公以稅銀  
例禁請自今銀課亦皆收鈔朝廷從之是後民無輸  
銀之苦舊徭役弗均而富者得以幸免公度其貧富  
第其高下列為簿籍而民獲其平溫地與金鄉磐石  
等三衛隣軍士恃其不統於有司肆為凶暴廣殖田  
產不供賦役凌轢有司侵刻小民公束之以法軍衛  
肅然每歲中使至溫取供御海味果實供饋煩苛不  
勝其擾公措置有方民不病而事集一日撤下作漕

運巨艦四十五艘郡邑驚動公任僚屬集耆老量工料董其事不一二月寂無勞擾而艦成且以所餘物還下中貴官柴某以巨舟浮取寶西洋諸國迨還遇風舟泊海港入溫江瀕岸將起其貨送京柴某聲勢焰焰公處之裕如他政事有不便於民者大則奏聞小則立改振學校使士有所作興修明條制使吏有所遵守祠先賢舉逸民典禮讓時嫁娶重喪葬具儲積別善惡居數月政化大洽山無盜賊民無詞訟境內稱治隣邑之民訟有不直者亦赴訴焉公為辨其曲直咸悅服而去青田民葉孟圭徐成皆邑之大姓

也兩家故有怨成為糧長以賦不時輸縣遣孟圭督之孟圭欲因以報怨乃率五百人掠其財壞其屋成訴於官三司調軍追捕公聞之曰洪武初青田嘗反今以五百人之衆不服追捕逃山林必激變又延及無辜乃遣人召孟圭及成至府諭以禍福命孟圭以所掠還成為葺其屋孟圭拜且泣曰昨聞調軍追捕自謂旦暮鬼耳今聞指示可生之路敢不從命人謂公片言止亂賢於用五百人遠矣壬子冬十月入覲道經括蒼馮公嶺永嘉丞于建遣其子間道懷金贐公於旅館公慰諭却之過客聞其事者扁所舍處曰

却金館士大夫咸有題咏始公與八人受命為守未  
暮月政聲燁然聞於京師至是直上問吏部尚書郭  
進曰先所任九人為知府亦有來者乎進以公等七  
人名聞乃召入便殿命中傳主詔獎勞錫宴于進又  
以御製招隱詩賜之所以寵賚之者甚厚公既復任  
感上寵遇知無不為化行既久民皆信服軍衛亦皆  
戒飭其下毋得侵害於民郡中無事黃堂闕然暇則  
詣庠序進諸生周旋等講論經史膏肓不倦又召生  
徒章綸入府親自授業未幾周旋果狀元及弟章綸  
第進士今任禮部右侍郎其餘亦各出仕有廉介心  
公之指教居多歲旱齋戒禱於山川泣拜移時不能  
起其禱詞有云薄壽請從今日止甘霖望自九天來  
俄然黑雲四興大雨如注歲大熟乙卯春處州盜起  
群聚四出剽掠官軍討之往往敗績乃於要害處設  
官防守俄有一人逸入境守關者執之乃殺官軍者  
也公詢知賊據烏風洞為巢穴遣經歷黃誠潛往捕  
之悉得其渠魁時都指揮使李貴等捕盜無所得乃  
執村民以火烙之皆自証服公移文言已得盜彼所  
捕乃平民也貴等怒必欲置所執者於死公抗言不  
為撓由是活二百餘人永嘉民朱良觀良旦兄弟爭

財訟於郡公召其鄉長老諭以兄弟天倫大義因判  
詩於其狀有抵緣花底鶯聲巧致使天邊鴈影分之  
句於是良觀兄弟感泣退修親睦之行是歲五月浙  
江布政司布政使黃澤以公治行聞於朝宣宗以璽  
書獎勵增秩二級掌郡事如故命未下而禮部尚書  
胡濙復薦公宜大用乃擢刑部右侍郎將赴召溫之  
官吏軍民父老咸號泣遮番及出城男女送者萬餘  
人填塞城門居民在江之北者率父老童稚望風拜  
伏悲泣於岸側在郡六年無錙銖之取於民布裘蔬  
食處之怡然故去時詩云行囊不載溫州物惟有民

情滿腹中民思之不已為立生祠歲時祭祀及在朝  
數上章言事皆關於治體每朝廷有政事百官廷議  
公辨折利害衆皆服之論囚常求生之前後辯繫者  
之寃不可勝數又命典獄灑掃囹圄夏月則寬其桎  
梏正統元年丙辰九月詔往淮揚理盜法惟私販情  
重者罪之餘悉寬貸議者欲悉藉其家公力爭之全  
活者百餘家庚申八月朝議遣公經理京畿八府荒  
政多得賑濟之法初麓川思任叢苦邊吏侵刻而叛  
都督方正討之敗死已而遣使入貢謝罪而群臣復  
請討之公上書大畧言麓川一彈丸瘴癘之地疆里

不過數百人民不滿萬餘以大軍臨之往無不克然  
莫若命官軍耕守操備仍令官一員直入其地諭以  
禍福趨避之機好生惡死人之常情彼亦人也一聞  
開示可生之路必稽首稱臣輿琛入貢若或冥頑梗  
化則調軍相機勦絕如此則遠人蒙再生之恩而朝  
廷亦免出師轉餉之勞詔百官會議時有欲邀功遠  
徼者倡言征之便卒以山川險阻弗能克兵疲於奔  
命民困於轉輸東南騷動衆始悔之辛酉六月旱詔  
公審覆在京罪囚多所平反凡情有可矜法有可疑  
者咸從輕議越數日天乃雨大有年上封事者言民

之盜竊者多黥刺之刑不足使之懲創自今犯者耳  
扁其門曰竊盜之家朝議從之公具言律有常憲竊  
盜初犯再犯俱刺字三犯者絞今又起立牌額是於  
律條之外又加其罪况在京及各處布政司人烟輻  
輳為盜者多若盡立牌額數年之間各處竊盜牌額  
必多有失四方往來之人觀瞻實傷治體書奏乃寢  
其令時公以疾屢欲告歸而少師揚公士奇少保楊  
公溥勉番之且擬大拜公以疾力求罷上乃許之既  
歸杜門不出惟課童僕畊墾教子讀書而已巳八月  
車駕北狩邸邸攝位詔起之遂驛召於家既至以為

吏部左侍郎時貴州蠻叛議討之公言貴州荒服之地洪武中命鎮遠侯提督鎮守夷人以安永樂中始奏以其地設都布按三司及府州縣夷人始苦其役遂至作亂乞遵舊制仍設總兵官鎮守而革新設衙門北虜也先請遣大臣迎車駕還京廷議不決公倡言於衆曰此事雖十上章不得請不可已也於是自草奏同群臣詣闕力請迎鑾輿南還公與有力焉明年陞本部尚書惓惓以進賢圖治為心而賢不肖之好惡者不一公知不可力求退避三上章始獲命致仕既歸杜門養疾絕不與世事縣大夫有問候者輒

使人謝之竟弗見天順元年四月十一日得疾語諸子曰吾嘗為溫守溫民戴吾亦深今去溫數十年然心未嘗不在溫也我死神氣必歸溫矣越三日正衣冠而坐索紙筆書口占律詩一首付長子宗校筆而逝娶揭氏有懿德封淑人側室張氏子男六曰宗曰端曰喬新以進士為南京禮部主客司主事曰喬壽邑庠生曰喬福曰喬年孫男八曰會同邑庠生曰大同曰仁同曰智同曰道同曰慶同曰矩同曰種同曰瓊同孫女十曾孫男一曰豐公晚年號鈍菴學者因稱之曰鈍菴先生所著有尚書直解東園集鈍菴奏

議牧民備用司刑備用書義庭訓四書講義禮記解  
義皆行於世擇明年正月一日葬于順化坪之原朝  
廷兩命有司致祭綸親受業於公者也故述其梗槩  
為行狀以俟名公誌而銘諸絃謹按恭毅章公為公  
之門人故道公之盛德為詳嗚呼公亦偉人也惟景  
泰易儲一事不免為盛德之累耳喬新任至刑部尚  
書性嚴毅學識精敏居官清慎動三者始終如一弘  
治辛亥為御史鄒魯誣安遂以本官致仕未幾鄒亦  
左遷蕭山尹為邑中仇家賸其目癸亥喬新考終於  
家云

先公太子太保兼吏部尚書壻志

子喬新

嗚呼茲寔我先公吏部尚書之壻先公諱文淵字巨  
川世家盱之廣昌少以明經登進士第擢監察御史  
出為溫郡守以大臣薦拜刑部右侍郎以疾去職徵  
拜吏部左侍郎陞吏部尚書生於洪武乙丑十二月  
三十日卒於天順丁丑四月十有四日享年七十有  
三事聞 天子嗟悼遣官諭祭暨葬仍命有司致祭  
焉不肖孤宗等卜地於縣之順化坪將以明年正月  
一日窆惟先公之卒所以焯德著勤者有都御史廬  
陵蕭公之碑禮部侍郎章公之狀顧茲玄室不可無



辭不肖孤不敢稱道先德謹條世系與先公之履歷  
始終刻而納諸幽惟我何氏本姬姓之裔國于韓為  
秦所滅子孫散處江淮間音訛為何自漢以降代有  
聞人至宋有諱坦者以文學節行揚聲于時官至寶  
謨閣學士謚文定提刑之子諱聖能為紹興郡守紹  
興之子諱行知武平縣武平生七二七二之後有桂  
芳桂芳生德源寔我曾祖累贈正議大夫資治尹吏  
部左侍郎德源生景榮寔我大父贈官與曾祖同先  
公生未晬而孤我祖母大淑人吳氏以長以教天性  
穎敏讀書日記數千言百弱冠補邑庠生後石首鄭

先生鉉學所覽益博自大經諸史以及九流百家之  
說咸習而通之發為文章根據經史不為浮靡雕刻  
之辭而純鬯古雅人自以為不可及為御史廉介不  
阿糾摘奸慝不計福禍足不踏權貴門每語人曰凡  
為御史者名可使人聞面不可使人識也嘗巡按山  
東山西陝右所至糾貪暴誅強梗風采凜然聞于朝  
野仁宗皇帝即位命先公考察四川官吏擢良摘  
奸人服其當又劾奏工部侍郎楊和貪濫黜叅議金  
文斌等三百餘員貪墨吏望風棄官去時蜀旱所臨  
郡邑輒雨人以比顏真卿先是烏蒙耆民什伽與知

府祿昭妻通昭知之什伽懼誅潛赴京証昭叛詔四  
川雲南貴州建昌各都司合兵討之先公察其寃為  
移檄止所調軍具以事聞而蠻獠獲安道出播州楊  
宣慰迎謁以銀幣為贄先公辭烏宣慰出曰吾以此  
贄達官多矣鐵石其心惟何侍御一人而已宣宗  
皇帝命選御史有風力者體察南京弊政先公承命  
以往發奸摘伏聰察若神貪猾屏息上嘉先公克  
勤于職推恩考妣錫以勅命先公因告歸省上許  
之賜楮幣為贖者千明年還京途次遇盜行篋靡孑  
遺而縣丞張履道家所寄白金十五兩獨存至則舉

以歸之封識宛然聞者歎服為郡守視民如子惓惓  
於除害興利均田稅以便民罷銀課而輸鈔修石岡  
斗門以溉田興學校以變士習立條制以防吏奸均  
徭役以革豪右侵漁之弊祠先賢舉逸民時嫁娶重  
喪壘廣儲蓄別善惡未數月政化大洽境內稱治鄰  
郡之民訟不直者亦赴訴焉處之青田大姓葉孟圭  
徐成素有隙成以輸賦後期縣遣孟圭督之孟圭率  
衆五百餘壞其居室盡掠其貲成訴于官三司欲調  
軍追捕先公聞之曰青田地險而民獷今以五百人  
之衆自知必死憑谿峒逆王師變且不測乃馳書召

孟圭及成至郡諭以禍福命孟圭以所掠還成且葺其屋孟圭拜泣聽命青田賴以安歲壬子冬十月入朝道過括山永嘉丞于建遣子間道懷金以贐先公笑而卻之過客高其行扁所館曰邵金朝畢將還上特召先公等七人政聲著聞者至便殿優詔嘉獎賜以御製招隱詩又錫宴而遣之在溫既久民皆化服郡中無事時詣黉舍進諸生周旋章綸等講論經史其後旋狀元及第綸登進士今為禮部侍郎慶州盜王大興據烏風峒作亂四出攻剽官軍敗死者千餘人先公以方略授經歷黃誠俾率民兵進討悉獲

之時都指揮李貴等捕盜無所得乃執村氓燿以火咸自誣服先公移文言郡盜已得彼皆無辜宜釋之貴等怒堅欲寘所執者于死先公力辨其非由是得活者二百餘人永嘉民朱良觀與弟良旦爭財而訟于郡詢諸鄉長老知其釁起閨門因諭以天倫大義有詩判其狀云祇緣花底鶯聲巧致使天邊雁影分良觀兄弟感泣退相親睦烏在郡六年無錙銖取於民既被召溫之官吏父老皆號泣不忍釋及行送者萬餘雖童穉亦拜伏悲號既去民思之不已為立生祠烏為刑部侍郎以洗冤澤民為已任所辨冤獄不

可勝數又命典獄者汛掃囹圄盛夏輒寬桎梏立朝  
蹇蹇數上章言事皆闕治體未幾奉命經理淮揚鹽  
法軍民私販多所寬貸議者欲悉藉其家先公力爭  
賴以全活者甚衆又命往京畿八郡具糧儲以備荒  
規畫精密畿內倉庾充實初麓川蠻酋思任發叛都  
督方政敗死已而入貢謝罪群臣復請討之先公上  
言麓川一彈丸瘴癘之地不足以辱王師請遣使示  
以利害趨避之機可不煩兵而下時有欲邀功外夷  
者倡言不如征之便卒以道阻不克師老糧匱衆始  
悔之辛酉六月旱上命先公審錄罪囚多所平反

凡情法可矜疑者悉從輕議越數日大雨時先公有  
疾屢欲告歸而少師楊文貞公勉番之且擬大拜先  
公力求罷上乃詔暫歸以便醫病愈即入朝又賜  
楮幣二百錠命下翰林侍讀劉忠愍公言於衆曰何  
公國之直臣也豈可一日不在朝哉欲上章以尼其  
行力止之乃已既歸惟以著書教子為事徜徉林下  
鄉人莫或覩其面已已天子北征朝廷訪求耆碩  
以戶部尚書金榮襄公等文薦驛召于家拜吏部左  
侍郎時貴州孫叛方議討之先公言貴州荒服之地  
不足郡縣置也請依洪武間設都司以鎮之其三司

郡縣悉革去以舒民困會北虜也先請遣大臣迎車  
駕還京衆疑之先公倡言於朝曰此國家大計雖十  
上章不得請不可已乃自草奏率群公力請鑿輿南  
還先公之力為多明年陞尚書汲汲於進賢黜士其  
材行卓異者不終歲而遷否則歲月滿而後叙進或  
以為言先公曰宰相進賢退不肖以資格待常士不  
可以資格待異材尤惡奔競有造請者必痛抑之群  
小滋不悅構詞擠排先公亦知直道難行力求解政  
章五上始獲命陞辭錫宴既抵家優游泉石間絕不  
與世事及得疾語諸子曰溫吾故所治也其民戴吾

寔深吾歿神氣其歸溫乎歿之日正衣冠而坐索筆  
賦詩付長子宗投筆而逝嗚呼慟哉娶揭氏累封泚  
人側室張氏張氏子男六人曰宗曰端曰喬新以進  
士為南京禮部主客司主事曰喬壽邑庠生曰喬福  
曰喬年孫男十四會同大同仁同義同智同道同慶  
同亮同輝同瑛同瓊同瑤同瑤同瑤同孫女十長配  
黃德餘在室曾孫男二曰豐曰登孫女一先公晚年  
號鈍菴所著述曰尚書直解東園集鈍菴奏議牧民  
備用司刑備用書義庭訓四書講義禮記解義學庸  
直講皆行于世嗚呼先公治行在溫功業在朝廷著

述在士大夫固足以垂不朽不肖孤方纒然衰經之中言之文不敢亦不暇姑直述以誌

榮祿大夫太子太保吏部尚書謚忠肅王公神

道碑

彭時

公諱翺字九臯姓王氏其先世家灤州自公之父避元季兵亂徙居滄州之鹽山故今為鹽山人公生有異徵氣清質秀甫十歲能讀書父即勉以仕進克自勤勵學遂有成永樂乙未登陳循榜進士第二甲第一名改庶吉士甲辰授大理寺左寺正因註誤左遷行人宣德丙午用廬陵楊文貞薦陞行在山東道監察御史當是時任風紀者多事矯激惟公謹重遠大體上下賢之乙卯陞都察院右僉都御史正統丙辰

奉 勅鎮守江西政不苛刻吏民畏愛未幾往浙江  
除土豪理鹽法能聲大著己未四川松潘番賊為患  
命將往征以公叅贊軍務公歆懷以息信有來降者  
即以所賜白金寶楮易牛酒犒之番酋商巴感悅率  
生番來歸受約束者一十八寨邊境以寧辛酉出鎮  
陝西飭兵備壬戌往遼東提督軍務時遼東守將屢  
失機朝廷以為持簡任公且授以便宜之權公至守  
將以下庭叅公詰責玩寇失機故將斬之得其再三  
哀請乃已於是官軍咸股慄莫敢不用命逾月躬出  
巡邊治障塞嚴斥候仍簡閱戍卒更老弱賑貧窮配  
鰥寡俾成室家人人感激其治訴訟專行贖罪法雖  
人命亦然曰償命無益死者之家而財或足以濟其  
用故行之不疑有指揮孫璟者因漏閤鞭戍卒至死  
其妻女哭之相繼死他卒被鞭者訴璟殺一家三人  
公判曰甲死以罪妻女死于夫非殺也其令璟償葬  
埋費璟日後有名非公優容不及此癸亥陞左副都  
御史丁卯率師出場破虜有功陞右都御史己巳陞  
左都御史是年秋虜酋也先分衆寇廣寧公下令堅  
壁清野以困之賊乃遁去公在遼東十數年勤訓練  
廣儲蓄食足兵強為諸邊最其拔用將無如施聚焦

禮輩皆以勇略知名亦非他邊所有也綏懷東夷女  
直恩威兩盡往來朝貢者無不惕威而感德景泰壬  
申召理都察院事尋加太子太保會廣東西賊寇  
擾攘兩鎮將官互相觀望不即捕朝廷命公總督  
兩廣軍務公至推誠撫諭蠻夷向化者多思恩知府  
岑瑛土官也屢有勞效或疑其反側公令瑛領兵屯  
桂林聽調人言乃息其他土官有爭職者公度勢量  
情予奪得宜人心帖服癸酉少傅王文端公以清德  
雅望居吏部年且老矣朝廷思得剛明果斷者以  
濟之乃召公還命以太子太保兼吏部尚書士夫以

得人相慶乙亥公年踰七十乞致仕不允已而乞歸  
展省又不允命有司為公起第于縣郭西蓋以慰安  
其心也公掌銓衡子子持公道進退人才必察其實  
而於抑僥倖杜請託尤嚴選法為之一清天順丁丑  
英宗復位罷舊官僚公上疏乞致仕南陽李文達公  
言於上曰王朝廉謹老成吏部非此人不可乃聽其  
去任用益篤已而文達被讒黜公力言其淳實可用  
以故文達復被寵任焉當是時上眷遇公加隆特  
官其子國子生竚為錦衣衛副千戶而賞賚以金玉  
束帶錦繡衣服銀幣玩器等與歲無虛月召屢與近



臣同遊西苑南城及扈從獵近郊燕賜優渥一時擢  
用廷臣惟公言是聽有出他人薦者亦必待公而後  
決也每召見便殿訪問從容呼以老王而不名其見  
敬禮如此辛巳秋加太子少保甲申言今上嗣位賜  
銀五十兩鈔五千緡是冬命遇雨雪免朝叅乙酉春  
復加太子太保公年雖高精力如少壯人然無歲不  
引年致仕皆蒙優詞褒答勉留不果行丁亥公有  
疾上命中貴挾御醫往視并致白粲上尊之賜七  
月疾益篤其請益懇切上不得已允之居數日遣  
中貴賚賜勅諭并金織衣一襲銀三十兩鈔三千

緡時已不能就道至十一月六日卒于京邸距其生  
洪武甲子二月十二日享年八十有四上聞訃嗟  
悼贈持進光祿大夫太保謚忠肅遣官諭祭營墳給  
驛送還其鄉以卒之明年五月初二日葬于帽駕圈  
之原曾祖進昌祖大老父得林得贈榮祿大夫太子  
太保吏部尚書曾祖妣徐祖妣劉妣張俱夫人配宋  
氏先公二十三年卒累贈夫人次張氏亦先卒子男  
一即竚也女一適河南叅政賈傑孫男二長田次隣  
國子生女二曾孫男女二公天資仁厚操履端方居  
官蒞政謹繩墨蹈規矩一毫不苟且其待人外若毅

而中實寬和好惡所加善者悅而惡者不怨論事語  
簡而質是是非非確乎其不可易持已廉潔無私而  
自奉甚儉薄自初仕勤勞于外與晚處一廟堂皆然  
未嘗以壯年異其心蓋年愈高而志愈勤守愈約忠  
君愛國之誠愈篤而不懈真厚德君子也跡其所  
以享盛福榮名無愧於古之大臣者其在此欽大宗  
伯姚公狀公行詳且實矣公子好款刻石置于神道  
請予文之予素敬重公苟可以焯德信考義奚容辭  
惜乎文不足以記其實也銘曰

有美王氏世居于灤積善秉義隱處是安避兵塩

山遂定厥家再傳而顯揭德振華其振伊何自公  
特起降誕之祥虹光兆異乃勵儒業乃第科名游  
歷顯位駿望鏗錫公出四方憲度清肅弊革利興  
兵民攸服其在 中朝恪秉銓衡賢才彙進治道  
乃成公何能然惟德之進惟公惟廉惟勤惟慎公  
以接物繩直準平廉以律已玉潔冰清勤以涖事  
夜寐夙興慎以存心晨惕夕競祇事五朝始終若  
一為 國元老為士矜式官躋一品壽踰八旬推  
今較古如公幾人公今往矣疇不嗟悼匪私于公  
惟德是好渤海故郡高墳哉、於乎忠肅千載不

磨

記王忠肅公翔三事

崔銑

公爲吏部尚書忠清爲英皇所任信仲孫以蔭入  
監將應秋試以有司印卷白公公曰汝才可登第吾  
豈忍蔽之哉如汝誤中選則妨一寒士矣且汝有階  
得仕何必強所不能以幸冀非分邪列卷火之  
公一女嫁爲畿輔某官某妻公夫人甚愛女每迎女  
壻固不遣恚而語女曰而翁長選銓我京職則汝朝  
夕侍母且遷我如振落葉耳而固恠者何女寄言于  
母夫人一夕置酒跪白公公大怒取案上器擊傷夫  
人出駕而宿于朝房旬乃還第壻竟不調

公為都御史與太監某守遼東某亦守法與公甚相  
得也後公改兩廣太監泣別贈大珠四枚公固辭太  
監泣曰是非賄得之昔先皇頒僧保所貨西洋珠  
于侍臣某得八焉今以半別公公固知其不貪也公  
受珠內所著披襖中紉之後還朝求太監後得二從  
子公勞之曰若翁廉若輩得無苦貧乎皆曰然公曰  
如有營予佐爾賈二子心計公無從辨特示故人意  
爾皆陽應曰諾公屢促之必如約乃偽為屋券列賈  
五百金告公公拆襖出珠授之封識宛然

正德中予聞上事於今學士吳郡徐縉司業上海

陸深二子聞於少傅守溪王公固信不誣恐泯也  
約二子志之予追書附集中嘉靖丙戌三月巳酉  
銑書

吏部尚書贈太子少保謚襄敏李公墓誌銘

劉健

公諱秉字執中姓李氏世家山東之曹縣祖諱誠父  
諱整以公貴俱贈都察院左都御史祖母黃母陳俱  
夫人自幼穎異為父母所鍾愛甫冠入邑庠中宣德  
乙卯山東鄉試第一正統丙辰進士明年丁巳授福  
建延平府推官府有兇豪為民害官莫能禁公下車  
廉得其狀即捕治之因被誣下獄期年事白光豪伏  
法而公之聲譽日益振越兩考以才堪風憲陞都察  
院經歷未幾丁內艱服除改戶部主事掌淮揚歲課

已巳陞卽中督運糧儲鳳陽等處尋轉宣府管糧景  
泰辛未用薦陞都察院右僉都御史宣府叅贊軍務  
總理糧儲公既遷都憲於是悉心邊務嚴警禦明賞  
罰謹烽火數年之間邊境無虞君民感公之惠至為  
香火以奉其祠天順改元巡撫江南風米益奢貪吏  
往往望風解綬明年戊寅改巡撫大同等處公忠鯁  
介直臨事不苟一時同事多忌疾之時有役占軍士  
索取月錢之弊公悉革罷由是衆怒詢詢以事中公  
下獄已邗謫為民原藉公怡然促裝就道無幾微不  
平之色久之上知其誣特召復職掌南京院事甲申

陞右副都御史再巡宣府甫兩月廷臣交章薦公可  
大用遂陞左都御史掌院事屬歲當考察公舉劾無  
所避自藩臬長而下被黜者大倍於昔上下稱快而  
公之名望益隆矣是歲秋上以大同等處邊備廢弛  
命公整飭之適虜寇入境勢甚衝突公督率官軍與  
戰於鳳凰山擒獲人畜以萬計捷聞賜勅獎諭并賜  
白金彩幣寶鈔無何建州虜酋董山作亂公復以提  
督軍務與太監黃順武靖伯趙輔帥兵往討大致克  
捷師還上嘉其功賜一品服勞以羊酒成化丁亥陞  
吏部尚書錄建州功加太子少保已丑給事中蕭彥

莊者為其黨所嫉撫考察事誣奏公落太子少保以  
尚書致仕時有勸公疏辨者公曰仕止命也何辨之  
有且辨者不欲去也卒不辨命駕而行士大夫多惜  
之或賦詩以贈祭酒陳公緝熙有古道自無三黜愠  
直臣又見一番歸之句人所傳誦未幾蕭亦坐貶邊  
遠死非命時論皆以為天彰公被誣之報而公不之  
報也公為坦直不立城府遇人無貴賤賢愚必以情  
歸閑二十餘年日以文字自娛奕棋自遣訓子孫以  
勤儉接鄉人以謙和尤雅好施予鄉族有貧不能婚  
葬者輒傾囊周給不少吝以故鄉人無少長皆愛而

敬之縉紳士大夫聞其名重其為人雖衰且老猶往  
往見諸薦疏其翰林編修陳音有侃侃公忠忘身狗  
國之薦丁未以恩例進階光祿大夫踰二年為弘治  
己酉五月三十日與鄉故老着棋談笑如常客去公  
至晚無疾而終於家享年八十有二訃聞詔贈太子  
少保遣官諭祭營葬遂以是年某月某日葬其大鄉  
黃祖塋之次配張氏封夫人先公三年卒子男五長  
聰景泰庚午舉人南宮縣知縣次明天順乙卯舉人  
建寧府同知次睿國子生次智成化戊子舉人灤州  
知州次憲國子生女二長適宜興縣主簿路驛次適

湖州府知府王珣孫男八邦直己酉舉人邦彥庠生  
邦器邦瑞俱國子生邦佑錦衣衛百戶邦憲邦隅邦  
榦孫女九曾孫男二世息世元庠生智以余嘗識公  
而重之也乃走京師以戶部右侍郎延平劉公璋狀  
來乞銘辭不可遂序而銘之銘曰侃侃李公素秉岐  
嶷發解藩聲稱英特裨試早官舉盡厥職存登顯要  
彌謹彌勅厥而復起守正尤力精金百煉毅不改色  
身歸林下縉紳猶德嘉言懿行鄉邦允式堂封巍然  
大黃之側不亡存者視此銘刻

太子少保吏部尚書贈榮祿大夫少保謚文敏  
姚公墓誌銘  
商輅

成化癸巳二月九日太子少保兼吏部尚書姚公卒  
先是上遣太醫院判竇瓚來視疾繼遣中官賜半  
酒米蔬命瓚日一視之至是訃聞上震悼賻鈔  
萬緡贈榮祿大夫少保謚文敏命禮部尚書鄧幹  
諭祭又命自初喪至塋皆遣官祭勅工部營塋  
事兵部具舟歸其喪恩典甚厚公之子璧奉學士  
王惟臣狀屬予銘嗚呼予與公文好踰三十年以道  
義相規約以古正人君子相期待方賴公啟益期以



進於脫成而公遽予棄予之所以哭公者其能已於情乎嗚呼予鉅忍銘公墓哉雖然公之墓非予銘其誰因序而銘之按狀公諱夔字大章號損庵姓姚氏先世居汴宋南渡徙家桐廬族敦詩禮代有聞人曰榮祿學賓以文行知名公七世祖也曾祖鼎祖伯華父惟善有隱德以公貴祖父皆贈資政大夫禮部尚書祖妣楊妣申屠皆贈夫人公生而穎異一歲失怙申屠夫人極力撫教三歲口授孝經論語輒能記誦八歲就外傳已銳然有志于學十三游邑校後楊長教瑛李司訓伯與受春秋晝夜淬礪通貫經史為文雄健有奇氣下筆滔滔數千言弗窘李嘗語人曰一夔足矣正統戊午舉鄉試第一會試辭乙榜入太學進業時祭酒李公時勉司業趙公琬一見知為偉器待以殊禮少保南郡楊公溥尤加賞異因遣子壻從學公間游劉忠愍公之門劉許與尤至壬戌會試第一與從弟龍同登進士時人榮之癸亥擢吏科給事中首疏八事謂脩聖德舉賢才考察有司慎選風憲寬誥勅之限革監庫之弊立謚法以勸賢銓教職於便地多見採納甲子夏旱奉命祀北鎮雨應時至都御史王公翱鎮其地喜曰此所謂隨車雨也為立

碑於廟乙丑秋母夫人疾醫弗效公籲天願以身代  
尋瘥丙寅持節冊封晉府徐溝等王夫人以疾  
卒公以不獲奉湯藥為恨號慟屢絕奉柩南歸居喪  
盡禮遠近從游士雲集多所造就服闋復舊任已巳  
英廟北狩國勢危疑群臣勸邠王進議未決詢諸  
六科公曰朝廷任用大臣正謂社稷計何必詢諸  
小官衆乃詰文華殿懇請事遂定十月虜大舉進  
逼京城衆議戰守不一公言兵敗之餘人心未定只  
宜固守伏兵歸路擊之遂上疏遣人間道齎勅宣  
府遼東令總兵官楊洪曹義各選勁騎刻期以進與

京軍內外夾擊未幾洪義果統所部兵來賊聞一夕  
遁去景泰庚午春廷臣文章薦公才堪大任陞南京  
刑部右侍郎階嘉議大夫時刑部規矩廢弛公一以  
嚴肅正之獄無滯囚辛未彘賜勅以前任給事中  
贈其父母贈孺人妻王氏封孺人壬申改南京禮部  
奉勅考察雲南官吏黜陟允當癸酉還朝遂留  
禮部尋賜誥進通議大夫加贈祖父如其官祖妣  
妣泚人妻封淑人丁丑春景皇帝不豫尚書胡公  
澂在告公強之出十四日率文武大臣於左順門  
問安退集東閣議立皇太子疏懇請未允次日

公欵率百官伏闕以請是夕與予議定遂歸與王夫人決十六日早三鼓至朝房公屬予具本稿有陛下為宣宗章皇帝之子當立宣宗章皇帝之孫正位東宮等語公躍然舉筆於立上添一復字時同官鄒公幹等俱稱善已而入朝衆議合文武大小官僉名且一樣寫二本因遲延至十七日早變作弗果進英廟復位石亨輩竊弄威權勢焰可畏公視之如常亨憾其不附已乘間調公南京禮部英廟素知公為人且聞正月立儲之議未幾驛召至京賜一品服轉禮部左侍郎戊寅調吏部有真定守以

舊賄敗亨挾勢囑復其官同列附亨者令擬准藁來判公擲筆大言曰吾寧不做侍郎必不判此藁事竟止後亨敗附亨者降黜而公之名益重癸未遷禮部尚書階資善大夫公詳雅敬謹明於典禮克稱厥任上深嘉之甲申今上嗣位命侍經筵賜白金文綺寶楮成化乙酉上耕籍田幸太學皆從公所請宴賜有加丙戌會試公知貢舉預陳數事以杜僥倖閏三月進資政大夫贈封祖考以下皆如制八月公率群臣上封事其畧曰皇上當念祖宗之付託思天下之艱難勿以目前無事而恣於宴安肆於逸

樂以禮法齊家以節儉制用官爵無濫授金帛無妄  
費土木勿妄興齋醮勿頻設出入有防巡遊有度節  
嗜欲養天和留心萬機無忘政務上嘉其言慰諭  
甚至丁亥正月賜金織麒麟文綺七月以災異數  
見乞致仕上曰卿謹慎老成朕方信用不允辭朝  
鮮進海東青公言非故事宜下詔自今非常貢之  
物不得進以示不寶遠物之意戊子四月以災變率  
群臣上疏言皇上春秋鼎盛而震位尚虛宜均愛  
六宮以繁子嗣乞罷西山所建之塔斥回阿叱哩之  
流留心經筵裁決政務親君子遠小人服食言動

悉遵祖宗舊規庶回天意嘉納之慈懿皇太后崩  
卜葬有異議內閣執不可繼之以疏事下禮部公率  
群臣覆奏詞甚懇切有曰山陵宗廟聖孝所先綱  
常典禮國家攸重萬一合葬祔廟之禮少有疑沮  
關係非細豈能保其將來無據理改而從正者上覽  
奏感泣卒從其議九月彗星見公辭職不允己丑會  
試公為知貢舉官三月上疏乞祭先塋上曰卿老  
成當朝夕輔朕未可言私六月遷吏部尚書進資德  
大夫正治上卿公熟於事體釐正庶務刻革宿弊品  
藻人物進退惟公中外稱慶以為得人庚寅雨雪失

時公率諸司條列政務其末具言可憂之事以冀感  
悟辛卯秋加太子少保遣中官賜羊酒寶楮是冬  
彗出軒轅公上疏反覆諷諫言無所諱壬辰南方大  
風雨水溢公疏言自前歲彗星示變以來四方漸覺  
多故朝廷處置事宜往往不為深遠之圖自古禍  
亂常起於灾傷飢饉之餘毋謂天道姑息有象無應  
只圖因循便安於目前也上是其言命禮部即會  
議行公自是憂形於色食不甘味上疏乞罷歸田里  
不許已而疾作日轉劇臨終謂壁曰吾受國厚恩  
不克圖報死後勿隨例請塋祭以重吾過言弗以私  
比卒自公卿大夫以及閭巷士皆為揮涕吊祭填門  
殆無虛日公丰神秀朗器識宏偉言論侃侃平居接  
人開心見誠汲引人才惟恐不及自奉儉素雖貴無  
異寒士天性孝友每語及二親輒嗚咽流涕處兄弟  
無間言視群從猶已子遇宗戚中貧乏者濟之無德  
色文章豪宕經書疏義學者宗之立朝三十餘年憂  
國之心老而彌篤每當廷議正色昌言人皆敬服  
說者謂公可屬大事正直弗徇如古周勃姚崇其人  
誠知言哉公著述甚富所存藹藹堆稿一十卷公生  
永樂甲午月日享年六十配夫人王氏同邑名家女

有賢德子男三長即璧甲申進士兵部郎中娶趙氏  
次璽國子生娶予女皆王出次瑩側室金出女四孫  
男三孫女二公之葬以卒之明年閏六月日墓在邑  
金牛山之原銘曰  
桐山秀拔桐江澄澈儲和萃精挺生豪傑養氣剛  
大立志卓越問學該博文章峻潔屢魁多士遂登  
禁闈正言讜論有裨袞闕春官冢宰位望隆赫直  
諒如崇重厚如勃允矣蓋臣天胡遽奪忠在國  
家名垂簡冊嗚呼文敏無愧前烈

姚文敏公神道碑

彭時

惟姚氏系出有虞其先家汴梁宋南渡徙居桐廬世  
傳詩禮多知名士而未甚貴顯貴顯自公始公諱夔  
字大章損菴其別號也生一歲而孤性資穎異克志  
于學十三遊邑庠博通經史為文雄健有奇氣正統  
戊午以春秋舉浙江鄉試第一會試辭乙榜入太學  
祭酒李公時勉司業趙公琬一見器重之少保楊公  
溥聞名且遣子壻從學而公不自滿復遊錫忠愍公  
之門請益士大夫莫不高其志壬戌會試中第一與  
從弟龍俱登進士人榮耀焉癸亥擢吏科給事中首

以脩德舉賢選風憲立謚法等八事為言多見採納  
甲子夏旱奉命祀北鎮雨應期至丙寅持節冊祭  
晉府徐溝等王未還而母夫人卒公以不及奉湯  
藥為恨號慟幾絕葬祭一以禮已已服闋復舊任是  
秋英廟北狩國勢危疑大臣勸進邠王議未決詢  
諸六科公曰社稷大計為大臣者當任之而詢諸小  
官何邪事乃定十月虜騎犯京城禁兵出戰未大捷  
公請遣勅召邊將楊洪等預勁騎入援虜聞一夕  
遁去景泰庚午廷臣薦公才堪大任陞南京刑部右  
侍郎振舉廢墜刑獄以清壬申改南京禮部奉使雲  
南考察官吏癸酉還朝留任禮部丁丑正月景  
泰不豫尚書胡公澆在告公強之出率文武群臣問  
安且請復立皇太子正位東宮䟽成未上而英  
廟已從石亨等請出復位矣亨因挾私弄權軒輊大  
臣而進退之調公南京刑部已而有言公才者英  
廟悟驛召至京轉禮部左侍郎賜二品服戊寅調吏  
部時王公翽為冢宰選用人才資公為多癸未遷禮  
部尚書先是典禮者未愜人望公任之奏對從容儀  
度間雅英廟喜曰禮官真得人矣甲申會上嗣  
位公贊襄大禮中節合宜首開經筵命公侍列有白

金文綺寶楮之賜乙酉成化紀元上畊籍田幸大  
學悉從公請而行禮成宴賜有加公嘗云輔政當謹  
諸始丙戌秋率群臣上封事有思艱難崇節儉謹名  
爵戒逸欲之言上欣然嘉納勉諭甚至丁亥正月  
賜金織麒麟文綺戊子復率群臣上疏言皇上春  
秋鼎盛而震位尚虛宜均愛六宮以繁子嗣服食言  
動宜悉遵祖宗舊制言激切有感動意是秋慈  
懿皇太后崩卜異葬內閣執不可公率群臣覆奏詞  
嚴而義正於是合葬祔廟之禮以成公在禮部所知  
貢舉僥倖止息凡遇災異必引咎辭職疏上輒蒙慰

留復乃乞祭先塋上曰卿老成當朝夕輔朕未可  
言私於是衆知朝廷倚重公者至矣尋轉吏部尚  
書寔己丑六月也公釐正銓法務愜輿論品藻人物  
必得其情至於方面轉遷亦必以序有欲撓之者卒  
不變辛卯秋通前秩滿九載加太子少保遣中官賜  
羊酒寶楮以示獎勞是冬彗出軒轅公上疏反覆諷  
諫冀有感悟壬辰南方大風雨水溢公疏言自前歲  
彗星示變以來四方漸覺多故自古禍亂常起於災  
傷饑饉之餘毋謂天道姑息有象無應只圖因循便  
安於目前也因再上疏乞歸田不允憂形于色疾遂



作上命太醫朝夕軫視仍遣中官賜羊酒米蔬臨  
問比卒上震悼賜賻鈔萬緡遣禮部尚書鄒幹諭  
祭贈祭祿大夫少保諡文敏命工部造墳兵部具  
舟歸其喪所以賁終之典厚矣公丰神秀朗氣度宏  
偉言論侃侃達大體居官涖政精敏踰人拔擢人才  
無間新故有以嫌疑騰謗者公不與辯亦不為之變  
節隱然如泰山喬嶽不可動搖立朝三十餘年憂國  
憫民恒有念慮事有可為必勇為之惟恐已後人先  
每廷議大政大事正色昌言人皆悅服一時大臣  
詞氣慷慨才識高邁未有出公右者識者謂公可屬

大事如周勃善應變成務

如姚崇世以為知言公所

為文豪宕富贍似其為人所

存 藪藪堆稿一十卷其四

書本經義學者式之公生永樂甲午十二月十七日  
卒成化癸巳二月九日享年六十曾祖鼎祖伯華父  
惟善有隱德以公貴始贈父徵仕郎吏科給事中後  
累贈父及祖俱資政大夫禮部尚書祖妣楊妣申屠  
累贈夫人配王氏內助賢能累封夫人子男三璧甲  
申進士兵部郎中璽國子生瑩女四一適鄉貢士吳  
春先卒一適國子生陸竣餘未行其長男女四八俱  
王出幼者俱側室金出孫男三敏敬敬女二璧扶柩

南還以卒之明年閏六月二十五日塋于邑金牛山之原立石神道來徵予文予以疾固辭而請益堅顧予與公同朝久相知為最深自公之逝予悼惜尤至豈可終無一言以副孝子之心哉乃為采摭誌狀序次如右繫之銘曰

山川間氣生名賢才高意廣氣浩然讀書下筆文湧泉科名屢占多士先拜官禁近拱御筵羽儀燦爛孤鳳騫時乎景泰天順間兩京三品看屢遷雲龍風虎會當年文昌高朗凌台躔仰輔天皇司化權四方英俊歸陶甄公於是時任調元溜深負重如山淵忠言讜論累百篇致君欲過堯舜前心勤事左思歸田終情未遂殊憂煎翻然長往不少延六十甲子纔周天四海蒼生嗟棄捐百身莫贖有淚漣我皇聞訃誠哀憐贈官錫謚息禮全英靈歸塋桐江壘金牛山色開煙隧碑巍峩澤且堅神龜鼉鼉螭盤旋焯德有辭可細鐫芳名耿耿百世傳

吏部尚書贈太保謚恭簡尹公墓誌銘

陽東

吏部尚書尹公既致仕十有八年卒于家上聞訃嗟悼遣官諭祭勅有司治葬事仍贈特進太保謚恭簡賜之誥命褒舊績也公姓尹氏諱旻字同仁世為濟南歷城人曾祖諱均壽祖諱得名考諱宏舉鄉貢累官泉州知府皆以公貴贈光祿大夫柱國太子太保吏部尚書曾祖妣夏祖妣虞妣姚皆一品夫人公七歲知讀書稍長下筆數百言止統丁卯以府學生舉鄉貢第一連擢戊辰進士簡入翰林為庶吉士已巳授刑科給事中景泰間值中國多事屢有建白

皆傳正義天順丁丑遷左給事中英廟見其儀觀  
魁偉音吐洪暢欲大用之尋擢通政司右叅議轉左  
叅議己卯早代祀海岱禮成而兩庚辰持節封安南  
國王盡却餽遺國人歛服辛巳真王師有事于陝西  
公出總軍餉有白金綵幣之賜壬午丁母艱癸未  
驛召至京師擢吏部右侍郎成化己丑遷左侍郎  
歷王李姚崔四尚書皆曰代此位者必公也壬辰漕  
河壅滯公往督官運事遂集癸巳勅拜尚書命侍  
經筵戊戌加太子少保賜玉帶麒麟服己亥加  
太子太保累進階至光祿大夫勲柱國甲辰加太子  
太傅公以掌衡鑑博采公議不為私撓天下翕然稱  
之有姦吏李孜省者貴幸用事憾公甚會公卿人兵  
部鄒即中襲坐累補外諸武官奏留之因肆為媒孽  
罷其職而落公太子太傅仍為太子少保又調其子  
事構成大獄再削職以尚書歸公不自辯列惟引咎  
自責而已今上御極孜省既伏法乃吐實于官諸  
黨惡者罷黜殆盡而公壽考終命竟膺褒卹非獨復  
其故物而恩禮有加焉然則世之以仇怨相傾擠  
竭計盡勢而不為後地者亦何益哉公素負學識善  
斷大事尤精鑒彊記每經銓注雖稠入小吏閱數年

猶識其名時料人壽夭成敗歷歷多奇中故其退也  
大夫士屢疏薦欲起之而公亦老矣惜哉公生永樂  
壬寅五月二十八日卒以弘治癸亥九月十七日壽  
八十二配張氏某縣主簿鑑之女累封一品夫人孝  
教勤儉尤能逮下生永樂壬子二月一日弘治辛亥  
二月十九日卒壽六十賜祭葬皆如制公卒之明年  
甲子某月某日合窆于城南八里山之陽子龍已丑  
進士前翰林侍講先公十年卒孫繼祖以公恩廕  
中書舍人孫女一適英國公子張銳既嫁而寡曾孫  
女一尚幼子與公居鄰每挹公風度聆其言論未嘗

不歎服焉比聞公喪慨耆舊之不可復見而繼祖以  
遺命具疏奉狀請予銘是惡可辭銘曰

赫赫英祖簡脩進良燕翼厥謀以詔憲皇翹  
翹尹公行舉言揚給舍獻替銀臺出納聲名焱馳  
意氣山拔亨衢在前靡適非達天曹峩峩公實任  
之端居廟堂進退百司絜短校長左右具宜翕受  
敷施惟帝所用手操權衡與世輕重此馬群顧  
南金品貢二十四年既久且專手所植樹其高蔽  
天棟梁楠檟百材萃焉盛名難居造物所忌城門  
魚殃崐岡玉碎少行老婦綽有餘地人才實難矧

惟老成曰篤不忘  
天王聖明爵以酬勞謚亦稱  
情天之定矣人之勝矣君子有性不謂命矣九原  
有知公可瞑矣

太子太保吏部尚書贈太保謚文恪耿公神道  
碑

徐溥

太子太保吏部尚書耿公以弘治丙辰正月十九日  
卒於位上聞訃悼惜輒視朝一日賜祭賻如制仍命  
有司造墳復遣吏部司務王溱護其喪歸葬思至渥  
也既卜地於河南永寧縣長水鎮紫蓋山之麓某年  
十一月十七日葬焉今太子太保吏部尚書兼武英  
殿大學士洛陽劉公既銘之其孤珣復持楊洗馬廷  
後之狀泣拜復請予製神道碑銘予與公同年又常  
為同官交好餘四十年不敢以不知公為辭遂諾之

公諱梧字好問姓耿氏其先出真定之東庶有諱昉者仕金為平定軍宣武指揮使遂為平定人高祖諱文元國子伴讀遷大寧路推官妣呂氏中書左丞忠肅公思誠之姊曾祖諱承祖太常寺太祝贈刑部右侍郎妣康氏贈淑人祖諱綱國初盧氏縣學教諭贈南京刑部尚書妣和氏贈夫人父諱九疇南京刑部尚書謚清惠妣徐氏封太夫人自教諭公官盧氏不歸今為盧氏人公出儒宦家而資稟特異又清惠公為一代名臣家庭之間漸染有日故公年以即有大志景泰癸酉清惠公方以刑部侍郎巡撫於外公侍母太夫人居京師當順天府舉鄉試奏乞就試遂中其選明年登進士第補翰林庶吉士丙子授戶科給事中尋改工科天順丁酉清惠公在任都察院右副都御史公言不當在言路改翰林檢討當是時將臣有怙寵專恣者清惠劾奏之忤旨出為江西布政使公亦出判泗州既而丁清惠公憂服滿改定州成化己酉朝廷知公無罪召還復檢討丙戌同考禮部會試預修英宗實錄進修撰仍充經筵講官癸未陞國子監司業丙申陞祭酒明年擢吏部右侍郎丁母太夫人憂服除轉左侍郎丙午擢本部尚書俄改南京

禮部尚書今上積位轉南京兵部叅贊機務弘治戊申召為禮部尚書癸丑仍為吏部明年加太子太保累階至榮祿大夫又二年而卒享年六十七歲公儀觀豐偉鬚髯若神而器度弘遠人莫能窺其涯涘初列官清要一旦被斥于外人皆為公不堪至則孜孜訪求民瘼兩州惠政被於人者甚多在國子時臨諸生舉教條嚴而有息公而有法時勲戚年幼者奉旨受業公患其難教取其所常習讀者萃成一書授之他日中使至持去上閱之嘉嘆及擢吏部益慎其職適有執左道以登顯仕者庇其鄉人故公不得安於

於其位居南京二年鎮靜持重論者以謂得大臣體後既召還禮部當改元之歲多行大典禮公素博雅通知古今能斟酌而行得會通之宜崇王嘗乞諸京師朝賀詔諸臣集議公言雖至親於制不宜况茲飢歲所過必勞供役民何以堪上從之西夷貢獅子公言賈胡嗜利受之無益且彼泛海而來非由故貢道宜卻其物亦從之畿內多自宮以求進者紛然盈路公上疏請治其罪一時雖不能絕然自是禁例甚嚴無敢再犯者至再掌銓曹感上知過益竭心力凡所舉薦必當其人舊緣傳奉貶謫有求復進用者上疏



極陳其弊務抑絕之弟委任都督府都事秩滿當遷  
公故緩之吾家當如是其無所私如此士大夫方慶  
公之復用而公不幸一疾遂卒矣內外咸痛惜之公  
嘗以闕輔飢代祀獄鎮所過輒督有司賑卹還朝上  
言十事悉下所司議行若事有係於天下者會議於  
朝必持正道不阿徇人意或舉人才從衆論而用之  
公退獨居不敢以物私饋者至老不營產業不治居  
第自奉儉約蕭然如寒士人以為有清惠公之風公  
居清惠公喪哀毀踰禮奉庶母及侍弟禘禮意殊厚  
與人文和易可親杯酒對客談笑間發不以名位自

高其學該博凡前代人物與山川古蹟考求無遺為  
文繼雅所著有青崖澹菴若干卷皆因號而名也配  
鄭氏錦衣衛千戶祥之女贈夫人繼尚氏河南衛千  
戶清之女封夫人子男四曰珣國子生曰環任兵縣  
丞曰琪曰瓌自環而下皆先卒女二長適喬泗次適  
縣庠生戴鈺孫男八人女卒之後上念之贈特進光  
祿大夫太保謚文恪而官其孫鉉為中書舍人云銘  
曰惟古建官六職分職偉矣耿公其職丕哉公出貴  
族勤苦自刻躬取科名範我而獲中外仕途回翔偃  
息惟帝念茲考茲勞績國有政事汝惟名德公掌銓

選惟公且平吏稱其任君仰其成何以能然信吾權  
衡正色立朝倏居鎬京分彼留務孰擠以行終召而  
還上有聖明龍飛之初典章群議折以一言自合繩  
矩公為宗伯建白不靡正論獨持孰敢干紀帝曰休  
哉復汝冢宰進退百官再振風采心力並勞公不自  
愛丙辰之春天不憇遺嗟嗟故老何奪去之帝曰哀  
哉孰可倚毗卹典累頒存乎有司顯允君子今則逝  
矣功在朝廷名留國史清惠文恪世濟厥美樹碑神  
道過者來視百世之澤伊洛同逝子陰護之庶庇無  
已

吏部尚書古澹李公墓誌銘

張灤

公姓李氏諱裕字咨德別號古澹系出唐崇賢館直  
學士善之後世為江西豐城人高祖南之曾祖克敬  
祖諱仲止考諱端明以公貴二代皆贈都察院右都  
御史祖妣熊氏妣周氏皆贈夫人公自髫鬣頭角迥  
殊稍長入學宮才氣逼人嘗讀書東樓夜半有紅光  
燭空隣家誤驚失火頃之光乃沒景泰癸酉之歲夙  
興詣文廟值微雨天未曙忽二人擎命籠燈自前來  
迎公恍然莫測比至學瞬盼無所見聞者異之是歲  
秋遂領鄉薦甲戌登進士科選擢河南道監察御史

天順戊寅英廟在御奉命陝西時宿弊全積公建言  
選將練兵汰守令安流民等八事皆報可定遠伯石  
彪冒功首虜廷命覈實彪叔忠國公亨以書通關節  
公焚書曰媚權臣欺天子吾不敢也卒覈實亨果大  
怒值其敗得免於禍庚辰自陝回都御史寇公深命  
掌廣西四川二道事寇方得寵眷待御史甚嚴公英  
矣不少屈嘗有指授雖出上意亦堅執不從然上知  
公守法亦不加罪癸未擢陞山東按察使先是屬郡  
死罪二百餘人或經十餘年未決公至悉為磨勘親  
鞫之平反得釋者無慮過半青州大峴山有寨七十

二民避徭役及殺人為盜潛伏其間公往督守吏捕  
繫渠魁寘之法其逃者悉遣還蜀其逋負自是禍胎  
息成化庚寅憲宗皇帝知公政績久次乃擢陝西布  
政使下車甫餘月進順天府府尹即古京兆秩而往  
徃迫於權貴事多掣肘屹立不為搖動至於省物料  
寬舖戶博約惜薪司未役禁奸人不得投獻田土皆  
有實惠於民府入給引鈔貫歲計若干故事為尹所  
應得公悉損廉悉辭之以克官用癸巳總督漕運缺  
員以公為都察院右副都御史當其選運法久弊皆  
起於軍官格克交免違期闌河阻淺之故公敷其弊

而更之歲運不稽漕卒亦樂於趨事張秋河至南旺湖以及淮安西湖堤舊用木椿捍水糜費勞民特甚公檄卽中楊恭主事郭昇準所費易為石甃兩河之民至今賴之在淮揚六載每歲秋赴闕會議所建明皆興利除害事髡穎不能錄戊戌冬丁外艱守制歸豐城壬寅起復至京番署院事癸卯進右都御史時風紀稍緩公慨然希蹤前輩欲如顧公佐李公賓所為者臺省為之省然甲辰以讒間調南臺丙午考績至京陛見既退朝上語近侍曰李都御史好官員也遂番為工部尚書居無何大拜冢宰蓋先是耿公裕在銓曹事多脫誤至是取調南京禮部而以公代之寔出於宸斷也公感上知遇精白思報每大選先日於後堂設一木榻上書皇天鑒之四字公與二侍郎傍坐文選司官前立以缺員與選人一一品第資格可否註於手續謹緘之至期引奏填榜更無舛錯而庶亦稱得人丁未適天下朝覲上降勅諭旨黜陟幽明公與一二憲臣焚香誓天不敢以私意其間一時鯨鯢鮮有漏網者舊制以老疾罷軟貪酷不謹四條為黜幽公謂遲鈍似軟偏執似酷創立才力不及一條以處之實愛惜人才之意其法迄今不變一日

太監譚昌語鴻臚寺官轉謂公曰先時選官本入上  
必叮嚀司禮監看詳然後賜允近日上諭昌等曰李  
尚書梗直人必不敢干之自今奏入即與批出行之  
其見信於上如此一日周宗伯謝司空與公同候朝  
周曰昔尹公在吏部深惡江西人不使居華要今山  
東進士選科道京職者何多公正色曰掌銓法惟至  
公庶無罪悔苟有私曩不但負朝廷其如天下公議  
何二公皆嘆服是歲憲廟上賓孝宗皇帝賜統公連  
疏乞歸家居獨處書院終日燕坐以經史翰墨自娛  
公門坊市不着履迹平生孝友秉彝之德俱載行狀  
今不復覩縷廷試進士兩為請卷官晚歲兩遇恩典  
進階一品性素儉朴每食不過肉一味子孫謁見者  
必以買田放債不讀書為三戒所著三朝奏議七卷  
閒居雜錄十卷東藩倡和詩一卷歸田訓一冊山東  
雪冤錄一冊藏於家南臺史抄政事畧餘力集正家  
條約辨誣錄刊行於世年八十八正德辛未八月初  
六日終於正寢配羅氏封夫人先公卒子男四長槩  
歷官知府次槩醫學訓科次棻邑庠生次乘太學生  
女四長適倉曹周悉次適生員孫鷄次二人適羅似  
吳揚揚亦庠生孫男十四人環珙瓌玢瓌琮瓌瑒

珮瓊瑤玳瑁孫女十二人曾孫男五誥閭諤謚誌曾  
孫女十一人玄孫男二女一槩卜以正德壬申十二  
月二日奉公之柩啟文岡山羅夫人之兆而合葬焉  
嗚呼公劉方直諫足以結主之知廉介沉静足以受  
天之佑可謂始終一節無忝具詹者矣異時國史考  
德自當有傳以續名臣之列至於昭示後裔則非誌  
銘不可為之銘曰寶劍之精軌迹豐城地靈固護發  
為人英猗與冢卿為時阿衡直道侃侃協於聖情雖  
強不畏雖有不盈五朝出入百度以貞徐歛光鐫闕  
於幽局以昌其嗣人以保其令名吁嗟乎死而不朽於公徵

太子太保吏部尚書贈特進光祿大夫左柱國

太師謚端毅王公墓誌銘

王鏊

國家有宿德重望之臣曰王公諱恕字忠貫仕至太  
子太保吏部尚書年七十八致仕今上即位遣行人  
即其家存問而公卒於家年九十有四上為輟視朝  
一日諭祭者九仍命工部治塋事贈特進光祿大夫  
左柱國太師謚端毅朝之公卿罔不嗟悼又羨焉謂  
公祿位名壽終始俱全近古所未有也公可謂一代  
偉人矣王世家陝西三原縣公生而魁偉高岸音吐  
如鍾見者異之正統戊辰登進士選入翰林為庶吉

士授大理評事歷左寺副出知揚州府擢江西右布政使轉河南左布政使成化初進都察院右副都御史撫南陽荆襄流民丁內艱會荆襄盜起特起復公征勦遂勅巡撫河南進左副都御史改南京刑部左侍郎巡視河防又改南京戶部左侍郎所至有異政然猶未甚為人知也會雲南夷獠為梗改公都察院左副都御史巡撫其地時鎮守內臣私市外夷誅求無厭人莫敢問公劾之其下郭英懼而自盡沒其實石於官并械送其下數人于京且勸上不寶異物凡花木禽獸寶玩宜一切拒誰為朝廷言者俄有旨令致仕公怡然就道 孝宗在東宮則聞公名即位召為吏部尚書旋加太子太保公在吏部裁抑僥倖褒獎名節甄拔淹滯中貴無敢以私干劉文穆在內閣每有所軒輊公亦不屈守備蔣琮與南京科道相訐奏科道多得貶黜琮自如公言官中府中俱為一體陟罰臧否不宜異同知州劉傑御史李興以忤文穆下獄公力辯之得減死內旨以通政司經歷高祿為本司叅議公言祿出自科目自可遠到而越次超陞恐非所以愛之也唯以天下之官待天下之士勿以親戚妨公義事乃止時有建白多謂業已行矣公言

天下事設未得其當雖十易之不為害若謂已行無及則古之納諫如流者豈皆未行乎公遇事輒言有不合即引疾求退上每溫詔留之執政有不悅謂其好名者太醫院判劉文泰因誣奏公公疏辯下文泰獄鞫問事遂白而公求去益力詔允之命乘傳以歸有司給役米既歸日優游園林讀書著述不輒言者每欲起公不果以正德三年四月二十三日卒明年月日葬某原公在揚州屢折疑獄歲饑且疫發倉廩給醫藥全活不可勝紀襄陽賊平首帥欲縱兵搜山因公言而止東南大水衆庶咸望公奏蠲歲額公獨持其議以軍國之計重也然所免各郡亦且數十萬而人莫之知舊例應天鎮江太平寧國廣德官田減半徵而民田全免久之民田多歸豪家官田多歸下戶公乃為之損益官田量減其耗民田稍增之公私便焉公曾祖諱彥成祖唯真考仲智皆贈光祿大夫柱國太子太保吏部尚書曾祖妣某氏祖妣張氏妣周氏累贈一品夫人公先娶蓋氏繼張氏俱累贈一品夫人文氏封一品夫氏子男五承祐都督府經歷承祿義官承祥順天府通判承禋義官承裕吏科給事中女二孫男十三統綬基埜節簡潛璿璟輅輶輦



輿女九曾孫男三安邦安民安國女二公所著有石  
渠意見四卷拾遺二卷玩易意見一卷詩文十卷歷  
代諫議錄一百二十卷漕河通志二十卷奏議若干  
卷銘曰

國有正氣曰唯忠義忠義斯存國勢乃尊侃侃王  
公奮自三原歷事五朝正色危言其言維何別邪  
與正邪正既分國是斯定逆鱗屢犯犯且弗傷唯  
公之誠唯先皇之明帝曰老臣國之耆耆卹典榮  
名有加於舊公如汲黯逆亂寢謀公如裴度邪佞  
所仇公雖亡矣神豈云邈上騎箕尾下壯河嶽刻  
碑詔後唯昧之覺

光祿大夫柱國太子太傅吏部尚書致仕贈特

進左柱國太師謚端毅王公神道碑銘

李東陽

自古凡治朝盛世必有恢弘博大之臣布列廊廟陳  
昌言著偉績顯于天下播在史冊以傳不朽然不可  
遽得求什一于千百得焉亦足矣自我英宗皇帝  
旁求賢哲其所敷遺閱憲宗孝宗累數十年時  
則有若王端毅公固其人哉公諱恕字宗貫陝西三  
原人也正統戊辰舉進士為翰林庶吉士授大理寺  
左評事景泰間遷左寺副條刑罰不中六事上之  
朝擢知揚州府屢辯疑獄歲饑發廩不俟報且給醫

藥多所全活作資政書院教羣子弟科不乏人天順  
間遷江西右布政使揚人為立石頌德廣賊寇贛州  
公帥兵剿平之遷河南左布政使成化間擢都察院  
右副都御史撫治南陽諸府南陽豪爭礦殺人公獲  
其魁餘悉解散以內艱去會襄陽盜起詔公起復  
會兵搃其巢走之及劉千斤輩作亂公亦會王師剿  
平之大帥歆縱兵搜山公不可因下令曰擅殺者斬  
復榜示流民諭使復業民為建生祠繪像事之乞終  
制不許尋奉勅巡撫河南遷左副都御史歲旱蝗  
上疏請崇儉去奢以回天意入朝言時政六事遷

刑部左侍郎丁外艱服闋改刑部巡治漕河成言弭  
災數事未幾而蠲租之詔下矣改南京戶部再改  
左副都御史巡撫雲南進右都御史以地切交趾言  
禦夷方畧劾鎮守中官諸不法事沒其部下所得金  
寶輸之京師勲臣世帥以為歛戢所役官軍土民皆  
還部業使人至夷方無敢索賂執家假驛傳般私貨  
者皆自雇役於是聲震遠邇改南京都察院叅贊留  
務兼督巡江尋改南京兵部尚書考選官屬不受請  
託為同事所忌命兼左副都御史巡撫蘇松諸府  
會江南地震乞歸不許言內外官收納過重請為禁

華光祿寺歲供白粳槩及庖人賤工請為分別派買物料織造綵幣及貢獻禽鳥花木請為省節又請免常州夏稅六萬餘石以羨米還之又以補諸府戶口鹽鈔六百萬貫又以水旱災請免秋糧數十萬草半之以官田賦重減耗米十餘萬發廩賑饑民令減價糴穀及周行賑貸以戶計者幾二百萬以口計者有加焉有中官以買書收藥為名搜括遍江南千戶王臣者為之助惡公累疏言之上乃命械繫中官梟臣于市而中官亦誣奏公及知府孫仁仁就逮公又力求之得免又請罷內降官數人又以京師地震乞辭位不許尋復改南京兵部尚書仍叅留務聞秦晉饑言便宜十事聞林俊張黻之謫乞還其官因請罷永昌寺役加太子少保言政令必信不宜數改語尤激旋落太子少保以尚書致仕孝宗在東宮已聞公名既登極首降勅召之改吏部尚書加太子太保階榮祿大夫臺諫劾巡撫及藩郡官奉旨黜革公以為不得其職連疏乞休皆不許南臺薦公可入內閣上曰朕用蹇義王直故事委恕吏部若有謀議亦無不聽乃已弘治初從耕藉田預九推禮視學命下公請釋奠用幣爵用三獻分獻官致拜詔

上許分獻行拜禮公又爭之乃於孔子前加幣用太  
牢改獻為奠至日分奠鄒國亞聖公侍經筵偶議  
不合辭印乞休上曰君臣之間恩同父子各陳所  
見何嫌何疑可視事如故乃起就職屬有疾上命  
醫診視遣中官賜酒米諸物南京給事中周紘御史  
張曷奉命點軍為留司所奏出補外公論抃之未  
得命臺諫交奏以為老臣言當聽紘曷乃得改南  
京別任徽王奏乞陞鈞州為府晉王乞為世子  
別設典膳皆論止之知州劉槩與御史湯鼐言涉狂  
誕當道欲坐以死御史李興多杖罪人至死亦坐重  
辟公皆論抃乃從末減山西叛賊王良等既伏誅或  
議除其黨千餘輩公以為脅從宜免議始定又請老  
詔大風雨雪免朝又免午朝復以彗見自劾求退  
不進許階光祿大夫勲柱國封三代有旨令中官  
會選御醫公執不可壽王冠克副使都御史秦紘  
以總督兩廣軍務奏安遠侯柳景不法坐致仕去公  
極言紘當用乃起為南京戶部尚書太醫院判劉文  
泰者奏公不當令人作傳議者以為有所受公具自  
列乃下文泰獄降御醫公又乞休蓋自蘇松以來前  
後䟽十餘上乃賜允命給驛還鄉有司月給米二

石歲給夫役二人賜寶鏹三千貫居十有三年聖天子登極詔賜牢醴遣行人存問于家復加米及夫隸數倍于昔且賜璽書有嘉猷入告語公復上笑言聞疏言數事正德戊辰某月某日卒于正寢壽九十有三上震

悼贈特進左柱國太師賜謚曰端毅遣官諭祭者九令有司給棺槨治凡葬事公墓在西園尚書府君墓次其所自卜地也元配蓋氏繼張氏皆累贈一品夫人文氏封一品夫人貳室張氏公少所育子曰承祚為義官有丈夫子五人承祐南京前軍都督府經歷早卒承祿義官承祥順天府通判承禔亦為義官承裕

舉進士累官吏科都給事中孫十三人統綬基莖節簡潛璿璟輅輜輿統綬節皆縣學生曾孫四人安邦安民安世安國女二人其壻曰縣學生仇灑鄉貢士宋廷佐孫女九人婿曰李璇秦憲段懷忠李邦董廷珪李應雷張元卿郝奎聘而未娶者曰秦淵懷忠廷珪應雷皆縣學生曾孫女二人公平生好學博涉經籍至老不倦所著有漕河通志介菴奏議石渠意見經籍格言行于世承裕予禮部所舉士因奉戶部尚書劉公用齊狀來請銘是惡可不銘銘曰

巖巖華嶽雄鎮秦封靈秀攸萃為人中雄端居廟

堂進退不辟高舉長步直言正色奮翼而起排雲  
屬空紛彼羽族矐其下風群疑糾紛中有定括南  
山可移三軍可奪用我則出舍我則還外若可撓  
其中浩然秉彝在躬弗措弗失其所餘者以還造  
物柱車守閭世豈無才持以大用匪遠則垂滔滔  
江流中有砥柱頽波狂瀾不見其處功名始終自  
古謂難我所自立其成則天國史有書鄉賢有  
祀公銘不隳公墓在此

大司馬三原王公傳

王鏐

公姓王氏名恕字宗貫別號介菴陝西三原世家其  
先有諱永清號渭川處士者公始祖也以公貴累贈  
兵部尚書公天性穎敏幼有大志數歲西園翁命之  
學即知嚮慕長益淬厲正統辛酉以易經中鄉舉繼  
遊太學乃舉戊戌進士第入翰林為庶吉士擢大理  
左評事出知揚州府累遷江西河南左右布政使入  
為都察院右副都御史奉勅撫治南陽荆襄流民  
會襄陽盜起命公起復征勦賊平乞終制不許尋  
巡撫河南再改南京戶部左侍郎時內閣大臣有言

雲南地切交趾蠻夷土官易生變宜選剛正與智識  
超卓者往撫之 上命改公都察院左副都御史授  
勅以往未幾陞右都御史而議者又謂南京根本重  
地守備非公不可改公南京都察院右都御史尋陞  
南京兵部尚書仍參贊機務所以眷注而寵綬之者  
蓋未艾也公博學多才練達政事而果於為善其始  
為大理讞獄多所平反嘗條陳刑罰不中者六事  
上嘉訥之著以為令比為揚州聽訟折獄咸得其情  
有一老婦嘗誣隣人為盜公閱其職有二裙一寬而  
長一短而窄老婦謂其子婦之裙其隣謂其嫂與妻

之裙公詰老婦曰尔一人之裙詎宜有長短廣狹不  
同耶遂明其非盜有二人爭牛公詰之曰一牛而二  
人爭之吾將焉歸盍以入官命左右搜出之其一人  
默然一人喧爭不已公以與爭者曰此已物也故恡  
惜如此人稱公為神明云乙亥丙子旱澇相仍民饑  
且疫公發廩賑貸不待上報遣醫治療給之糲粥所  
全活者不可勝紀民既安乃擇士之明敏者處之郡  
齋躬自訓迪繼又作資政書院以養士自是舉進士  
者累不乏人公在揚凡五年苞苴不行門無私謁比  
去江西為之立碑頌德以志思焉癸未廣州流賊干



餘人劫贖之安遠縣公率兵勦捕獲其渠魁吳廣等  
餘衆悉平成化乙酉南陽金斗山豪右爭鑛殺人  
守土者莫能制公至彼始閱月即擒為首者寘于法  
餘悉解散未幾襄陽盜起勢甚猖獗公偕平蠻將軍  
李震調兵征討會于南漳建兵征討會于南漳建兵  
至大木廠搗其巢穴賊皆奔潰復遣裨將追擊之失  
利衆心洶洶謂南漳無城可守欲退保襄陽公曰賊  
雖驟勝黨與尚寡舍險就易非其所長必不敢易我  
而來况南漳乃襄陽之藩籬衆皆視為輕重苟一舉  
足則遠近望風奔遁賊若乘虛而躡其後非惟失南

漳雖襄陽亦不可保矣衆曰保此固善賊來何以為  
計公曰奉命討賊賊至出戰戰或不利委身致命此  
吾分也何以去為已而賊果不來衆始服公料敵之  
長既而連疏請兵丙戌三月元惡劉千斤就擒捷奏  
奉勅獎勵九月獲石和尚等千餘人械送于京賊  
遂平公乃疏防患安民六策皆見之施行其初破賊  
也首帥欲縱兵搜山公固止之曰下令曰獲賊當生  
致軍門遂斬擅殺者復榜示流民諭以禍福俾之復  
業於是山谷之民感公德惠乃圖像奉祠丁亥二月  
奉勅巡撫所至問民疾苦興利除弊是歲夏旱蝗

公禱于濟瀆大雨三日乃止既命有司捕蝗復上疏  
請赦國朝故事非始即位及大祥異不輕肆赦公  
以一疏之入而使數萬生靈獲被霽恩謂非忠格於  
上而言聽計行者耶丁酉二月公至雲南既宣布德  
意遂下作奸犯科之禁俾圖自新於是官屬民夷望  
風悔罪而政令為之一新三月復上疏言啓邊蠻之  
由及交人窺伺之意曰陳禦邊方畧教事五月劾鎮  
守中貴私通外國攪擾夷方諸不法事其罪首指揮  
郭景自盡餘械送隨行數人及輸所沒入寶石諸物  
于京六月陞右都御史敕諭至即日上疏陳謝有若

萬里炎荒之地荷九重優渥之恩捧黃麻而感泣  
持白簡以汗顏既蒙信任而無疑敢不捐生以圖報  
之語未幾中貴以黃鸚鵡諷公貢獻公不可彼以自  
進公上疏極言其不可受曰臣聞漢之時鼠巢于樹  
野鵲變色識者以為不祥夫鸚鵡本綠羽而變黃正  
與野鵲之變同不知某何取於此而進之又曰不寶  
遠物則遠人格即今外夷又缺朝貢交人漸至不臣  
正臣隣無怠荒無修文德以來遠人之日也豈宜役  
耳目之玩忽不虞之戒伏望明降詔旨痛却此貢不  
報九月又上疏言駕帖不可無印信凡駕帖下諸司

則用司禮監印信刑科掛號皇城諸門俱用照出關  
防印子所以防詐偽也今百戶汪清齋駕帖至郎中  
鍾蕃所既無印信又無關防臣慮事體不一設若駕  
帖內有賜死重事而無印信可驗其人將死乎將不  
死乎果出上意而不死是違君命而罪愈重脫  
非上意而死之是孤臣節而法愈輕又云昔者交  
趾鎮守非人以致邊方覆沒一夫啓釁以致麓賊反  
叛費不貲之錢殺損無限之生靈至今父老言之莫  
不疾首蹙額今日某等所為之事殆有甚焉又不報  
戊戌二月至南都掌院事上言內庫歲久貨物當焚

毀者宜以易銀為造官艦之費江北五衛京操官軍  
不宜如王瓚言放回彼處操守以失居重馭輕之首  
蓋公自參贊以來日革損益獨任已見用是不免為  
同事者所忌是歲五月毘陵地震有聲聞生白毛公  
引咎自責乞罷歸田里不許七月條陳六事其最切  
要者言東南民力久屈於饋運而西京收糧內外官  
多苛政害人尚書秩滿上以公所任事重職專止  
勿赴京就給誥命制詞有剛介不阿端方有守之  
褒五月上疏時事其大者罷織造却禽鳥花木之貢  
俾軍民息肩愛戴聖德不報七月上章言九事復

請出羨餘米八十石修築常州府城是年江南夏旱  
秋水公奏免蘇松常鎮應天太平六府秋糧六十五  
萬餘石及湖州等府糧二十六萬及馬草以羨餘代  
納嘉興秀水嘉善二縣水災糧一萬二千石有餘三  
月上疏乞休致不允四月上念民困未蘇命公  
賑贍公周行村循區畫措置可謂無所不用其心而  
常不以語人故民有不知而陰受其惠者矣七月又  
言四事其一言臣近聞有中使至將謂朝廷軫念  
貧民恐臣奉職無狀故特遣近臣出內帑遠來拯救  
已而又聞中使乘舡百餘艘載鹽數千引來市玩好

之物臣初未以為然及至果為市買玩好似此聲勢  
張皇未免搔擾郡縣臣恐遠近傳聞使狂夫得以籍  
口且當此儉歲夫何織造旁午貢獻絡繹奢侈之風  
競起倖進之門大開遂使爵賞冗濫名器混淆徭役  
繁興財力日屈歎斯民之不貧且盜得乎願陛下  
留神深思速返前使上遂遣官陰戒中使慎毋生  
事且俾逆返四方聞之蓋壯公之言而頌上之明  
也先是南昌張元禎編修繪砥柱圖題贊其上云倚  
此柱天樞此配地軸此係大風雷驚不火波濤推不  
去倚此柱而兩京士大夫亦有稱公為當代第一人

者時上用常州府監生湯蔡言其鄉人段銓有古書  
名截江網盧岐僧院有古畫刻絲作羅漢觀音像遠  
蔡馳傳取之公聞之遂以為言其大要謂帝王之學  
與常布之學不同帝王身兼治教之責以為億兆之  
主故其學不在乎博在乎知要至於諸儒訓詁簡編  
浩瀚既非帝王所能徧觀盡讀他如老氏之書佛氏  
之學神仙之說黃白之術清靜寂滅妖恠妄誕尤非  
帝王所當留意也諸葛武侯云宮中府中俱為一  
體陟罰臧否不宜異同今日之賞罰亦必如此而後  
可不如如此則同功異賞同罪異罰而人心不服矣凡

此皆馭世之要道帝王之首務也三月太監段英奉  
旨往蘇松等府造藥梅冰梅所至誅求無藝五月公  
復疏言欲盡大臣之道必須遵守祖宗之法而不為  
勢利所奪可也且祖宗時差內官出外公幹凡所  
奉勅書或聖旨帖子必明著所幹公事所取物數  
是以來使無過求多取之弊有司無橫征暴斂之擾  
近見太監王敬齋來帖子止云採取藥餌收買書籍  
初無拘集富家鉅室索取金銀寶玩之由而敬動以  
朝廷為名迫脅需求無有紀極東南列郡為之騷然  
今王敬未回而段英踵至計其所造藥梅冰梅價值

不過用銀千兩英所取銀已六千兩而復有酥合油  
牛黃沉香乳香花毯絳綾諸物之求臣惟遵守祖  
宗之法不敢擅發公帑重斂民財以阿順其意彼必  
謂臣打攪進貢懷嫉怨之心進毀誇之言此臣所以  
欲盡職而心不安也又中官妄加鹽引復上疏言臣  
惟自古人臣之事君以聲色貨利珍奇方術為容悅  
以取寵幸者未有不壞天下之事者也臣聞太監王  
敬之來江南朝廷止賜鹽七千引以為物直而敬所  
發寧國茅府衛鹽至一萬五千餘引其價可直銀八  
千兩而敬所得至三萬二千餘兩餘鹽八千引不知

從何而來餘銀二萬四千兩不知作何取用括索蘇  
常等府金銀餘三千兩玳玩可數百事臣又聞千戶  
王臣本非勲賢專弄左道而太監王敬都無智術悉  
聽指揮剝削軍民以覬寵幸隨備述其所得金銀寶  
玩之數以聞而公猶以為未盡也復上言臣於去年  
初聞太監王敬之來聲勢張甚是以昧死 上聞乞  
取回京繼聞遣人齎奉駕帖追及徐州不知王敬何  
緣不回愈無忌憚一惟隨行千戶王臣舍人張麒之  
言是聽鬻鹽賣鈔需索金銀寶石搜括玩器書畫組  
織綵妝五毒紅紗虧官損民難以數計夫所謂五毒

者艾虎蜈蚣蝦蟆蛇蝎也以此五物織而為衣用之  
午節謂可辟邪人驟見之反謂不祥顧乃暴殄天物  
實害烝民如此即此觀之餘可槩見臣又聞王臣素  
為奸詐無籍小人以左道邪術得幸父子同為美官  
非惟虛糜廩祿抑且有玷名器夫金銀乃天地之精  
氣非智術所可為昔文成五利既以此欺漢武今王  
臣復以此欺 陛下此忠臣義士所以為之痛心而  
扼腕也先是王敬芳到京既誣奏常州知府知縣又  
誣奏公 上曰公前數章知敬芳罪惡遂不問密遣  
人偵敬盡得其贓污狀乃收捕下獄訊讞具服王臣

斬首王敬貧死謫孝陵衛同惡張麒等十八人皆遠  
謫至是公聞孫仁被逮上疏申救之仁竟得免重譴  
以復任焉十月遣人函王臣首梟之江南所嘗被害  
郡邑間者莫不稱快咸謂公之力且頌 皇上之聖  
明云十一月上疏言備邊之畧大要以安內攘外為  
本而歸之君身甲辰正月間上苑監錄事邵義以傳  
奉驟遷蘇州府通判公具疏論之畧曰蘇州故有通  
判三員今復增邵義一員是為額外冗官官冗則事  
不歸一而民擾矣邵義先為錄事正九品官也今驟  
遷通判正六品也無乃有壞選法選法壞則士無定

志而奔競之風起天下之事日益壞矣二月出巡回  
至常州得吏部移文備述去年十二月二十七日所奉  
勅旨有云這厮每多係冒籍更名朦朧授職好生欺  
詐便將劉珣器等都革了職不許在京潛住于寶凌  
忠降寺丞鄔存敬降中書舍人李孜省降左參議還  
留照舊辦事公得報喜甚乃嘆曰 皇上聖明凡用  
人之非行政之失是惟不知知之未嘗不改觀治王  
敬等罪與罷邵義等官可見矣公至是已十疏請老  
未遂退休故謝章有云悃悃屢陳未遂歸休之願集  
勞方切忽承簡擢之榮爰茲瀝血以輸誠終擬鞠躬

而盡瘁然則公雖以止足為戒而亦未嘗不以天下  
為憂也公平生忠義之氣遇事感發凡有所見必盡  
言之而亦有未盡聞於人者往在刑曹時聞順德知  
府黎永明以歐公使人獲譴滌江布政使劉福等以  
督造段疋不如法致罪二事已會 赦而不原公具  
疏言詔者國之號令數息澤感人心而示信於天下  
者也當黎永明等犯罪之時為法司者能如釋之之  
孰奏 陛下聖明寬仁未有不賜俞允黎永明等未  
有不蒙息宥天下後世未有不稱陛下如文帝稱執  
法之臣如釋之者而乃阿順至此比聞鎮守內臣有



許問四品官及受民詞之命公又具疏言國家律令  
有云凡在京及在外五品以上官有犯 奏聞請  
旨不許擅問按察司及有司見問公事但有干連軍  
官及承告軍官不公不法等事須要密切實封 奏  
聞不許擅自勾問又有例不許鎮守總兵等官接受  
民詞此 祖宗之成憲嗣皇所宜遵守而不易也今  
某者欲專大權假以貪官怠政為詞朦朧奏請提問  
四品以下職官朝廷一時不察允其所奏又許接受  
軍民詞訟某雖有才識可以委用終係內庭近侍稽  
之 祖訓條章自有本等職掌而糾劾提刑非其所

司今不分四品五品不問文職軍職並聽提問是  
祖宗累世之憲章由斯人而變革 朝廷百年之紀  
綱由斯人而廢壞臣竊痛心二疏累千餘言皆委曲  
詳盡使其如前諸疏盡聞於上皆見施行其有益於  
天下國家豈小補也哉予聞之君聖則臣直君信諫  
則臣有功公之言在朝廷信已剴切功在社稷信已  
卓偉使非遇我 皇上聖德寬仁納諫何以致雍熙  
太平之治哉公為人鯁亮峭直好善惡惡出於誠意  
憫時悼俗有甚護疾故自甲戌以來身雖在外而其  
心無日不在朝廷雖縻職一方而其志未嘗不在天

下蒼生噫如公者古之所謂社稷臣者是歟非歟  
論曰宋韓魏公雖在外然其心常係社稷至身老而  
心益篤或有時聞更祖宗一法度壞朝廷一紀綱則  
終日不食富鄭公使虜功甚偉每不自以為功至知  
青州活飢民四十餘萬常自言過於作中書二十四  
考矣公自維揚以至撫南畿其所全活以億萬計容  
詎止四十餘萬至其愛君憂國之心發於至誠故知  
無不言言無不盡嬰鱗觸請死生以之又不但終日  
不食而已也書曰為上為德為下為民公其有焉而  
世方以何順意肯為賢利膚椎髓為能吁亦可以鑒矣

太子少保吏部尚書贈少保謚文毅倪公墓誌

銘

李東陽

公姓倪氏世居杭之錢塘高祖諱啓國初徙應天  
之上元曾祖諱德潤祖諱子安皆累贈資善大夫南  
京禮部尚書考諱謙累官南京禮部尚書贈太子少  
保謚文僖妣姚氏繼郭氏皆贈夫人初文僖公代祀  
北岳姚夫人感異夢遂生公因名曰岳字舜咨公體  
貌豐碩目光炯炯望之如神人少有高識年十一見  
羣吏將赴部試戲出獄辭試之第其高下已而果然  
文僖為翰林學士典京闈試事拒勢家請託為所中

謫戍萬全公為都司學生內受家學習聞先朝典故恒究心天下事舉天順甲申進士被簡入翰林為庶吉士諸先輩竒之曰此公輔器也授編修預修英廟實錄加從六品俸文僖致仕而南公予告省觀還秩滿進侍讀加俸從五品直講經筵音吐洪暢義歸于正憲廟每日屬為文僖疾再乞歸省因得終制暨今上為皇太子出閣進學預修文華大訓進學士侍東宮講讀在翰林者二十年同考禮部及試京闈再執文柄校閱明當得名士為多擢禮部右侍郎今上即昨遷左侍郎進尚書在禮部者

十三年儀文制度多所擬定其大者若徽號皇太子婚諸王冠憲廟大喪而太廟桃袷議母后奉慈殿制皆前所未有親畊籍田視太學皆以職事從他如革淫祠正神號禁齋醮止召胡僧請却西域貢獅諸疏皆其手出累知貢舉往往於舊法加新意遂不可易尤善斷大事每廷議羣疑不能決輒用片語析之無不帖服凡四方災異歲一再類奏加以箴諫得大臣體南京叅贊機務官闕廷薦公上留不釋未幾忽有南京吏部之命加太子少保以行奉詔考庶官甄別惟允叅贊再闕

改兵部時留務齟齬公秉正連變不激不隨百廢頓  
舉兵民皆恃以為命吏部闕尚書上選于衆特召  
公至則釐正品類獎恬抑躁不卹恩怨正色盛氣人  
莫敢干以私除目下必翕然稱快天下想聞其風采  
每率諸曹會奏如講學修德敬天法祖節宗室汰冗  
員闢異端前後數十事皆切治道甫踰年偶趨朝急  
動氣成疾疾且亟猶手書薦稿既殆強索筆書平生  
公正無偏私數語字隱隱可識竟不及家事為尚書  
歷兩京四部去一部其屬必眷慕不忍別卒之日自  
公卿下及百執事交口痛悼有失聲者嗚呼天生一  
世之才間有恢閎博大傑特而絕出者蓋不數見此  
其人之用舍存沒必關氣數繫家國非羣生旅喪者  
比公文學行業大用于時而卒弗克究以沒獨非天  
哉然公以父子為史官為學士為大宗伯本朝所  
僅見以禮部兼講官實出親命歲時所賜若金  
幣襲衣諸珍物疾則賜牲酒蔬米命醫診治辭免  
則溫詔慰留計聞則賜寶鏹萬貫遣禮官諭祭  
者四勅有司治葬仍給驛歸其喪贈榮祿大夫少保  
謚文毅官其子為中書舍人遭際之盛終始極備亦  
可謂無遺憾已公娶盧氏湖廣右布政使雍之女有

才慧贈夫人生子孝孫五歲而夭繼袁氏封夫人善  
理家政公以弟工部郎中阜之子霽為後今為中書  
者是也公生正統甲子四月二十三日卒以弘治辛  
酉十月九日年五十八阜請護喪歸卜某年某月日  
葬于某山之原啓廬夫人之窀自新亭來祔公嚴重  
剛毅而表裏洞達即之溫然可親性至孝父難時匍  
匐求解居喪哀毀踰度以舊業讓諸叔弟弟阜及山  
澤皆所教育澤亦為中書舍人篤念舊故鄉黨負乏  
蒙賑卹者多至不可數雖奕世貴顯囊無餘貲為文  
章平正邕達氣象偉然所著有青谿藁若干卷與文  
僖集竝行于世予與公同舉進士又同官父為知己  
固將為天下慟而後及吾私乃據吏部侍郎王公濟  
之所著狀為銘而狀所不載者則互相發云銘曰  
倪以國氏派出鍾阜公生北都若麟鳳在藪踵接  
科第繼踐台斗家非世卿官所自取若玉在岷產  
固其有為文章宗為經濟手若錦在織若鐘應扣  
庭充廟薦若商彝周卣暨掌天曹為百僚首若鏡  
在縣鑒物妍醜若鉏在田務技稂莠拒扞彊禦鎮  
定紛揉若虎豹在山藜藿為守若駕堅載重驅疾  
以走苟非其材踣者十九古亦有言君子大受用

而弗終抑又誰咎旂常竹帛公可不朽擬德弗工  
象物為偶我銘在茲以慰良友

倪文毅公家傳

吳寬

公諱岳字舜咨姓倪氏其先從宋南渡家于錢塘  
國初詔徙江浙諸省民實京師公之高祖啓在徙中  
故今為上元人自啓以下三世皆未顯至公之父謙  
在 英宗之世始以進士及第入翰林仕至南京  
禮部尚書卒贈太子少保謚文僖文僖嘗奉 命祀  
北嶽其配姚夫人夜夢緋袍神人入室寤而生子文  
僖以為嶽神所感也因名其子曰岳即公公生而瓌  
碩迥異常見性更孝如夫人沒時年甫七歲居喪哀  
而盡禮弔客歎異幼即知向學業文之餘兼通吏事

偶有群吏將赴吏部試戲出獄詢為題令剖斷旁觀者曰此老吏筆也識者已知公他日非特以文名者文僖以翰林李士主順天府鄉試為怨家中傷謫戍宣府公從行患難中學業益勤既長文僖擇日筮賓為行冠禮邊人環觀歎羨自是習行之天順壬午以宣府學生鄉試中式甲申登進士第年二十一選為庶吉士績學翰林預脩英宗實錄成化乙酉始授編修實錄成加俸一級先是文僖用詔恩復學士一時父子同在翰林人以為榮後文僖擢南京禮部侍郎致仕家居公乞歸省因過錢塘展墓還任乙未秩滿進侍讀明年選充經筵講官於是文僖再起為尚書仍以疾致仕公再乞歸侍竟遭喪服除還任適今上為皇太子講學春宮詔輯文華大訓內閣大臣首以公名上壬寅書成進學士甲辰充春宮講讀官丙午擢禮部右侍郎仍命經筵進講弘治戊申為今上即位改元之歲進左侍郎癸丑拜尚書丙辰俄加太子少保南京吏部尚書己未再改兵部賜敕叅贊機務明年始召為吏部尚書兼太子少保如故公狀魁岸目光炯炯袍笏偉然望之如神天資明睿為文敏捷若不經意初在翰林凡考

校纂修緯有餘力每進講。上前以古義附時事為  
勸其言剴切而音吐洪暢人擬之范祖禹。上屋屬  
目始有大用意及在禮部遇事如素習無難易即治  
累遇行大禮凡載於儀注者既多贊相合禮若國  
朝自德祖以下九廟已備及憲宗山陵禮畢  
神主將升祔於制當祧廟下禮部集廷臣議或以  
德祖以下四廟以次當祧至太祖為百世不遷之  
祖公以此說固所以尊太祖然豈太祖崇本尊  
親之意哉故周既追王太王王季又上祀先公以天  
子之禮其意蓋出於此國家自德祖以上莫推  
其世則德祖乃周之后稷也不可祧懿僖仁三  
祖以次當祧至太祖太宗為周之文武百世不遷  
今憲宗升祔當祧懿祖一廟宜於太廟寢殿  
後別建藏祧主之所如古夾室之制每歲暮則奉祧  
主合享亦應古禘宗之制時又有言孝穆太后可  
祔廟者復詔議之公言周之姜嫄為帝嚳次妃后  
稷之妣故周禮有享先妣樂舞並指姜嫄而魯頌閟  
宮之詩特見其名此別廟之明證也且唐宋以來皆  
有故事可考如奉慈殿是已今考穆神主宜於  
奉先殿旁別立廟歲時祭享悉如奉先殿之儀知



禮者皆以其言為然奏上 詔悉從之二疏蓋皆出  
公手云時 今上初元慨然欲新庶政公與同官協  
心輔政首革淫祠正神號將舉宿弊盡除之建言者  
因及孔廟從祀諸賢亦宜改正公言漢儒專門六經  
轉相傳授煨燼之餘賴以不墜其間諸儒立身不無  
可議能傳經之功自不可泯故自唐以來列于從祀  
彼七十子名字載於遷史已久又何必以區區臆見  
追論於千百年之後哉遂格不行未幾尚書耿公自  
南京召至適以災異求言公偕上七事又以八事繼  
之大率勸 上躬節儉以先天下言今天下奢靡成  
俗財匱民窮惟從所好而已且天下之土地有限而  
宗室之分封益增百年後又將何以處之宜以時  
減殺又近歲額外設官頗濫凡所供給皆出於民民  
安得不困宜以裁時革公嘗以所當言者尚多不能  
專主為恨及拜尚書適京師有大雨雹之變即上言  
天之告 陛下至矣蓋變不虛生宜深求其故以回  
天意可也又勸 上勤講學開言路黜奸貪進忠直  
止無功之賞停不急之役番僧惑世以異術售不宜  
復召而來賈胡邀利以夷獸進宜部而去故事四方  
奉報災異多不能數奏惟歲終一上至公以其日月

先後援引經史為證言甚懇至欲上下同加修省不事虛文上嘉納之尤嚴度僧道之禁以為近世弊事莫甚於此有言及者輒闕之既以政事為己任士大夫爭推重其才然所以取怨於人者亦多矣在南京吏部奉詔考覈諸司人服其公明無異議者以災異疊見率諸公卿條奏二十事如法祖宗謹好尚恤軍民選將帥積邊儲等事皆切於時後復以清寧宮災再以二十八事上詔皆下諸司看詳行之公既有才具部事益簡人以為不足為竟改任自永樂間遷都于北每以武臣一人有重望者留後而以兵部尚書共事故其責任視他部為重人以公為宜一時武備修舉軍民倚重相戒不敢犯法晉都肅然於是上知公果可大用始有吏部之命公居常則能鑒別人物一旦當銓選抑揚進退各當其才或言別白太過終當召怨公不卹曰吾知冢宰之職當如是若諸未務不喜紛更日亥退歸私第若無事者當建議凡軍民利病能究知其故正色侃侃言之衆亦惟公一言而定天下想望其風采方以吏部得人賀而公以疾不起矣年五十八疾革昏憤口喃喃猶及禦虜事蓋時邊報方急也索筆作書惟及朝政

其徇國之心至死不已自幼事其父與繼母郭夫人能盡子道友愛諸弟不以異母間其恩意諸弟亦謹事之至于親戚故舊所以周卹之者尤至平生馭下雖巖然未嘗妄笞辱一人故人望其外若不可親其中心實厚也卒之日人莫不痛惜之上聞訃震悼特贈榮祿大夫少保謚文毅公娶廬氏生一子天繼娶袁氏無子以弟阜之子霽為後霽蒙恩授中書舍人三弟阜登進士第今為工部郎中山澤中書舍人寬與公同朝三十年同在翰林同侍春官頗知公乃因阜等之請為傳其平生藏于家

論曰國朝罷中書省專任六部治政聖謨深遠起出前古當時尤慎簡六部之長欵其練習庶務俾三歲更迭為之後既不行有缺止於轉遷而已百餘年來政事舉息則存乎其人若其間或稍自振迅衆輒相顧篤以為立異故東漢時在位者多清確謹畏循常襲故之人其弊必至取媚於時如胡伯始而後已如文毅公為人挺然任事不少還忌其亦有大臣之風者哉

馬少師小狀

代其子作

王尚綱

琇先君壽八十有七以今年八月六日卒於家嗚呼  
痛哉其尚忍言蓋自景泰二年進士歷任監察御史  
按察使大理卿左右都御史侍郎兵部尚書轉吏部  
終少師兼太子太師凡一十七任計五十四年自先  
君而上父祖曾祖妣俱蒙 恩贈如其官歷事  
五朝受知 四帝忠貞之節可質鬼神學術勲勞載  
在 國典出處履歷之詳今在人耳目間而年譜亦  
存其槩其間遭讒罹垢出入起仆或際險臨危事變  
叢籍出萬死於一生然 國恩深厚而犬馬之報亦

自無遺力矣七十以來累疏求退不蒙 允肯已而  
先皇晏駕未忍言歸 主少國疑平生至慮夫何改  
元時事維新群奸媒構排擠乃乞休章凡再上猶荷  
聖明重念老臣勅賜舟車仍令有司供養今 勅旨  
并 累朝者計六十五通具存可考已柰以孤直不  
阿尤為逆賊所深啣假緣他事傍及中以慘禍四代  
誥封一時追取反指 先朝止人為黨奪爵為民如  
琇者亦 先帝賜官錦衣擯出外衛嗚呼尚忍言哉  
先君歸獨村居不入城府每嗜靜坐語及時事感額  
不卷北望 皇陵焚香流涕逆知其有今日也久矣  
卒之日州人魚老少貴賤爭往弔哭爰有三異劉山  
忽崩天鼓再鳴群鶴引輿州人王自誠者又晝見於  
葉縣之南固知大臣終始實關於天琇為人子恨不  
能啗逆賊之肉耳顧不肯罪宜萬死嘗過庭聞命曰  
幸生中土唯無愧嵩高之氣乃休伏惟 執事伊洛  
正學 國史直筆先君所推重者也敢乞 撰述誌  
銘以示永久亦不敢過求溢美以重不孝之罪謹以  
傳二冊年譜四本隨 上用伺 採覽無任哀懇之  
至

柱國少師兼太子太師吏部尚書贈太師謚端  
肅馬公傳

馬文升字肩圖河南鉤州人也景泰辛未進士授監  
察御史兩按山西湖廣有聲天順癸未陞福建按察  
使鎮守中官擾民輒繩以法滿四反起為右副都御  
史巡撫陝西與都御史項忠會兵討之生擒滿四捷  
聞陞左都御史時漢中李胡子潼關大竭兒滿城王  
彪各聚衆劫殺悉剪除之壬辰虜寇臨鞏文升督兵  
追之黑水口生擒平章鉄烈孫斬首數千遂陳時政  
十五事及禦邊三策尋命節制三邊北虜寇固原及

好水川檄召諸路兵按伏湯羊嶺伏殺盡棄輜重遁走擒斬二百餘人因改其嶺為得勝坡勒石紀功焉乙未召為兵部右侍郎適遼東有警命往備之制五花營八陣圖以訓士卒復上禦邊十五事寧陞左侍郎食二品俸戊戌建州女直復叛巡撫都御史陳鉞劾誘殺進貢夷屬以掩已罪上命文升再往時太監汪直亦奉命巡邊陰主鉞議邀文升偕行弗聽先馳赴其地招撫黑鎖忒等二百餘人比直至虜已解散無所獲深啣之而陳鉞者戎裝郊迎除道設供張甚備見直叩頭屈膝跪文升獨與抗禮鉞復厚賂直

以傾文升直還奏文升不與虜農器以啟邊釁而言官復劾越激變事情詔刑部尚書林聰同直同往勘一如直言遂逮文升下錦衣衛獄文升言竇禁兵器非農器也竟謫戍重慶直敗詔復文升官致仕甲辰起為左副都御史巡撫遼東弘治改元召為左都御史掌院事上耕藉田文升與行九推禮時教坊司以雜劇承應或出狎語文升厲色曰新天子當知稼穡艱難豈宜以此瀆亂宸聰邪即斥去之二御史以糾儀下獄文升言即位之初不宜輒罪言官遂獲釋哈密忠順王先為土魯番酋鎖檀阿力所擄併奪王母

金印鎖擅死弘治四年其子阿黑麻以金印城池來  
歸守臣以聞文升請立元之遺孽陝巴者以封忠順  
王以主哈密未幾阿黑復虜陝巴及金印以去文升  
時為兵部尚書請以阿黑麻所遣入貢馮亦滿速見  
等四十餘人皆安置閩廣閉絕貢以孤其勢而阿  
黑麻復遣牙蘭據哈密文升請勅肅州副總兵彭清  
統番漢兵襲牙蘭牙蘭遁走追剿六十餘人阿黑麻  
遣使謝罪入貢併以陝巴金印來歸遂復哈密建州  
夷當伏加謀叛械繫京師巧辯不服文升徐以數語  
折之遂寃海南戊午春皇太子出閣加少保兼太子

太僕傳文升上疏曰太子國之儲貳天下之本宜擇  
老成純謹之士以咨啓沃不宜雜以浮薄恐虧損聖  
德上欣納焉虜酋火篩寇大同威遠京師戒嚴上親  
洒宸翰賜以尚膳召文升至便殿咨戰守之策因舉  
保國公暉等練兵以待且令各邊謹斥堠修戰具  
虜知有備遁去轉吏部尚書上召至煖閣面諭曰明  
年天下諸司朝覲卿務用心訪察大彰黜陟之典文  
升對曰聖心求治如此宗社之福臣敢不盡心以圖  
報稱仍命中官扶文升下階乙丑考察大朝官員法  
去不職者二千餘人人無異議正德改元太監王瑞



以大婚禮欲用儒士七人篆刻番字文并不從給事  
中安奎言宜聽文升言瑞慙憤誣文升抗拒賴大臣  
力救得白會兩廣缺總制被薦者不樂於外乃嗾御  
史劾文升文升求去疏凡二十一上未幾致仕卒贈  
太師謚端肅表哀曰敬皇帝之末年也勵精綜核寤  
寐俊髦鈞陽馬公實秉衡鑑六曹之長皆民譽也下  
至百世濟濟可觀是以士敦恥讓俗返淳樸衆賢和  
於朝萬民和於野雖成康文景之際蔑以加矣

太子少保吏部尚書致仕贈太子太保許公神

道碑銘

李東陽

有居大官當重任仕而人望之退而人慕且為之沒  
而人惜之若不盡其用者是惡可彊合幸得蓋必有  
所繇政即而觀不待接其言考其世其人可知也若  
河南許公固可誣哉公諱進字季升舉成化丙戌進  
士擢監察御史出按甘肅山東風裁卓卓都御史陳  
鉞附太監汪直啓釁遼東為御史強珣所劾公亦率  
諸御史論之珣被逮謫戍公與凡劾鉞者皆奪俸三  
月遷山東按察司副使監鄉試事有欲私貴家子者

執不從東昌有武官子懷金挾一儒生飲于酒家是  
夜被殺有司疑生所為備極拷訊生誣服公徧閱商  
曆見酒家以殺之翼日買布數疋訊之遂伏辜弘治  
戊申遷廣西按察使未上擢都察院右僉都御史巡  
撫大同贊理軍務上遷事數條北虜入貢驕詐百出  
公嚴為節制遂不得逞武邑王聽沐不律公奏置于  
法降為庶人又奏監石岩岩誣公擅用旗幟降知充  
州府甲寅遷陝西按察使虜犯西陲復命公為左  
僉都御史巡撫甘肅吐魯番世讎哈密遣部酋逐其  
王入據其城久不復公與都督劉寧輩出調赤斤罕  
東諸夷為聲援冒雪夜進城中人從亂者餘八百登  
臺自保公諭使下或欲盡屠之公不可乃止丙辰以  
功遷右副都御史巡撫陝西不屈權貴召入為戶  
部右侍郎刑部主事鄭岳下獄不以罪公疏白之羣  
見公會奏修省數事庚申虜入大同命兼左僉都  
御史提督軍務與平江伯陳公銳出師進巢陳以無  
功獲譴或因以累公遂令致仕歸數年廷臣論薦者  
數十疏乙丑今天子即阼召為兵部左侍郎督團  
營兵馬進尚書賜蟒衣三襲正德丙寅公上疏請勤  
聖學戒遊逸改吏部尚書賜玉帶加太子少保

方逆瑾擅政事多齟齬時傳公議瑾寢不能容乃以  
署員外郎再署郎中者誣為非制謫令致仕又以公  
嘗薦雍泰為失當除其名而怒猶未解又摺其在大  
同時嘗籍軍丁出銀雀後為典守者所剋故苛為  
稽察因以中公幾至不測事未結而瑾敗朝廷用  
言者復公官仍致仕而公已卒矣乃贈公太子太保  
遣官諭祭命有司治葬事為公器宇魁岸負抱甚  
偉論議洵出若無不可為者法尚嚴峻凡有請託多  
拒不行見者敬而畏之顧性孝謹嘗被庭訓撻指出  
血後每舉指示人輒感泣不已事二兄禮敬不替家  
素饒而自奉儉約至于老猶然所著有憲臺奏議平  
番始末東崖稿東崖者其所自號也公生正統丁巳  
某月某日卒于正德庚午八月十八日壽七十有四  
以辛未某月某日葬其地在城南石觚山之北麓娶  
夫人張氏生子詔鄉貢士早卒繼夫人高氏誥生舉  
進士擢戶科給事中改翰林院檢討調全州判官讚  
亦舉進士擢監察御史改編修調臨淄知縣記詩皆  
縣學生詞論亦業舉子曰誌者側室翟氏出也女三  
其婿曰浙江按察司僉事楊惟康縣學生普曰利國  
子生趙忭孫乙儒舉鄉貢士次佺備佩備偕位女孫

二公高祖行五曾祖仕信皆不仕祖實安定縣學教  
諭考聚皆以公貴贈資善大夫戶部左侍郎祖妣某  
氏妣某氏皆贈淑人其上世譜逸莫可考一日於瑩  
域地得許公墓誌稱隋楚州刺史法光唐譙國  
公相圍師又五世為同州刺史八世為宋端明  
殿學士簡其子東遷長安又四世為金兵馬都元帥  
威西征過靈寶愛其風土始居焉又再世為元百戶  
玉則五之考也於是許氏之世系繁然後完人皆異  
之公且葵諾至京師奉禮部右侍郎李公希賢狀請  
予銘銘曰

陝重周甸地分東西西有在關山川岷奇代生偉  
人出為世用屹屹薛公有威南種肅肅內憲嚴嚴外臺  
有劇必折靡強弗摧赫赫天曹百官是統震撼擊  
撞有鎮無恐仕我已我其機在人不然不尤在我  
者存明揚在廷嘉遯于野既老而傳非徒壽者  
膏之沃矣有輝其光維源之深其流則長物則有然  
於人為大我最公名昭于一代

太子少保吏部尚書贈太子太保謚襄毅許公

神道碑

崔銑

許氏系出周文叔傳至許伯爲楚人後世遷同州再  
遷長安由隋唐來至金元代有聞人景貴封譙國公  
及相唐高宗詳在家乘金時諱威者爲兵馬都元帥  
始居靈寶傳七世爲教諭聚取何氏正統二年丁巳  
五月三日生許公諱進字季升號東崖甫十歲通小  
戴記遂以是經舉成化丙戌進己丑授監察御史再  
遭母喪乙未始出按甘肅岷州土人利番夷貨潛相  
結姻夷因之爲寇公相險要設橋寨分兵防守又諭

令罷姻邊乃寧故大司馬河州王紘族子誣奏其不法公辯而明王公不致謝公亦無問遺云戊戌按山東叅政某役聞夫修華陽宮爲燕遊所費又巨公劾罷之革濟寧諸閹濫後夫三千人自究治貪吏豪徒餘望風奔息己亥還京掌三法司事巡按遼東御史強珍劾倖閹汪直妄殺建州夷冒賞兵部阿附奏行直誣懇珍詔逮珍下詔獄公抗疏伸珍擊直珍竟戍遼陽公奪俸數月道士以黃白術干湖廣總兵李經不售誣首經潛招夷軍爲亂直奏逮李氏百口至京已成獄 憲皇恐寬之改命法官讞衆皆惴辟公列狀以上卽日磔道士于市戒戢直緝事者直百計害公無從偵隙壬寅八月滿三考晉山東按察副使瀕行却李經饋謝千金癸卯監秋試諸使置貴臣子于第公堅守不可止東昌武人兇懷金與所厚生飲肆中及暮散武人兒被殺且無首官坐生罪已誣服公察生不類凶人私計必酒人所爲貧人得銀必易物遍閱商屠酒人以殺之次日易布一訊而得內首空桑中弘治戊申正月晉廣西按察使二月晉右僉都御史巡撫大同北虜小王子欲寇邊先以千人暨馬千匹入貢公請帑金二萬兩供費浹恩而飭備計

計沮而罷庚戌虜入塞列營三十里號六萬公因事  
發謀中厥理緒馬行係帚於尾塵翳障天烽火日夜  
相然比虜解不亡一鏃云劾奏鎮守中官石爨貪暴  
反被擠辛亥左官兗州知府蒞事寬簡或問何乃異  
習日之嚴公曰彼為法官茲則有司彼不知者將謂  
予柔或虐下法否亦曰憤悶不堪甲寅十一月晉陝  
西按察使乙卯甘涼虜患孔棘 孝皇命大臣往治  
弗任以公為僉都御史巡撫甘肅初 文皇招降哈  
密封脫脫為忠順王羈縻番屬捍御西戎後與吐魯  
番為讐其頭目牙蘭老向機警率眾謀殺哈密都督  
虜其王陝巴占據城池阻塞諸番貢路掠至瓜沙哈  
密遣夷羈任苦峪故邊患幾歷二紀公曰以夷攻夷  
古云良策遣辯士說罕東赤斤小列秃野七克里宣  
布朝廷 威德加之犒賞厚撫苦峪遺夷俱願效死  
十月公以總兵彭清將兵七千出嘉峪關路調赤斤  
罕東諸番為聲援清率所部及番兵之半深入二千  
里攻哈密故城克之斬吐魯番數百級牙蘭夜遁獲  
脇從者八百人總兵劉寧欲盡戮之為奇功公曰此  
卽吾人奈何殺之矧吾來此綏緝是務豈計功伐邪  
令隸遺夷同置故城給牛種耕器連結罕東諸夷以

相援離吐番之與夷孤其勢西域遂定丙辰八月進  
副都御史九月 詔巡撫陝西時巡守官鮮克敏事  
公今日籍所理每季稽其實太監劉瑯恃援恣橫公  
數禁之一日同舟泛波擯責其惡瑯不遜公奮拳擊  
之墮瑯水中丁巳 召為戶部右侍郎太原周文端  
公為司徒協恭合力大釐國計朝政不便者上章諫  
爭罔限所掌 孝皇仁孝恭儉禮賢容下每痛 孝  
穆太后上僊求其族不獲乃施恩后家但益其富弗  
假政權而公及文端公志全 主德嘗上言 東宮  
親王則例每歲徵銀三分獨以五分厚戚氏是恩有  
偏施例為徒具民為君之子今以立聰等田賜戚氏  
雖蠲原稅非聰等心實同奪之業乎庚申春 命勘  
河間戚氏莊田事竣抗疏言實皆民間內糴養馬者  
宜令照舊管業不得行四月 命兼僉都御史提督  
宣大軍事貴臣子弟從軍倖功者不樂公嚴大造飛  
語六月降 旨師老事拘勒令致仕自後羣臣薦章  
凡四十有八乙丑六月 武皇即位始召公遂晉兵  
部左侍郎明年丙寅四月始詣闕五月晉尚書疏勸  
武皇敏學止遊師古仁聖君而戒彼荒淫者一京  
衛官以賄來求公堂杖數十權要請討非格咸報罷



數上言京軍工役之苦且曰永樂間大建宮殿定撥  
班匠十萬借撥軍匠數萬今爲內臣占令內錢運灰及  
磚罪人罰贖奈何以軍士當之十月初閣部臺諫共  
劾閣永成八人道 上盤戲請誅之期在必克公語  
同事曰此屬得踈斥足矣果浚其事恐有甘露之變  
是月十日午刻太監李榮左順門傳 旨召部院大  
臣榮曰此屬上少所親倚今亦無大過奈何寘諸死  
此屬日夜牽 御衣環泣 上爲罷餐諸臣錯愕莫  
對公曰 上富於春秋方當講學恢 先帝之業乃  
爲此曹所誘逸夕成荒何謂無罪榮曰 上行遣之  
諸公第歸幹國吏部侍郎王公鏊曰如不遣將復留  
土左右邪榮入是夜內閣劉文靖謝文正致仕明日  
逆瑾出管司禮文臣慘禍徃徃自殺十一月晉吏部  
尚書已加太子保公直聲久著風裁俞峻御史某滿  
三考及中某員外郎某某偕結奧援必覲京秩公一日悉  
外補郎中某賂閣永成乃斥守黎平郎中李達忤太  
宰出守夷方乃改杭郡工侍某同公里閑託閣榮求  
改吏部公對衆面語之曰君年尚未秩已不卑循資  
而徃不憂不貴乃託斯人速化乎逆瑾銜公日甚而  
輔臣畏其沮格所私積怒業謗乃起安定張綵入文

選冀間公戊辰七月推署員外郎劉吉爲署郎中舊  
典也瑾謂公越選法矯旨令致仕又摘公推薦雍  
泰爲謬削爵爲民公二子在翰林者調外任庚午三  
月瑾及其黨造獄必覆公家公不懼徐曰吾於國罔  
功焉敢責得於天然反心不欺豈竟殄世於彼秋感  
疾八月十有八日終于正寢享年七十有四九月瑾  
伏誅詔公致仕已遣官營葬贈太子太保嘉靖五  
年冬席文襄公在禮部覆議御史陳克宅陳察奏謂  
公行應謚法賜謚襄毅公配張氏先卒繼高氏俱  
贈封淑人子八人詔舉人先公卒誥吏部右侍郎讚  
戶部尚書記詩舉人詞誌論戶部主事女三人壻右布  
政楊惟康普曰利趙汴孫男十人某某女二人正德  
初銑在翰林讀中祕書親見公事戊辰銑叨充史官  
叅對孝皇實錄補續缺遺分蒞戶館閱公及周文  
端公封章每彈指太息曰斯謂古之遺直世之標表  
公爲兵部時次子誥爲左給事中讚爲御史成典大  
臣不得任子爲諫官詔用耿清惠父子例改給事爲  
檢討御史爲編修二君仕已十年明直清約名出縉  
紳然公家庭之語不許及改故銑今敝述有二君未  
致詳者銑在後渠與子弟門人高擁古今相業僭評

公德有四曰昌言直道推賢敢爲公心賢長安雍泰  
數以已官讓之公平審自有記他所贊揚已盛茲獨  
掇其係時運切治體者云爾銘曰

奕奕大許維周之裔培根枝遂維百斯世爰發厥  
祥公降適期豈挺孤操幸賦宏才峨峨憲府堅秉  
大法何奸不擊何節不發虜毒斯蜂擾我朔方公  
底定之治險成莊爰貳邦教賢長協圖月上危言  
曰際明主陳力靡績返服東厓有截其壁公立與  
偕再召而起資總文武百僚仰公爲周吉父權闔  
扇虐如林斯焚我持一心可事百君世之趨競公  
辟如汚世之憚棄公履如途震不及躬天克有定  
懔懔來嗣佐我嘉靖

太子少保吏部尚書贈太子太保謚襄毅許公

墓碑銘

張邦奇

天將隆一代之治必生正直敦固魁碩之才以障頽  
興圯威德被於夷夏而慶澤流於子孫壯節完名豐  
功峻秩又以照耀歌動於無窮若河南許襄毅公擅  
極盛於今日固惟天意有在而其自力以動天者則  
殆非一日之積也公墓在中條黃河之南涯當蒿華  
之間大學士李文正公既銘諸神道而南于墓若干  
步焉關洛衝途過者率延佇瞻望不能去於是公子  
少保吏部尚書松臯先生復樹碑其地以慰過客之

思而屬文於邪竒謹叙其大畧而系之以詩公諱進  
字季升別號東厓舉成化丙戌進士擢監察御史巡  
按甘肅山東舉刺無所避先是都御史陳鉞附太監  
汪直妄殺人冒陞賞御史強珍劾直逮繫詔徵公率  
諸御史論之珍謫戍公奪俸三月直又聽讒奏逮  
總兵李震百口坐以謀逆公以寃聞得釋而直怒滋  
甚乃以章疏字訛奏公被杖幾殆秩滿九載擢山  
東按察副使監鄉試事有欲私貴家子者執不從有  
武官子懷金挾一儒生飲于酒家其夜被殺有司疑  
生而為生不勝拷掠自誣服公意酒家殺之乃檢商  
曆見其以殺之翼日市布數疋一訊立辯弘治戊申  
遷廣西按察使尋擢都察院右僉都御史巡撫大同  
督理軍務會北虜入貢桀黠百端公悉心經畫前後  
上五十餘疏隄備整密而遇以恩禮虜卒畏服劾太  
監石岩不法岩誣公擅用旗幟降知兗州府甲寅遷  
陝西按察使西陲告急復命公為左僉都御史巡  
撫甘肅吐魯番世讐哈密遣部首逐其王入據其城  
因挾求為王公與都督劉寧輩設方畧調夷兵深入  
二千里直抵哈密奪其故城城中人尚餘八百劉寧  
欲盡屠之以益其功公曰戮脅從何以懷遠且得城

無人城誰與守乃止丙辰以功遷右副都御史巡撫  
陝西法令峻整權貴斂戢召為戶部右侍郎刑部  
主事鄭岳下獄非其罪公疏白之庚辰虜入大同  
命兼左副都御史提督軍務與平江伯陳公銳出師  
進勦陳多携貴游子弟號為參隨凱幸功賞公痛為  
裁抑為近習所不悅已而劾奏總兵官畏縮玩寇有  
旨以公擅劾將官不與監督總兵同議遂令致仕  
歸數年廷臣論薦數十疏乙丑召為兵部左侍郎  
督團營兵馬進尚書賜蟒衣三襲正德丙寅命  
侍經筵因上言請勤聖學戒逸游改吏部尚書公

取人先節行後才藝而於抑奔競杜請託尤嚴每銓  
選考畢即以名第量所授官職判定卷面雖有貴勢  
請托不得復為上下蓋部中至今傳以為法劉瑾之  
竊柄也素服公清嚴不甚撓公政有忤公者諸諸瑾  
瑾不能容會有署自外即陞署即中者瑾謂非制謫  
令致仕又以嘗薦雍泰為公罪除其名而怒猶未解  
捃摭茫昧將重害公事未竟而瑾敗朝廷用言者  
復公官仍致仕而公已卒矣贈公太子太保遣官諭  
祭命有司營葬事然謚典未頒輿情不平章奏  
屢上皆格不行幾二十年而言者不已至嘉靖丙戌

禮部尚書席文襄公上疏極言詔謚襄毅公魁岸莊  
重人望而畏之至其誨掖後進持身治官之法平正  
簡要士有佩之終身者性孝謹嘗承嚴訓撻指出血  
後每舉指示人輒感泣不已事二兄禮意不替所著  
有憲臺奏議平番始末東厓稿生正統丁巳五月初  
三日卒正德庚午八月十八日壽七十有四以辛未  
月 日葬娶夫人張氏生子詔領鄉薦早卒繼夫  
人高氏生子誥舉進士擢戶科給事中改翰林院檢  
討累陞侍讀學士國子祭酒南京戶部尚書次即少  
保名讚舉進士擢監察御史改編修累陞戶部尚書  
改吏部加少保兼太子太保記 詩前軍都督府都  
事詞舉進士累官南京大理寺寺丞論 曰誌者側  
室翟氏出也女三壻曰按察使揚惟康普曰利光祿  
寺署正趙忬孫入儒領鄉薦次任備佩備皆位與右  
軍都督府都事女孫二公高祖行五曾祖信皆不仕  
祖實安定縣學教諭考聚皆以公貴贈通議大夫戶  
部左侍郎祖妣焦氏妣何氏皆贈淑人後以少保貴  
并公三世並贈光祿大夫太子太保吏部尚書祖考  
妣暨公配張高二夫人並贈一品夫人許之先周武  
王封四岳伯夷之後文叔子許遂焉姓唐宋以來世

有顯人元兵馬都元帥威西征過靈寶愛其風土遂  
居焉靈寶之有許氏自茲始公剛方止大之氣獨稟  
於國家全盛之時而見於豐豫多故百挫不回之  
日不惟享祿位名壽以終而子孫保之久而彌盛人  
無智愚遠近亦愈久而不能忘焉此其可以容心得  
我乃作頌詩揭以示之其詞曰景運重熙河嶽氣完  
鬱律磅礴公稟其全如山如河氣貌偉然論議湧發  
志操貞堅國有大艱輒公是寄公曰在予治如家  
事剪亂興滅折萌塞兌九邊雄畧允以勞勩見義必  
為匪身是圖嶮巖萬狀惟吾坦途秉政銓曹善類是  
扶元氣是護群邪興妬完璧以歸卒孰予侮古活千  
人子孫蒙祉公所全活殆萬生齒屹屹壯節振頽起  
靡淑我人心永以不死植德孔覃獲慶胡涖皇明  
立賢百七十祀屈指數姓尚書父子公位冢卿績維  
厥嗣南北司徒伯仲偕止凡今宦族孰媿其美世翊  
邦家其來未艾於赫公休於昭帝眷嵩華夾翼河  
洛交會過者必瞻公墓在斯



太子少保吏部尚書贈太子太保許公墓誌銘

劉忠

資德大夫正治上卿太子少保吏部尚書許公以

疾卒于家訃聞京師朝之大夫士無大小咸曰公一代偉人也方將冀其復用以終天下之望而乃遽至於不可起矣可惜可惜未幾其子誥持禮部侍郎李希賢狀來請銘予辭之不得乃叙其事而銘之公諱進字季升號東崖姓許氏河南靈寶人系出周文叔至隋楚州刺史法光生唐譙國公紹紹生圉師為左相圉師生力士洛州長史力士生欽寂欽寂生輔乾

海東慰勞使輔乾生昭戶部尚書昭生經同州刺史  
因家同州經生克一克一生田田生承宣宋給事中  
承宣生待用國子博士待用生巨圭舉進士巨圭生  
宗都官員外郎宗生才舉進士贈少傅才生簡端明  
殿學士簡生東遷長安東生祥祥生佐金大定中進  
士佐生炳管軍千戶炳生威兵馬都元帥因西征過  
靈寶愛其風土遂居焉威生本本生玉俱百戶玉生  
五五生九九娶何氏生仕信仕信娶陳氏生實實娶  
焦氏生聚為安定教諭即公之考也娶何氏公十歲  
安定授以禮經即能通大義天順壬午領鄉薦成化  
丙戌舉進士授監察御史按甘肅山東俱克樹風裁  
時中官汪直妄殺建州夷以冒功御史強珣劾之直  
誣奏珣逮入獄公具疏劾直人多危之已而得旨  
珣謫戍遼左公得奪俸又劾奏直黨且發直鍛鍊之  
獄憲廟是之遂禁緝事官校直怒欲中公無所得  
乃摘公章疏中訛字奏之杖於朝幾殆壬寅擢山東  
按察副使嘗監臨鄉試同事者欲私一貴介公堅不  
可乃止東昌一武弁子懷金與所厚生飲于酒家暮  
散武弁子被殺有司執生於官不勝拷掠即誣服公  
知其寃且意此必酒家也又意其人得金必易貨乃

通召邑商人閱其私曆見酒家以殺之次三日易布  
數疋一鞫即服焉弘治戊申遷廣西按察使未幾擢  
右僉都御史巡撫大同贊理軍務屢條陳邊事多從  
之武邑王聰沐兇縱不檢公奏黜為庶人又嘗劾中  
官石岩貪暴誣奏公擅用旗幟遂謫知兗州府甲寅  
遷陝西按察使時北虜大寇甘涼仍命公為左僉都  
御史巡撫甘肅議處得宜屢有斬獲哈密與吐魯番  
構隙其酋牙蘭逐忠順王陝巴而據其城池為患幾  
二十年公乃統軍至肅州命總兵官出嘉峪關調赤  
斤罕東等處兵為聲援赤斤等素感公之恩樂為之  
用遂直抵哈密克復故城城破之日城中人為牙蘭  
脅從者餘八百人聞兵至懼誅登高臺不下公開諭  
之始下當時有欲屠之以圖功者公不從卒得全活  
丙辰遷右副都御史巡撫陝西丁巳召為戶部右  
侍郎賜誥進階通議大夫贈祖考妣考妣配張氏繼  
高氏俱如例復廕一子為國子生刑部主事鄭嶽無  
罪下獄公為疏雪之彗星見公與周司徒合詞言宜  
加脩省明用舍省糜費等數事庚申北虜寇大同  
上命以本官兼左僉都御史提督宣大諸軍事法令  
嚴峻不避權右嘗劾一將官不奉法不便者多巧構

之遂令致仕既歸築東崖精舍日徜徉其中若無意於世者而廷臣論薦凡四十餘疏弘治乙丑起為兵部左侍郎提督京營兵馬尋進尚書賜蟒衣公感恩遇上疏勸上勤學問戒遊逸上嘉納之每操練軍旅必指授方略各邊事亦處置周悉凡權貴請托者多不行未幾改吏部尚書賜玉帶加太子少保階資德大夫正治上卿賊瑾專政與公不協乃誣以他事致仕去之日朝士咸加嘆惜甚至有垂泣者久之又令冠帶閑住庚午八月十八日卒于正寢享年七十有四卒之時聞空中有聲如雷先數日有流火入宅蓋不偶也瑾敗朝廷用言者復公官賜祭塋贈太子太保子男八曰詔張出舉人早卒曰誥給事中改檢討出為全州判官曰讚御史改編脩出為臨淄知縣日記曰詩邑庠生曰詞曰論俱高出曰誌側室翟出女三一適浙江按察司僉事揚惟康一適生員普曰利一適國子生趙忭孫男七曰儒舉人曰佺曰甫曰佩曰爾曰偕曰位孫女二公資幹魁梧器宇偉岸見者不能不為之起敬早歲肆力於經史作詩文春容典雅性至孝嘗承安定公庭訓撻指破後每舉指輒感泣不已事二兄敬愛兼至家素饒裕而自奉儉

約歷官垂四十年水蘖之操始終如一日晚年退而不用用而未究人以為歎然祿位名壽兼備子孫蕃衍科第不乏天之所以報公者未有艾也所著有東崖集憲臺奏議平番始末諸作正德辛未十月十一日塋于城南之一里石嘴山北麓先是公自五世祖以上譜牒落莫無可考偶一日於瑩域隙地得一石備載于上或神相公之德而不欲泯沒其先世之幽潛故為出此以昭異之耶銘曰

於惟我公維國元老維文維哲星麗于昊維正維直蕩蕩周道公在邊陲西北用保勇茹強禦鬼蜮爰掃鑿識幽隱煩寃以澡名流區宇氣凌峰嶸公生嵩洛地不愛寶公隨物化乘箕天表石山之麓寔維公兆佳氣鬱鬱山水環抱廕茲後昆萬世是

紹

太子少保吏部尚書西麓張公行實

張維

弘治庚戌西麓登進士觀政都察院丰采談論掌院  
掌道甚雅重意欲選道忽授稽勳主事莫知所由到  
任將半月議事後堂冢宰三原王公曰子西北孤遠  
憲臺諸公皆屬意今番本部觀子動靜不凡益著力  
異日吾此位不難到也西麓驚感知愛一切檢點寒  
門自先祖司徒翁去世遺書無基西麓舉業外自未  
他及且不經師傅自此潛心典籍寢食俱忘同僚於  
孫九峰喬白巖皆一時文士旦夕相與殊不覺其寡  
學然天資極高後造詣烏深上下嘆服甲寅北虜寇

甘涼回夷亦不靖飛報甚急京營統兵者欲便已私  
本兵偶未察遂上請選軍三萬西征西麓庶得其情  
上章歷陳邊務指畫經畧曲盡防禦之妙雖元老夙  
將皆歛衽嘆訝且言西北民疲恐徒勞無益兵乃止  
尋報虜退人多其先識聞望歸然次年調文選主政  
戊午轉勳員外先是禮部正郎和順王公雲鳳因劾  
太監李廣請守陝州廣事敗西麓奏言王公有曲突  
徙薪之見李廣罪惡既著雲鳳功不可泯僚儕皆為  
西麓危時論甚壯之未久王公有提學憲僉之擢後  
歷官祭酒都憲觀介冠世為時聞人錦衣當該吏率

先重賂衛使坐名口取或殊筆書吏名校尉掌臚聞  
彼此因襲恬不為異西麓任驗封司郎中該衛仍循  
故事片回其尉曰撥吏固細事朝廷體面難遽廢吏  
果缺具印信手本勿指名任本司撥送若刑名書寫  
不及所指者聽吏易衛使怒曰彼欲存體面我獨不  
念那從來舊規何敢乃爾命尉輩多方伺察欲甘心  
焉時有吾道中人為彼僚力勸少抑西麓堅持不移  
後竟如所言迄今相承不奈有某伯薛其性者原無  
世襲字樣父祖皆蒙繼西麓稟堂極言賞罰大權祖  
宗懸以示勸懲毫髮容私為害匪輕欺上罔下罪不

容誅遂車爵止授指揮其家曾以金珠數千命人假稱同年饋茶見西麓即叩出尋欲送官追不及乃罷冰蘖之聲膾炙人口故考滿考語有云潔白之操經濟之才悠久銓曹允稱時以為名言西麓入庫見堆積寫完誥勅幾千軸查係永樂天順以來未經闕給者即奏言在朝廷視為棄物於臣下誠乃至寶或因本官身故或因去任家遠或因子孫孤寒日積月累以致如此若不曲處年久損爛可息請出查明鄉貫省令或便賚給付庶皇恩渙汗乎遐邇綸綍不終於廢閣故家舊族被息澤者甚衆孝宗皇帝時詔大臣

面議朝政上問大司馬劉大夏曰近來天下軍民貧富較之往昔何如對曰富不及貧則過之上曰先朝因重寶玩未免勞費近痛裁一切不及何尚如此必有司不得其人歎有司得人全在吏部今吏部何如劉叩首曰誠如聖諭近文選司郎中張綵儘可用因人求退上默然後本部查覆劉給事中奏本奉聖旨劉准所言你們既已分析明白了張綵著照舊用心辦事欽此西麓自念蟻虱小臣誤蒙聖眷遂勉出供職矢心圖報科道文章推薦生長邊方諳達邊務堪任巡撫公卿會議僉以為然正德元年因感時事懇



乞養病跡連五上本部覆稱文選清吏司郎中張綵  
年力精強才識可用今既執稱有疾合無暫令回籍  
調理待病痊之日有司奏來取用本部或照多官會  
議事例如遇邊方有急相應員缺往自推舉丙寅回  
籍巡撫陝西都御史楊公一清奏保閉門却掃足跡  
不入城市才識優長堪任都御史戊辰春劉瑾傳旨  
搜求各官無病詐稱有病欺心隱忍吏部通行查出  
從重究治原籍有司恐禍及其身遵吏部原題病痊  
奏起事理具本上請時瑾有任用鄉里之意見本問  
內閣諸老多舊知堂上遂力薦仍任文選七月十七

日朝見自瑾當國但初到官朝後隨即由左掖門至  
河下候見不敢少遲西麓不知即出到部冢宰許公  
問曰自河下來矣西麓曰何謂河下公備告時事西  
麓曰本不欲得來片回萬幸公因瓜葛素知剛硬恐  
致禍再四婉言教慰已五六日西缺知府公曰此瑾  
本府宜先告之可藉此有其意西麓念父母在堂家  
遠子幼又不能終違公意之雅及進瑾迎笑曰好鄉  
里好鄉里外官不知事體朝後即來河下知者謂各  
官要來不知者謂我好如此鄉里不來最是出告公  
公曰不致彼疑怪便好後西安守陳天祥乃見瑾喜

曰且不要調才調只此像表真做的箇父母官可見  
張公善用人因此凡推九卿方面照舊規常見每見  
輒厚待冬吏部遵照孝宗之旨推陞右僉都御史適  
合水韓公昇陞戶部侍郎同日謝恩韓年老腿弱起  
而復仆又吃吃不能致詞各張魏馬革群後屏曰劉  
哥用的好鄉里瑾心甚惡西麓當其次瑾強謂曰公  
等看這箇何如西麓長髯哲面偉軀洪聲且從容中  
節朝宇聳觀魏馬革復揖劉曰若此人真不負所舉  
好男子好男子嘆顧移時及西麓見瑾已預酒殺久  
待挽坐歡笑竟日且曰非都憲我顯被老韓羞死矣  
自此日愈加厚嗚呼忘身敗家之禍孰謂不基於此  
乎似此機會蓋有鬼神所不可測人之智慮安能及  
哉當西麓陞都察院之日正值劉宇轉吏部之初選  
法懵然又高抗不肯下問任意填闕以致遠近不倫  
資格顛倒怨詈遂蜂起羨慕西麓者萬口同聲訪察  
官校遞相告瑾曰自張郎中陞去吏部不成衙門故  
未兩月即有侍郎之轉既到任西麓恪遵舊規毫釐  
不敢挽預而人之怨謗猶昔瑾怪問文選方知侍郎  
不干部事之例遂轉尚書西麓甚不自安無顏面出  
入班行此心此情惟天日可鑒誰復可告誰復肯信

今已破敗到此言之何益但表其不得已之故於世  
云爾未轉之先西麓再四懇辭願贊襄劉宇不致廢  
事否則寧甘回故里決不敢冒受此舉任平生而盡  
棄瑾厲色曰你要回藉父母妻子團圓我却分在五  
六下裡有何難處獨不見錢強各家我為朝廷用人  
又不曾徇私要錢何故力阻太祖用布衣做宰相皂  
隸做知府今以二十年名進士做尚書有何不可只  
要做的起遲驟我不管西麓恐禍出不測遺老親之  
憂不敢再言復自擔曰但持廉秉公答報朝廷或可  
轉移其機少息衣冠之禍百凡付諸天耳况仕不擇

治亂古昔同然若不哭孩子誰不會抱正在難處而  
能處乃見所養惟恨力量不逮耳由是隨事解救略  
不敢顧及於私老父老母洎賤兄弟閉門敝廬無一  
人在京惟恐招人指謾實欲撥亂反正轉禍為福效  
古豪傑以立斯世豈意正不勝邪竟得罪出意料所  
不及悲夫西麓堅辭尚書既不可得強抱到任後瑾  
及谷大用張永等八黨陸續差人賞帖照依往時囑  
託西麓面諭問其姓氏遣去固不峻阻亦不即行月  
餘後有復來催者亦婉辭荅回延及兩月各有數帖  
西麓乘瑾諭政浹洽之際乃言曰某不才荷維持蒙

朝廷重任日夜懷愧恐上負聖恩下乖人望愈不自  
安但諸內相請謁頗多不從必招怪恨後則公議盡  
廢小人得志天下受害且未面請真假難辨瑾曰自  
榮任後有相知來央煩者俱却回不意他們尚如此  
西麓曰明公亦有帖正猶豫未得瑾曰安在遂出袖  
中瑾怒曰時常相見尚敢欺瞞其餘可知此皆非我  
知即呼內外掌家及子弟再四窮究俱莫敢言且知  
警且幸脫罪無敢干以私瑾曰只秉公道行有我各  
家誰敢怪恨亦無如之何我與他們說群黨由是再  
無一人來部雖選法少清而衆皆側目上下懷恨瑾

最嗜利却惡人貪取動輒忿恨祖宗法制久壞欲行  
振舉屢見諸言論西麓因其所明諷曰復祖宗舊規  
所見甚高但祖宗痛懲貪污今未免示人以貪其何  
以振起人生百年為期能受用者幾何最可重者立  
名節垂芳竹帛享之無窮不才家居見有司明列條  
件科歛小民當時自謂盡入明公囊篋到京徐察始  
知未然是怨則歸公利遍於衆何苦乃爾歛正本清  
源只在轉移間耳已既不用誰敢多取取既不多則  
人自服祖宗舊規不難復矣瑾曰微冢宰教幾誤此  
一生即今內外堆積多不可當身後好了他人我自

落得箇罵名由是貪取之心頓減即命晝暮夜辭金  
圖于大門外屏間士夫初見心皆疑取兩月後始知  
其意各懷警惧貪風少息瑾撫按兩司率侵漁庫藏  
官銀假稱京用以濟已私乃改部屬有才幹者任御  
史奉勅查盤兼究民間無名之徵一切禁止未幾瑾  
敗用三月武宗始出禁城巡狩未寧江彬張銳于經  
蘇縉及皇庶子輩以漸進幸土木兵役驚擾滿天下  
軍民荼毒殆不忍言矣於戲悲哉瑾貪心默易外人  
尚未盡知南京祭酒歷城某求轉亞卿南北直隸提  
學一免考察一欲大理少卿各賂千兩以上瑾謂西  
麓曰鷺鷥不喫鷺鷥肉今也喫了三人管秀才掌風  
化乃如此不知壞了多少好子弟最可惡二考退一  
陞守鶴慶軍民府旋罷去瑾初掌事專權鬻爵固不  
能無罪若吾曹皆能持守不鑽刺彼計自無可施今  
反見笑於彼真可媿也前此雖巡按回京亦有厚贄  
方敢見其他官不待言矣從此皆不用故民間徵派  
自減少待喘息八月十七日西麓親筆供狀都察院  
覆本擬充軍不允雖人之後重追問亦不及叛情掌  
院中丞楊公綸不忍上堂開口延捱日久遂斥令回  
藉後傳奉朝靴各衙門盡知司空畢公亨擲筆於地

曰張冢宰為朝廷極有益只充軍人心尚不服又欲  
置之何地難為後人盡其有不<sub>不</sub>做此官耳甫旬餘公  
亦罷去自此上下結舌後到午門前忽傳奉問與瑾  
同叛西麓翁喙曰皇天后土太祖太宗可鑒此心由  
書生二十年位至尚書朝廷有何虧負更復何望乃  
忍及此諸公皆讀書明忠孝請各求之於心何必開  
口下問瑾雖死其親信內臣并家人子姪尚在請加  
追問有何指証左驗何必下問及綵文武臣僚側目  
潛涕而已遂傳呼打二十棍押回獄中自此五十餘  
日再不復問至十一月十一日二更忽卒於獄並無  
疾病惟聞是日午後曾飲酒但未知酒何來跡甚可  
疑獄卒史經曾微露懼禍不敢盡言西麓生前並不  
曾在取供招罪名未定遂混同楊玉名文義覆本中  
往自內批剉屍是日京城風砂迷目市無行人陰靈  
重朝始散無論貴賤罔不嗟嘆後予省遂翁茂社堂  
翁亦曰便尚質不死決不到此內閣豎不稟旨永亦  
無如之何既歿其餘遂不能顧矣

柱國

太子太保吏部尚書贈太保謚恭襄

王公神道碑銘

霍韜

英宗睿皇帝復位之三年歲己卯月甲戌日丙戌時  
癸巳公生於大原之黉館有吉徵焉公諱瓊字德華  
號晉溪邑居晉水經流故也公四歲能楷書五色邑  
尹舉奇童八歲通尚書成化庚子舉於鄉甲辰舉進  
士乙巳授工部屯田主事弘治元年戊申理易州新  
厰癸丑署都水郎中治漕河丙辰四月改戶部陝西  
司郎中己未進山東叅政辛酉居靜學公喪癸亥冬  
起復河南叅政乙丑遷河南右布政丙寅夏陞右副

都御史理鹽政九月陞戶部右侍郎戊辰正月改吏部右侍郎時宦瑾欲用私人尚書許襄毅公執不肯三駁率用公瑾怒調公南京吏部右侍郎己巳居任夫人喪壬申起復戶部右侍郎兼左僉都御史賑畿內山東飢癸酉六月陞戶部尚書甲戌春以災異乞免不許六月以疾乞罷不許乙亥三月乞罷不許四月改兵部尚書御史高公韶論公不稱任公韶謫公乞避位不許九月再乞避位不許疏六上不許丙子二月以疾乞免不許是月後自劾乞罷不許六月又求退不許加太子太保丁丑三月加少保十一月以

軍功加少傅兼太子太傅辭不許戊寅二月乞歸不許己卯五月加少師兼太子太師八月宸濠反庚辰十月轉吏部尚書辛巳夏五月下御史獄謫成綏德丁亥禮部右侍郎桂萼疏薦戊子起復兵部尚書兼都察院右都御史提督陝西軍務辛卯冬十月改吏部尚書壬辰七月公薨於位公先于靜學公師事薛文清之門公幼承家學事踐履寔用不飾枝言業舉時恒端坐一室不涉市肆試部政日與喬白巖王虎谷互益切劘正德時公當樞軸虎谷嘆曰晉溪才識雖則優也亦原學力觀其施諸經濟無一不繇平日



講履之素云國家都北漕河特重沿河郡置通州縣  
置丞一員轉任漕事總於都水郎歲久撫按時檄判  
丞無雜委漕務無專職益弛公典漕務申勅判丞毋  
聽撫按檄漕政始肅先是河防埽卓積數足贍數年  
量裁徵數卓不積腐民不困徵踰年埽用益羸仍議  
年徵十分之三折銀儲官帑積一年羸銀三萬有奇  
都御史議移補軍糧漕河重務費缺孰供急徵之民  
民益病孰不給御史移防河木材葺學舍公檄縣官  
曰急昇材回漕司供缺頃時謂公議急休且曰公力  
定毅足以有執也公治漕三年凡漕河里步近遠聞

座丈尺漕舟木材之費考稽畫一著漕河志繼漕治  
者按治以稽不爽毫髮服公精練云分理鹽政時私  
鹽行官鹽塞敝公蒞淮檄清強官一人巡察滄瀛徙  
運河而南序私鹽捕之一人巡察襄鄧民貨鹽出境  
捕之一人巡察海淮鹽徒千百為聚剽之鹽敝為清  
乃議輸粟法議量中鹽之法議商人買餘鹽之法皆  
未行君子曰輸粟法行邊卒可無飢也已公理戶部  
尚邊帥乞糧卓則屈指計曰某倉序糧已何某場序  
卓已何各郡歲輸已何邊卒歲采秋青草已何蓋饒  
也何重索邊帥愕愕服公明察不敢乞公蒞兵部寇

報至公坐籌曰某大師出某地裨師出某由某路會  
師某由某地夾攻某截某關隘某防某奔突某輸餉  
糧某紀師勛又曰諸凡未悉之機主師權軍從事大  
事先行後聞公策勝數千里如對面談復不膠尼故  
邊師不窘束以易策勛宸濠反聞朝士愕駭持兩端  
陰卜成敗為從違不敢正名曰濠反又曰有故事公  
獨奮曰監子烏鼠聚刻期成擒又曰王守仁據上游  
躡濠後擒濠必守仁乃從直房頃刻覆十三疏首請  
下詔削濠屬藉正賊名次請命平賊大師趨南都次  
請命南和伯方壽祥防江朔南都文武臣戒嚴次請

命尚書王鴻儒給餉糧次請命王守仁率南贛兵由  
臨吉恭金率湖兵由荆瑞會南昌李克嗣鎮鎮江許  
廷光鎮浙叢蘭鎮倭真遁賊衝俞諫率淮兵朔南都  
已而陽明擒濠如公策辛巳之夏公在獄禮部主事  
梁焯語韜曰濠反時朝士必歸濠十之七且曰濠必  
成訖訖不惧獨晉溪一人而已矣丁丑八月武皇帝  
單騎巡邊朝士凜凜曰遠則漢高帝之平城近則土  
木可鑿也議嚴兵守京師公曰上偶出遽嚴兵如有  
讒夫曰將據國也禍孽作矣乃馳奏行在命文武大  
臣守都門又密調將士列伏邊城大同遼東延綏馬

皆集行在又請暫命大帥一人開闡河間近保京師  
速控齊魯又於大名武定權置兵備副使二人鎮歷  
盜賊又檄薊州都御史臧鳳保定都御史李瓚嚴兵  
要害為駕驛扈又檄山東河北飭武事又檄在京守  
備察奸宄出時乘輿出邊逾年無虜警京師至於  
邊服安堵如常公畫籌鎮定之功也禮部廷議建儲  
居守公曰斯議也古則有之我朝有祖訓在衆默然  
吏部侍郎王鴻儒曰遠謀也匪夷所思耳大學士梁  
儲曰預建儲議邪謀也不可聽乃罷議是時宸濠陰  
交賊臣朱寧謀入寧世子司香太廟朝臣陰主焉大

學士梁儲力沮議大學士李時謂韜曰儲有社稷功  
外人無知也謂是也是時梁公孰執議於內王公議  
於內奸謀乃寢不行江彬許泰扈驛回將進伯爵下  
兵部曰應州之捷彬泰上勲進秩二級公曰左都督  
上無級也執不上議內閣往勅吏部封彬平虜伯泰  
安邊伯凡軍功侯伯由兵部議乃勅吏部非例也彬  
泰寔佞倖借兵部議為地公執議雖不能沮彬泰倖  
封國法猶恃存云辛巳春駕駐通州江彬擁邊兵環  
衛勢極兇赫召九卿覲都下洵洵云江彬謀逆召九  
卿往屠焉因行大事九卿凜凜無敢詣覲公曰予也

備位大臣天威咫尺敢不覲即日詣通州覲主事梁焯語韜曰江彬擁兵駐通州人心實危獨晉溪不畏人云彬將掠奪九卿印行大事晉溪反佩印往與彬和同如魚水不知何術也韜曰獨扈蹕邪謀可逞兵部尚書扈蹕將士屬兵部彬有邪將士不皆從晉溪居中復制奸變係將士望彬雖有謀不得逞也大臣制變之畧也抑亦智勇合德者能焉公由戶部任兵部由兵部轉吏部復由謫戍起總制再入吏部勲蹟不畢書請書教畧節取其足法者云爾韜甲戌春舉進士夏六月歸嶺南辛巳入京公已寘獄矣不識公

問曰晉溪何罪曰結交宦倖濫封爵亂朝政一也賊傷善類罪二也軍功濫陞罪三也韜曰若是戮宜也越冒韜任主事守職方閱舊牘嘆曰古有寃誣其王公類乎宦者張永之弟張富張容冒安化功封伯彬忝冒應州功伯內閣畫勅兵部填緝尾惟曰如勅行而已矣無濫辭故事軍功封侯伯兵部上論功奏功閣據以擬勅富容彬泰等封勅自內閣無關兵部如曰佞倖濫封亂朝政內閣冝坐乃坐晉溪誣一也凡獻軍捷巡撫議奏巡按紀兵法部請覈實御史覆覈乃擬賞典如曰軍功亂陞撫按冝坐乃坐晉溪誣二

也都御史彭澤以哈密叛黜都御史范鏞擅用駐黜  
官握兵符逮問彭澤先效河淮川蜀之大勳輿議惜  
焉哈密叛釁不得不黜法也范鏞善用軍職罪在無  
任御史高公韶枉詆誣公公任吏部遷公韶秩乃曰  
公賊善類誣三也乃辯公誣於朝公再入吏部韜守  
母太夫人喪歸竟不面公公薨公子朝立委撰神道  
碑銘且曰知公必跡惟韜為悉也乃著其畧若公考  
祖源派歷履政績載在家傳不得備著銘曰憲憲王  
氏出徵君霸魏晉隋唐哲人輒返宋乞元胡字平晉  
下明更平晉是也曰太原百歲少傅是繇斲石遷汾

東柳林為廬為田為汾東人少傳是始潞州知州高  
祖元仕亦職勸農亦職防禦曾祖伯聚壽百一年粵  
祖諱安德績亦綿公伯考功司空具瞻公考永亨亦  
舉於鄉學師文清早端向方隆慶作牧亦曰材良曰  
靜學公惟學聿崇公學家傳考伯之風靜學公仕考  
伯趾踪公仕伊姪不弛學業日某同志日祈日益仕  
有丕績卒本學力公任方岳不瑣屑叢事公於僚僚  
人亦同僚人奏功公總膚功成師師風正德之年權  
人實繁公處其間調濟寔難措畫錯違實係危安武  
皇南征外駁從師內鎮艱危亦議居守日行之規可

禮內防內閣中持六科外惟奉有奏章違左順門奉  
有上旨左順門傳通過奸萌柄不偏顛肇位冢宰曾  
未朝月積弊之叢亦漸以革彼仇彼讒稱誣黜屈雖  
則黜屈不績截烈起鎮邊陲輕裘曳鋸淵畫密謨然  
伏夷胡上魯是逋甘涼無虞積勲不誣還公鼎軸期  
公嘉績期公壽耄髦士是式乃公邁疾奪公最丞徵  
顯闡幽是銘公德是垂無極嗚呼如公功德自垂無  
極

柱國少保兼太子太保吏部尚書白巖喬公行  
狀

陳璘

公諱宇字希大別號白巖姓喬氏世居太原之樂平  
曾祖鑑王湯陰縣簿祖毅工部左侍郎父鳳兵部職  
方司郎中俱贈光祿大夫柱國少師兼太子太保吏  
部尚書曾祖妣李氏祖妣王氏路氏皆贈一品夫人  
路夫人嘗感異夢生公少奇穎比成童日誦千言為  
文浩漭即折衷理道人多奇之時公從職方公宦京  
師少師邃菴揚公為中書舍人學行道誼名天下職  
方公以公與兄光祿公宗從為一時四方之士從游

雲集而談經取第之學莫盛於此公以奇才壯志藻  
思沛然儕輩莫之與京十七歲以金吾衛藉中成化  
庚子順天鄉試錄其文以式甲辰中李文榜進士通  
政司觀政天下名士就交者甚衆相與講學之餘政  
事之要無不考焉復倡為詩賦一變時文之陋丙午  
授禮部儀制司主事是歲東宮皇太子婚禮成及五  
王冠禮畢俱有白金文綺之賜明年會試天下士署  
提調官綜理有法撤棘之日簾內什用之物類為有  
司所取公則悉還之民丁未太耳人路氏卒歸塋樂  
平公杜門謝客讀禮之暇惟以讀書考究為事自是  
所養益深巳酉遂菴揚公以山西提學丁內艱歸公  
命僕馬追送於長子縣時暑雨漳水泛漲屢遇險危  
幾出不測公處之裕如祖塋有松數百株皆職方公  
手自植封夏有蟲食之殆盡公自為文以祭遂止庚  
戌服闋縣令趙鑾以金為贖公却之不受除吏部文  
選司主事公先任禮部時才名甚茂一時元老爭出  
門下太宰三原王公特有是選壬子署考功員外郎  
丁巳補文選司郎中公日益策勵門無私謁清畏人  
知凡三與考察惟公惟慎輿論稱允至於拔進賢才  
杜塞僥倖屏退儉壬無不贊而行之一時聲名藉甚

為士類仰止壬戌遷太常少卿八月有事南郊公導  
駕齋壇孝廟竒公貌曰真太常也乙丑孝廟賓天公  
以執事哀送梓宮於秦陵正德改元丙寅武宗皇帝  
即位告祭天下公分祭中鎮霍山黃河西海媧皇商  
湯王陵及晉代藩諸王陵園事竣之日咨諏民隱為  
六事上之多見采納一曰恤邊民二曰厚邊軍三曰  
廣儲蓄四曰省科派五曰慎守令六曰重祀典君子  
稱公有良使風烏戊辰轉光祿卿專以裁節浮費以  
甦民困為務數十年積弊煥然一新一歲陞戶部右  
侍郎庚申遷左侍郎邈餉供億不乏積弊革除無遺

春至六月不雨漕河涸公奉命禱祭海嶽精誠所格  
駐節兩澤隨之祭峻遂霖雨四沛無不霑足時宦官  
瑾用事大肆饕虐公卿多被通關公恬然自守後瑾  
敗公獨皦然不為所污辛未轉南京禮部尚書公在  
南都禮曹事務清簡公餘得縱讀國初所藏秘書于  
是所見愈邃清暇肆遊江南山水大放厥辭如雲日  
光潔雖片言隻字為世珍重士林往往以不得公辭  
翰為耻甲戌公考滿例贈祖考禮尚書給誥命廕一  
子送國子監讀書乙亥改兵部叅替機務公自條陳  
機務以明舊章數事一曰嚴操練以修武備一曰禁



後占以肅軍政一曰禁冗員以寬民力一曰買戰馬以振軍威一曰定舡差以便進貢一曰修舡隻以便差用遂為定規以式考察軍政量力任使咸得盡其才後多致大位者公治尚簡靜說者謂得畢公保釐之道時烏思戩傳聞國西有童子記其前生事者以為活佛上遣使迎之公上疏極陳其事有傷國體且言國朝宗祖相承以不絕者僧朝貢者不過羈縻遠夷而已非崇奉信惑之也陛下天縱聖明無微不至抑豈不知西方異端佛教無益中國乎南京御史林有年以言事被逮公論救以為御史朝廷耳目之官凡政體民隱皆當言之其言善則微婉將順而無悍訐之失其言未善則憤激而少和平之氣雖言有不同原其心皆忠於陛下非為身家也近奉聖旨差錦衣衛官校等解來京中外聞之罔不驚駭豈以諫官而被逮失禮御臣下之道疏上遂得釋上巡狩無時宣大之地往來數矣又復事於閩陝以伐虜為名公上言天命人心累疏百言無不剴切是時前星未耀中外危疑公疏乞早建皇儲以安宗社不報已卯寧藩宸濠告變刻日東下欵取番都公預為戰守之具一時卓創皆備率九卿臺諫籲天誓以死守城門設

文武臣各二員率軍以守城中暗設軍二營以防不虞未期濠預遣死士二三百人潛入番都伏於鼓樓街攬頭某人為內應向期而設守備太監劉瑯實共謀之公廉知先縛攬頭一搦而知之多執間諜以次而擒梟首江岸都城獲安賊計少阻而公江防城守甚多嚴備尋聞賊至安慶為安慶守備楊銳敗之濠怒曰安慶一最爾尚如此况南京乎且聞喬尚書甚有備將如何也乃殺方士數十人賊退兵是夜西北風惡甚舟纜盡絕比曉至鄱陽湖遂為中丞王公乘之不戰而敗先是公視機務時得濠反狀又知指揮楊銳有才畧可用乃署為安慶守備誠之曰安慶南京上游也密通江西賊計汝必先知知則速來告之賊至必先攻安慶攻則汝死守之未及賊便變銳果成其用公之功于是為大設使安慶無銳順流而下焦爛者豈能成殄滅之功哉較論公之功當受上賞終以爵不酬勞為天下惜之先是濠變分布偽檄番都諸臣不敢上聞公獨密遣官馳奏上在西海巡獵覽奏回內遂謀親征十二月上南狩至則叛逆已平遂受朝正於行在初有旨命百官以戎服朝見公獨以為兩京禮儀一體豈容有異遂朝服率諸臣見時

侍臣江濱以權寵勢焰傾人歆謀不軌公以雅量鎮服其邪瀆歆始構公使人擁掖其事卒無所得駐蹕既久宸極為虛公倡九卿臺諫凡三十章公獨伏闕上疏勸回鑾輿以安定社稷為計九月上還京師公扈從至揚州歸辛巳五月考績錄公前功加柱國少保太子太保七月詔拜吏部尚書辨論官才總統百度至於君子小人之際尤加意焉賢必進不肖必退中外翕然稱之今上皇帝入承大統新政之初銳意圖治甚倚重於公公亦忠勤靡知無不言言無不盡辛癸興廢公力尤多公上疏早視朝以隆聖政蓋為人君法祖憲天莫大以勤而治天下臣工莫不交相慶幸上遂嘉納焉壬午今上御極之初命侍經筵上親耕藉田與行九推禮幸大學釋奠先師孔子時預分獻禮畢復至藝倫堂命祭酒司業講書賜坐聽及賜茶而退癸未王會之期裁革冗濫至四十餘員宿垢積汗廓然為一新君子謂太平熙洽之治蓋始於此矣春三月廷試天下士公為讀卷官所選多文明之士夏偶炎体沐上遣內使賜贖粥米瓜果三次復遣鴻臚寺慰問甲申公以議興國大禮凡三抗疏乞休遂得俞允歲給人夫月米馳驛還鄉有司以禮存

問公歸樂平始買地建宅徜徉於山水中至朝廷之事多不言及辛卯鎮江少師遂菴揚公卒公門下士也等舟渡江吊之及過江之日及南父老識公者舉手加額曰活我公也多遺之以禮不受十月歸偶感疾疾於十月二十六日卒距公生於天順甲申三月十二日春秋六十有八公少從少師楊公游公遂為高第既舉進士又從西涯文正李公游益肆力於文字間其所彥者皆一時之彥德行道誼漸磨者深焉公居清職雖少煩劇餘暇必會友作文而性命道德浩如也自今北方之士言文苑者必以公為直焉為文不以蹈襲為工出入六經深沉醲郁自成一家有克蒙稱若干卷其為詩始擬古作後擺落陳辭往往多自得語樂府雄雉有漢魏風識者以為渾然一代大家之作公嗜山水嘗歷雲中上恒霍登嵩華海岱太行及江南名山搜竒掘隱人莫之及通篆籀有二李風晚精鑒賞名書古帖一見知也性淳儉所用皆陶甃之器衣服恂恂與寒士角而延接儒雅如恐不及見善如已出見不善義形於色卒之日天地晦冥陰霾集霰布滿城郭數十里之內樹木盡白識與不識言之多有嘆息泣下者至二妾從死尤人所難可

以見公之誠無向不謹也公娶董氏灤縣尚書仲矩  
孫女封一品夫人先公卒次室包氏金臺巨族生子  
永殷國子生學文能世其家補公禮部廕娶陳氏中  
丞一石陳公女孫男一繩武讀書能文聘平定孫太  
守孫女已於嘉靖十三年二月十七日葬於長壽山  
侍郎公勅塋之次嗚呼公已矣追念疇昔九原永隔  
不可復得而見之矣忠賢凋喪世故奚賴吾人安歸  
惟公風骨玉屹舉止凝重雍粹若天成加以雋勵克  
養動為遠大作程自即署迄槐位躡華陟要內外迴  
翔四十餘年歷事四朝受知列聖夙夜圖報第黽勉  
以忠愛為至加以積誠崇恪履整執下翼正操約不  
泥不激不援不隨率皆於天理上發見大斥權奸獨  
力期回天定國社稷慷慨任重以故直聲壯節丕振  
中外睦族屬化鄉曲息強暴恤親舊大抵根本卓然  
鵠之以為經緯若公者可謂生順沒寧垂竹帛之清  
芬還河岳之正氣若夫考其行則如圭璋之潔邈其  
業則如日星之炳揆其雅望則如山岳之屹鍾靈挺  
秀譬之景星鳳凰輝映兩間為而世之瑞國之珍者  
自有吾道之清議天下之公論在焉未殷為璘甥璘  
與公姻契且同鄉同門知公為最詳紀公履歷之素

以俟大君子為芟繁蕪列為之銘以光幽壤俾付家  
乘匪但子孫千百禩之幸也

吏部尚書惲菴楊公傳

汪汝

吏部尚書楊公者太師文敏公之曾孫也名旦字晉  
舛別號惲菴其先寔漢太尉震之後祖錫考仕儀皆  
贈至南京吏部尚書祖妣詹繼劉妣周皆贈至夫人  
初仕儀公之娶於周也三月而妊公公妊七月而仕  
儀公疾且逝又三月公乃生公之生也伯舛父有夢  
鳳樓公舍者曰是兒也其將繼文敏公之武而起乎  
迺公甫齠齡果穎異絕倫年十二三仰承慈訓亟肆  
力於弘學十七補郡弟子員二十四而領鄉薦蓋成

化癸卯也丁未落會試遂卒業於大司成丘文莊公  
文莊公大奇之弘治庚戌登進士第二甲一名授吏  
部驗封司主事即見重於太宰三原王公丙辰陞考  
功員外郎已未陞稽勲郎中辛酉轉考功公之為考  
功也風采剴方品藻精確即科道顯貴人罔敢干以  
私兩秉述職之衡黜陟惟允時太宰青谿倪公性嚴  
毅慎許可顧獨器重公繼青谿者鈞陽馬公也尤峻  
急難近公每持正議初若相迂卒乃是公言嘗考察  
京職有佞夫被黜寅緣奏辯者有首再覈實馬公倉  
卒拜命欵改擬以從公毅然持不可曰祖宗來未有

此例且俾門一開後將謂何都御史浮梁戴公亟是  
之而馬公亦悟竟覆罷再覈之命同官張綵者奇衰  
人也公每匡以正而張顧不之悟後竟以黨逆瑾敗  
云甲子陞太僕少卿乙丑改太常正德丙辰乞恩歸  
省蒙路費寶鏹之賜丁卯起復逆瑾欲一要見公公  
不見遂以遠限例出知於溫溫海邦也地大物衆務  
劇奸藪公治之不遺力郡以大治時瑾之偵邏旁午  
州郡吏告其誅求皆慄慄焉公獨鎮以靜民恃以安  
有庠生某與趙某者爭貢偶夜飲醉歸為讐家徐績  
紀兄弟歐而死其僕畏徐免莫敢言家人謂必趙也

訟之官官枉坐趙罪有同知林長繁者廉得其實上  
其獄於公公覆之趙竟雪平生守已端潔自謫官以  
來大書上帝臨汝毋貳爾心於座右僚吏遵度不敢  
縱永嘉令王獻臣者以御史謫茂視前守逮事公則  
敬畏獨至烏居溫二年庚午起為浙江副使督學政  
會當鄉試公以五閱月週迴數千里所校士允惟公  
議若拔寧波增廣生余本於屈之中是秋竟高薦  
明年廷試及第至今浙士夫猶服其精鑒辛未逆瑾  
誅又起為應天府丞尋進尹順天順天素號繁劇難  
治公治竟就緒貧民有負內供不能償者公請以贖  
罰并帑歲之羨者以代仍禁縣吏無重科巨寇劉六  
等流劫近畿又四方流民荐食京師道殣相望公因  
募人為叢塚收葬之人多感泣壬申陞南禮右侍嘗  
攝國子監事士心歸焉時先帝在位已十餘年矣而  
皇儲未建公與司馬涇川張公宗伯白巖喬公議請  
擇宗室之賢者育於宮中以繫天下心二公欣然會  
九卿具疏以請上雖不果行人稱其忠尋轉禮右侍  
掌太常寺事抑裁浮費民力賴以少紓丙子改戶侍  
奉勅總督京通等倉時總督監督中貴人多公剗剔  
奸蠹持正不回屬官倚以為重而中貴人久亦自服



丁丑西羌回賊犯順甘肅繹騷廷議惟文武大臣總  
制三邊公奉勅督理糧餉今密有人所在充足開中監課以其  
餘均給三邊及賞膏哈密人人誰戴上恩誓不敢侮負  
甘肅者漢酒泉張掖之故地也文敏公為學士時扈  
從文皇帝西征故嘗過此公忠信感服威惠翔洽甘  
人舉手加額曰是大賢輔之後也莫不遮道聳瞻以  
獲識為幸尋陞都察院右都御史總督兩廣軍務兼  
理巡撫時嚴枉道之禁公念母老疏請便道展省武  
皇帝允之且錫蟒衣羊酒寶鏤等厚賚公抵家綵侍  
彌月亟戒行以夏六月抵任乃肅紀綱飭武備省刑  
獄汰苛濫百度燦然一新會番馬清遠河源等縣蘓  
峒十八山滴水巖青龍崗帽子峰等寨搖擻負固稔  
惡所過大肆焚掠民甚苦之公乃調集官軍士兵命  
僉事王宗源都指揮董禎等分道並擊斬級一萬一  
千有奇俘獲四千一百有奇奪回擄掠男婦一百三  
十有奇牛馬輜重不可勝紀鎮守太監王堂撫寧侯  
朱麒以捷聞璽書備極褒獎兼有駢蕃之錫云巳卯  
秋宸濠之變南贛撫治都御史楊明王公咨公援兵  
公委即兵備僉事王大用朱昂都指揮歐儒于大經  
整兵以行仍會總鎮兵檄副史汪鉉都指揮董禎達官

都指揮馬英率驍勇五千繼之而鉉意不欲乃鼓浮  
言以惑衆公恐其敗事遂改委僉事王大用統領直  
薄南昌前後凡七咨王公又咨巡撫湖廣都御史秦  
公云西江之變正臣子竭忠效命之時况順逆邪正  
老壯曲直之形昭然則甚逆黨可刻期而破因選漢  
達兵三萬餘將親率以往烏尋得報元惡已就擒地  
方底定遂罷行田州府土官知府岑猛者思恩府土  
官知府岑濬族黨也弘治間濬亂猛降級指揮僉事  
因功陞指揮同知寅緣奏辯覲復其官會龍州知州  
趙源亡嗣襲以姪相猛因黨其妹所立假子常璋者

賂京還驛使詐傳詔旨起兵遂與璋襲破龍州知州  
趙相乃賂遺本兵及雷國者猛圖以功贖罪復原職  
璋圖冒趙宗奪龍用請托於公公執不可雷國者廣  
人也子弟素與叛人通而本兵司馬擅作威福巡撫  
者歲有厚餽公獨無二人交怒嗾巡按廣西御史曹  
珪誣劾公公素清謹吏部為之駁白誣竟不行未幾  
聞母周夫人訃奔喪歸家哀毀踰禮精神為之少衰  
先是巡按御史汪珊獨薦公賢有丁憂都御史楊旦  
操履端純學識閎雅誠士林之高標縉紳之翹楚等  
語今上記注之壬午公服闋遂起公掌南院尋陞南

戶書公甫泣任又改南吏書甲申秋吏部白巖喬公  
致仕廷議會推公俞旨又改公以北公具疏力辭上  
不允會見山桂公羅峰張公以傳奉陞學士公亟率  
部院諸老上疏論列語極激切用是忤旨遂為給事  
中陳洸所誣劾并及東閣大學士吳公一鵬吏部右  
侍郎公偉疏下吏部議時左侍孟公春覆題亟辯其  
誣且曰此必奸邪欲竊三人官故洸為之闢路因發  
洸奸私且請有所懲罪以警將來竟有旨令公及汪  
公俱致仕既而公論大譁科道文章辨公之誣論洸  
之奸者若彭汝寔徐鄧戴金朱衣張曰韜藍田輩無  
慮數十人公抵家坦然自適放情於溪雲山月間以  
詩酒自娛而科道之論薦則未少置若給事中王俊  
民謂公學術純正才望懋崇足以壓服天下之心若  
御史鄭洛書司馬秦浦鎡吳大本施山或謂公忠宣  
恭毅執德不回或謂公氣度文學操持行業俱宜起  
為冢宰朝野士大夫亦企公一出以輔中興景運而  
公則自惟暮齡高位盛滿宜戒遂不復有用世意焉  
第聞朝廷用一善人行一善政則躍然喜藩臬郡邑  
或一事失中一民失所則愀然不樂公之忠義固天  
性然哉公祇事三朝敬歷中外幾四十年所蒞者若

銓衡學校甲兵錢穀禮樂刑獄馬政邊防皆諸極要  
領且清介絕俗奉身甚約至於軫窮恤族諸惠利事  
則為之又甚力性至孝奉母周夫人雖顯貴侍養不  
少衰初成化間宗黨邁難業已籍沒比公貴乃力贊  
其兄鬲雪辯竟蒙恩復如初文敏公祠雖立而祀未  
虔乃相劉守與疏以請卒如南陽李文達公例奉秋  
祀焉公奉祀必躬必豐以潔月朔必薦新旦必具衣  
冠率諸子姓謁祠退而立諸堂下必訓以忠孝大節  
侍無姬媵與文公十世孫朱夫人者白首相敬禮如  
賓子男三言京襄言河南按察知事京太僕丞襄國  
子生也孫曾森立競秀猶稱公家兒云公享年七十  
有一以庚寅秋九月危坐而逝逝之前月躬享文敏  
公昧爽觸風露故遂嬰疾云贊曰揚自漢喜封亦泉  
侯震殖以清德迄唐而宋代有文人明興文敏公崛  
起於閩又繼以公傳曰公侯之後必復其始信已哉  
初宣皇帝時漢庶人反檄廷臣奸狀為兵端廷臣免  
冠頓首計莫知所出獨文敏公首贊親征議甚決變  
卒賴以寧當逆濠之變也海內震驚公復陳師鞠旅  
勦贊王公以成倚角今讀其咨義形于色其文敏公  
之風哉若文敏公望在四朝功在三隄行業在天下

而公之轍迹東巡山海西略甘肅北歷鴈門南抗嶺  
表則又足以張文敏公之忠也詩曰績我祖考其公  
之謂夫若公之宿學偉行清德茂功所以章承家之  
孝而成許國之忠者則有碑若誌存茲可略

吏部尚書贈太子太保謚文莊羅公神道碑

嚴嵩

有明宿德碩儒曰太宰整菴先生羅公以嘉靖丁未  
四月二十四日卒年八十有三初公致仕天子特  
給月廩歲隸以示優禮既登八袞詔遣守臣奉牢  
醴及門存問仍加賜廩隸至是訃聞詔賜諭祭命  
有司營葬贈太子太保謚曰文莊蓋褒賢崇德之殊  
數也君子謂惟公實克稱之公風格峻整雅操貞肅  
進則崇節振邁而毗於國退則遵養純固而範於鄉  
談道著論則言為代之師反躬實踐則行為物之軌

好學不倦不知其衰耄之將至者耳公諱欽順字允升吉之泰和人少即端重殊異年十四題其門有勉勉於仁義之語舉弘治壬子江西鄉薦第一明年入奉廷對賜進士及第授翰林編修每朝退即閉戶讀書不事交謁已巍然有公輔之望擢南京國子司業正容端則六館以肅蘭溪章公懋為祭酒深見信重事多咨公而行以父栗齋翁年高得請奉歸留侍父之不忍去因疏乞終養而逆瑾怒奪職為民瑾誅復職由南京太常少卿陞南京吏部右侍郎改吏部右侍郎今上即位轉左侍郎前後連攝部篆甄別人才咸極精當時論稱重充實錄副總裁是時栗翁年益高公歸養之志益切拜南京吏部尚書抵任即馳疏乞休便養詔允之既而召改禮部尚書未行丁栗翁憂服闋仍以禮部起公未至復改吏部而公具疏懇辭於是得旨致仕蓋公審時直已不苟慕榮利如此自是江右部使兩都臺諫章數十上無識不識罔不冀幸其復出乃公則屏居却掃惟研精聖業窮探理性患近時學者持論高虛不屑古訓簡約是趨其流之弊將墮入虛誕作困知記若干卷其言議精微衍奧根極理要辯禪悟之學近理似是而斥其毫釐

千里之謬時習波顏我獲無易於戲道之不明智巧  
橫出古之聖哲罔不戒慎省察率諸終身而不足今  
之論者以謂圓明朗徹取諸一言而有餘其學術異  
同世之君子必有能辯之者考公平生自史館以歷  
國學則士行雍規由以丕變由奉常而陟少宰則官  
常國是倚之取平中更什抑秉志弗渝榮進屢辭去  
就惟絜然公雖蚤退而考論政務之得失究心生民  
之休戚固未嘗一日不以天下為念也每平旦正衣  
冠升學古樓群從入叙揖畢端坐觀書雖獨處無惰  
容食恒二簋服無侈麗居無臺榭燕集無聲樂宗戚  
率之而興於孝敬鄉閭則之而化於禮讓子姓僮孺  
罔不守其約而歸於謙靖謹飭初公昆季三人並起  
高科季弟中丞先卒仲氏憲使公亦未老乞休德義  
相淑怡怡如也方屬疾乃自作誌繼以二絕皆正家  
之語疾亟舉手正巾而卒曾祖諱寧祖諱鐸縣訓  
導父栗翁諱用俊由鄉舉歷任國子助教祖及父俱  
以公貴贈通議大夫南京吏部右侍郎妣皆淑人元  
配曾氏繼配李氏贈封皆淑人子二人長琰引禮舍  
人次翊馬湖知府孫男七人僸份企佑德位似曾孫  
男一人將以某年月日葬公於邑桃岡之原子翊銜

哀屬辭刻諸隧首之碑嵩昔繫籍諸生嗣在詞垣曲  
承獎挹顧茲無似有忝誨言爰述蕪詞以列休美而  
著其所以為學者特詳焉亦以見公之志也銘曰  
維聖有學一理萬殊明誠兩進斯壹其趨世則多  
岐所尚滋異欣妄嗜新其說孔熾不有碩哲孰閑  
斯潰翼翼大宰夙志斯道深造敏求繇壯至老不  
踐宰政卒隱其身名振當世行高古人困知有記  
昭我塗軌折衷群言折入毫 大耋年踰踐修不  
已公雖退佚物望愈崇公既逝矣 皇眷愈隆昔  
也存問光勳宸綸今也卹哀澤濡泉扃進則伊臯  
退則關洛衛道立言以惠來學典刑日遠梁木斯  
摧勒此信辭萬禩無隳



前太宰北原熊翁行狀

雷禮

公諱決字說之號北原姓熊氏南昌東壇人曾祖秉治以善聞祖邦敦學行弘治中有司應詔舉遺逸

弗就鄉人稱為徵逸生先父佐由府掾授浙江壽昌

縣丞陞判安吉州事所至有惠政俱以公貴贈光祿

大夫太子太保吏部尚書曾祖妣姚氏祖萬氏俱贈

一品夫人妣萬氏累封至一品夫人公少力于學以

儒士舉正德丁卯鄉試第甲戌二甲進士授禮科給

事中歷陞刑科都給事中凡八年毅然有採時意已

卯纖人導武宗南狩公首倡朝臣伏諍不輒回畏

先是江西宸濠蓄逆謀巡撫孫忠烈七疏其事皆為  
奸黨隔匿公與御史熊公蘭蕭公淮等密計發之濠  
俱情露速反尋就擒由公早伐凶萌以致羽翼未就  
而殄滅若是其亟云續奉 勅查盤四川錢糧竭精  
檢刷不落吏胥手時有松藩總兵某怙勢牟擷其下  
賊以萬計公廉實劾聞實以法壬午 今上入繼大  
統討求推尊大典朝論多以宋濮王故事為言公蜀  
聞之抗疏謂 今上以弟繼兄而非以子繼父比之  
英宗親為仁宗之子者固大不侔而 興獻比之濮  
王不復為英宗之考者亦為有間反復以倫理辨之  
與時議異尋出為河南右叅議至則恤疾撫亡禁刁  
訟毋令滋偽屬邑有巨盜為亂授衛師除之闔部肅  
然會父憂去官丁亥 欽取纂修明倫大典懇乞終  
制不允服闋始就道至中途陞都察院右僉都御史  
協管院事明年陞本院右副都御史未幾大典成陞  
左副都御史 恩封三代己丑陞右都御史掌院事  
風采凜凜臨義不可奪值考察天下官員有陰受要  
人旨欲誣黜一二快私忿者公力爭不可善類因以  
保全者衆七月東廠奏緝張鑄人命事奉 旨下三  
法司會訊衆多依違公獨奮筆曰吾為法官殺人媚人

弗為也白其狂以聞既重忤中貴意而執政有藏嫉者擠之遂得旨閒住己亥起陞南京禮部尚書巡撫江西都御史克齋王公疏乞表章句容朱家巷旨下禮部行南部查勘公以日久跡湮據實題寢其議識者是之唐子改南京兵部尚書叅贊機務例核軍政秉公去留無敢以私撓者上河龍灣淺船餘丁舊沿幫甲累甚苦之奏減甦其半諸凡地方利病次第罷行留都倚以為重癸卯召為兵部尚書兼右都御史掌院事初各道題差類擇私便公曰綱紀之地將糾官邪乃先自枉耶題差各稱其才人亦服公之公直適報虜警有巡閱者托疾佚帝城公令首領刻限催責出巡又各省有一二巡按御史擅威福操一切貽書指摘衆用揀揚凡大小官民赴闕訴情審有枉抑急為移讞若勢囑者一無所從甲辰改吏部尚書前後升叙流品同少宰兩湖王公少湖徐公及司屬議叶乃注不憑臆決會例考京官專稽行檢於素干清議者即黜之或一二直道被仇搆誣務雪白乃已每註選缺或不相宜必語所司曰地遠且惡得無虧此官乎更易其地不以為煩至於孤寒子立之士務獎拔之惟恐墮落為聖世累南北直隸多內臺

中差各欲擅熱柄炫威名每歲周刺屬苛索瑕疵求  
塞數往往有負枉以去者公題請只於專職所屬  
論列不許濫及著為令自是州縣官各有所恃以不  
恐入部纔數月蒙諭同輔臣每月望日朝見東宮  
又屢被命遣往帝王及先師孔子等廟帝社  
稷等壇行香代祭俱出殊眷乙巳六年考滿加太子  
太保廟工成又推恩封贈四代尋以母萬夫人  
年九十乞終養蒙溫旨勉晉仍詔有司以粟帛存  
問尤為曠典云公感遭遇之隆殫忠圖報於事關  
國體者知無不言言無不盡八月以疏斥箕仙之妄  
忤旨戴罪視事至十一月乞休蒙差官校解發  
原籍為民居田野八九年足跡不入城府每見邸報  
知時事災異輒憂形於色甲寅年九月二十四日以  
疾沒距所生成化戊戌年四月八日享年七十有二  
配劉氏累封至一品夫人四男云之原子家食時  
聞公重信義挺有節操訓子若孫必孝悌為先見戚  
里匱窘賑恤如不及有挾勢凌轢鄉人者嚴辭峻戒  
甚或直言於有司必令寔弱得所已嘆公嗜善之篤  
及叨銓司見公虛心取善若已有之或用人為一二  
所欺聞僚友讜言即悔改甚至某以狂言激怒尋怡

然釋謝具獎之曰今後務以道相規無以某怒曲從  
其忠厚正直類此政暇手不釋卷尤篤信程氏遺書  
每諭進後不可不熟玩則公之臨大事決大疑確有根  
底謂不本於此哉其惟前輩勲德賴門生故吏闡揚  
之不致湮沒公言行若菽粟布帛皆濟實用其立朝  
大節及居身盛美未易殫述謹掇其槩以俟慕公者  
采擇云

光祿大夫太子太保吏部尚書贈少保謚文襄

唐公墓誌銘

徐階

嘉靖丙午夏六月太子太保吏部尚書唐公病弗能  
朝三上疏乞致仕上方倚公重以爲忘國奪其官  
放歸七月十九日公輿出都門三十里卒于旅舍有  
司莫敢以聞後三年權祔觀山祖塋之側其明年子  
汝揖舉進士第一授翰林修撰又二年具疏明公不  
敢為欺狀詔復公官賜祭葬贈少保謚文襄於  
是士大夫相與戴上之仁明而幸公之有子且以  
識天道之存焉明年秋修撰將改葬公遂以狀請予

爲銘納公之墓禮也按狀公諱龍字虞佐別號漁石  
系出堯之胄唐侯歷戰國秦漢晉隋仕者不絕而莒  
宋兩公前後開國於唐尤號貴盛唐末莒國裔孫仁  
恭避地餘杭後再徙蘭溪世以武功顯宋末始復業  
儒明興公祖贈尚書思州公與其子贈尚書篁嶼  
公皆以文行爲鄉閭所推篁嶼公娶于鄭是生公公  
之在娠鄭夫人夢獅居門而向及日生光正射蓐其  
貌儼然獅也人相與異而傳之稍長受業楓山章文  
懿公爲高第弟子弘治辛酉領鄉薦正德戊辰舉進  
士知郟城郟于時荒甚公使民得貸粟於官而薄其  
息禁豪猾毋多賦却羨餘之賂吏者以佐轉輸民用  
不困大盜起燕齊間流劫至郟公督兵拒之斬首三  
百餘級賊怒合其黨大至公發碗口長柄諸砲斃其  
驍銳六十餘人賊乃遁以功陞俸二等丁篁嶼公憂  
服除拜監察御史出按雲南上疏乞戒巡遊黜貴倖  
又數以法抗嬖臣人爲公恐公笑曰吾職固然已卯  
寧庶人誅江西新免於兵而歲荐饑公以選往按賑  
災卹貧疏連十餘上西人以安嘉靖丙戌自陝西提  
學副使遷按察使驛作徒數十人歲暮餓而逋有司  
當以越獄公悉縱歸使自齎牒投郡縣輸雇直以免

衆感泣輸無後期民有誣其弟盜者獄既具公佯執其妻訊之曰汝夫與弟同盜法不得以先自言幸活妻懼以情告誣遂白丁亥徵拜太僕卿尋擢僉都御史總督漕運條凡兵民所不便大者奏聞小者立罷與利布惠若已與有及召爲副都御史民爭繪像祀焉擢吏部右侍郎轉左侍郎壬辰關中饑詔發帑金以賑而虜首吉囊數寇邊天子爲之晏食遷兵部尚書兼右都御史總制三邊軍務兼理賑濟公馳入關奏平糶節用等十事民賴全活者二十餘萬人乃已簡戎伍飭器械明賞罰任梁震王効劉文諸名將以師三萬耀武陰山虜大驚北徙六百里明年虜犯鎮遠公督震効擊之斬首百四十級甲午春虜犯延綏時震方援大同公趨震還而檄叅將任傑以兵出虜後合擊俘獲五十餘人其夏敗虜於嚮水斬首七十餘級秋吉囊自將十萬衆犯安會公使文迎敵而伏兵其旁戰既合伏兵起乘之虜大敗遁歸至興武効邀擊敗之至乾溝鎮追擊又敗之凡斬首四百五十有奇奪夷器無算兵部上公功詔賜金幣廕一子爲國子生丙申改刑部尚書初大同卒叛都御史東平劉公帥師討之將盡誅其黨卒懼爲飛語中

劉公徵下獄公言大同凡三亂輒戕其帥不一正法無以令天下而論者專務姑息以冀苟安今罪源清邊人益得窺朝指矣劉公於是得釋劉東山與其徒乘時爲奸利至構間兩宮株連貴近吏坐獄不窮竟去者數十人公獨以抵法無所懼九廟成公條大禮大獄諸名臣以請得赦歸者二十餘人當是時公風采聞天下而摧貴多不悅戊戌夏乞終養鄼夫人詔報可公既去名聲益彰臺諫薦者章三十餘上甲辰秋召爲南京刑部尚書以母辭不允改南京吏部尚書會有邊警改兵部尚書鄭夫人諭公曰茲所謂金革之事汝將毋時也吾偕汝行矣乙巳春奉夫人入都公故習邊事以爲虜去來若風雨而我收保恒後時故多亡失檄諸邊修城堡遠斥埃虜至持滿待之其秋虜果不得入自頃年來吏喜以文法繩邊將其跡弛雄傑之才往往獲罪而柔佞乃幸全公請宥諸在繫者使立功以贖廢錮者量其才用之士聞咸奮太廟成加太子太保冬十月太宰缺廷推首屬公上方重兵事顧銓衡非公不可疏留中一日竟改吏部公爲政無論資望殊勞異能疎遠必拔而中才不得越次以進其有所用舍聚僚屬共



謀之衆議合然後署疏以請嘗舉廢棄四十人皆時  
譽也雖不果用正論為伸居數月公病足又數與執  
政議不合於是毅然求去馴至奪職以卒縉紳悲之  
公性坦易與人處畢露肝膈而其意氣激昂慷慨見  
者盡傾尤好獎拔後進士多賴以知名今中丞平涼  
趙公其一也素善屬文當其得意時長篇短章操觚  
立就莫不婉麗暢達或戲之竒深文難字至不可讀  
然終不詭於理所著易經大旨若干卷漁石集若干卷  
雲南江西督府總督奏議各若干卷傳于世公生成  
化丁酉六月二日享年七十配徐繼劉俱一品夫人  
子男七長汝器國子生次修撰次汝舟舉人次汝梅  
汝渭汝澧皆邑庠生最少汝淮女一適監生朱朝尹  
孫男十二廷傑廷佐皆官生廷佑廷儀廷仕廷傳廷  
儲廷偉廷修廷僖廷侍廷傑女三公既以文武才有  
盛名而予嘗偕宛洛韓公以吏部侍郎與公同事修  
撰及其兄弟又多出予門者故為銘銘曰  
惟士於才古難其兼孰文且武為時具瞻偉哉唐  
公魁顏鉅鼻學恥一長高步遠視揮毫藝苑捷若  
雲飛聚為犀玉散為珠璣運謀戎幄竒若神相陰  
陽翕張風霆震盪出總制闡入長卿垣英髦宿將

藹其在門始殞于途縉紳胥悼 聖聽繼回卹典  
有耀贈官少保三孤之崇易名文襄焯賢象功吁  
嗟公身歿受多祉惟 皇仁明惟公有子世美必  
濟 主恩必酬公多子孫尚慎厥修

太子太保吏部尚書贈少保謚文襄唐公神道

碑

嚴嵩

今制大臣於歿既得請祭葬矣其易名以謚則稽德  
視功出 宸斷不輕畀也凡館閣侍從之賢迺得謚  
文部院諸曹間有得此者自 祖宗朝迄今不數臣  
焉若吏部尚書唐公其一也公少從學楓山章文懿  
公之門得其淵源學優行縝為文章謹嚴典重有左  
氏先秦之風精詣閎肆號稱作者敷歷中外隨試輒  
効聲望偉然而西師俘馘之功為多 上賜謚曰文  
襄君子謂公足以當之無忤云先是公任冢宰溝疾

乞休弗許固請忤 上意詔削官以歸公舁出都門  
二十里逆旅舍中亡矣後四年其仲子汝楫舉進士  
第一授翰林修撰始具疏叩闕述公前疾及道卒之  
狀以明不欺 上復公官加贈少保遣祭營葬徽典  
駢及存歿湮鬱一旦伸雪時論快焉汝楫則詣予泣  
請文以作公碑公諱龍字虞佐浙蘭谿人也曾祖諱  
仕新祖諱賢思州推官考諱學俱以公貴贈光祿大  
夫太子太保兵部尚書妣皆一品夫人公正德戊辰  
進士釋褐知郟城縣郟卑散流賊且至公集壯丁守  
無敢睨城第掠境上去公追殺數十人賊怒復還公  
督戰又斃其驍勇數人以有功旌稱能令召擢內臺  
風裁竣整按滇南數上封事諫巡遊斥嬖倖率人所  
難言言之剴切按江西逆濠之變甫平禁兵在境為  
患公禁不得逞䟽請班師民獲安堵守正助逆之人  
明析功罪無遺慝無枉良又人所難處處之克當稱  
名御史督學於關中也校文貴雅正品士先器識稱  
知人掌憲於三晉也義感囚徒明燭誣獄稱名執法  
以太僕卿徵尋擢僉都御史總漕運既又以副都御  
史召入臺又擢吏部侍郎會關中告饑西陲多警  
上知公可屬以大事也拜兵部尚書兼右都御史總

督三邊軍務公馳赴賑卹病者興流者復一時將佐  
推誠置腹咸樂為用乃閱兵三萬出塞直指陰山軍  
容震耀虜驚遠遁自是犯寧夏則有柳門之捷犯延  
綏則有清水之捷吉囊自將十萬犯安會則有興武  
有乾溝之連捷一呼而將士群附二旬而露布三騰  
前後奏記為俘獲為首級幾數百奪夷器無算兵部  
上其功有爵封武廕之請不報 召還為刑部尚書  
劉源清以討亂卒過嚴劉淑相以奏訐執政皆坐重  
典公論救得末減執憲持法權勢庇援無所避 九  
廟成覃恩宥大禮大獄諸臣得放歸者二十餘人公  
有力焉而公以母太夫人鄭年八十餘懇乞終養  
上賜給驛歸朝野榮之然臺諫僉謂公當及時柄用  
不宜聽其自便薦章交上 上亦思公起為南京刑  
部尚書尋改南京吏部未行改兵部尚書趣令赴任  
公感激奉太夫人以行至則謂制敵在任將請待邊  
吏文法少寬故諸宿將逮繫廢黜者皆得錄用加太  
子太保冢宰員缺輿論屬公公既受命一以以人事  
君為任甄才望崇恬退拔滯幽錄廢棄䟽舉四十餘  
人無何天不憇遺哲人云姜識與不識咸悼惜焉所  
著有易大旨歷官奏議漁石集行于世公卒以嘉靖

丙午七月十九日距生成化丁酉享年七十配徐繼  
劉先公卒贈封皆一品夫人子男七汝器國子生次  
即汝楫次汝舟舉人次汝梅汝渭汝淮皆邑學生女  
一適國子生朱朝尹孫男十二人女三人往予為編  
修公為侍御史獲往還以文字相益德義相友予過  
公邑必登堂拜母交好垂四十年而公今不可作矣  
能無悲乎公懿行不能悉著著其大者以示後而公  
母太夫人及見汝楫登第年九十五而終亦以汝楫  
疏請得蒙 卹典榮哀備至足以慰公於冥漠矣汝  
楫乞假歸塋公于近郭觀山祖塋之次從公志也銘

曰

有偉唐公時鮮克儔保乂王室文武具優如堂隆  
棟如川巨舟發為文詞商鼎夏卣如彼武庫而森  
戈矛作時宗工媲美前修釐政泣事剴決靡留張  
弛咸宜不競不綈施以治軍條策畫籌決勝罇俎  
褫魄旃表功弗及賞歸怡林立國倚老成維舊是  
求入正銓衡俊乂甄收碩人云亡邦家之憂 帝  
念往勸無德不酬錫贈易名寵數疊稠豐碑琢詞  
言樹道周以揚其休以告諸幽

周恭肅公行狀

嚴訥

曾祖景芳祖瑄贈資政大夫南京都察院右都御  
史父昂贈資政大夫南京都察院右都御史

公姓周氏諱用字行之別號白川蘇之吳江人也始  
祖俊德在元贅張判院氏俊德生希賢希賢生景芳  
景芳生瑄景芳瑄盡讓其外家業而更居焉瑄生昂  
昂以孝義為一鄉所欽服娶計氏以成化丙申九月  
二十二日生公公生有穎質數歲善屬對宴客屢以  
試公之對屢警言不凡人大奇之其塾師遂辭不能教  
而去年十四去家力學寒暑不解衣弘治辛酉舉于

鄉第三明年壬戌登進士第拜行人奉使 諭祭  
楚藩凡 王所贈遺悉辭不受遷南京兵科給事中  
丁父憂服除改禮科給事中公顧乙南於是復得南  
京兵科正德間西僧言西蕃有復生大寶法王解知  
未來遣中官往迎公上章力詆其誣願毋輕信崇以  
生民姦辭甚切直人多危之竟得 旨不加罪時中  
貴人用事黜陟多從中制於是尚書劉愷以下凡任  
數人言官劉經輩任外皆不踈選部又鎮守江西中  
貴人黎安非法致人以死中外皆無敢言者公獨前  
後抗疏請罷愷等還經等以用舍罪黎安以正法令  
天下快其論而賢公敢言遷廣東左叅議番禺盜群  
起撫臣調土兵兼官軍分六哨合攻以公領龍門哨  
征藍糞諸寨公與武臣分哨並進直抵藍糞擒斬九  
百餘人平其寨十有八事聞 朝議以級不滿千沒  
公功不賞實以前敢言故當是時同事者欲多其級  
其所誅戮或不辨渠醜公獨矜之覈其可疑者悉縱  
之撫臣謂一僉事所獲級少也欲劾治其罪公以若  
干級遺之得免嗟乎勛叙者恒情之所兢貪也戎陣  
之間苟有劾刀錐之用違分寸之績掠一賊縛一訊  
有可以徼於鍾粟謙幣之膏者豈不奮袂躍距詡詡

暴勇智以自侈耀甚則乘峻抵巇矯飾增美一卷二  
豪漫不作慝者且有之矣何況於戒逸德急在宥先  
彼迫脅後我首功者哉且自伐木風微朋友之道衰  
息一遇利害相持之際其不馳技相憑許慝相形甘襲  
市井反覆之所為者幾希矣又何况於自韜其所成  
而顧以比人之急寧已績之不彰而無寧貽媿其察  
者哉公是舉也蓋其功雖不蒙賞於朝而仁義之  
譽因是藉之夫有所概於人心也嗟乎公信賢矣賢  
矣嘉靖改元皇帝詔擢用天下賢臣而公陞浙江  
按察副使既陞時都憲張公方鎮兩廣獨疏薦公因  
留以自代謂兵燹之後瘼傷未瘳周其寬猛兼資民  
懷素孚宜令拊民即民可蘇息功不在先臣韓雍之  
下公為人所推重率類於是會丁母憂服除起為山  
東副使備兵于臨清為建設賞格令同盜者首即不  
復罪其罪盜自相疑畏不復相聚境內以寧遷福建  
按察使閩素多訟公推鞠平怒獄無繫囚亦無寃民  
中貴人鎮守市舶臨於福州其日所給食青之驛館  
館人苦於劇費胥覓額不能應公例削其數公私稱  
便陞河南右布政使歲大旱民饑死者相藉至有相  
食者公職當清戎無分守之責然不忍坐視民之饑



而死也毅然白於撫巡請自往活之故事賑饑多里  
戶遞報、多偽饑者多不被賑公不以屬人躬循野  
間戶貼賑濟字令民自齎以來遂以內帑所發銀及  
所措畫米物戶給之絕無稽留民溥獲實惠所活甚  
衆已而車從所駐雨輒隨注麥為秀發民大頌之論  
者謂公仁德所感有叅政守汝南以養病故訟謀紛  
積獄繫日繁民病之公代為分守即先命有司盡釋  
其所繫以俟至則昧爽視事日讞數十輩心乃過勩  
耳為之不聞而南陽滯政俱次第堦舉矣陞都察院  
副都御史督南贛軍務公移檄所屬曰當知不得已  
而用兵尤當知不得已而為盜惟藩臬諸司之綱之  
紀抑郡邑長吏有守有為源潔則流自清民安而盜  
自弭矣公言惻怛由衷莫不踈服有巨盜數輩阻山  
橫行捕之不能獲公廉其黨有悔悟者召至諭以利  
害結以信義因以賞誘之遂奉成算俘斬來獻蓋不  
血寸兵不蜚束芻而賊亂蠲除民得安畊人以為莫  
大之功初橋殿權商稅太重商皆避之他趨軍餉不  
給公為調停其輕重著之例商復趨之至今貽其利  
焉贛豪室多隱其田額以其虛稅竄之貧者公命履  
畝計丈覈之盡革其私賦役以均派亡盡復 召還

理院事未幾陞吏部右侍郎俄而轉左凡署掌部事者四尚書舉用失當嫁其罪於公調南京刑部右侍郎公處之裕如不自辯亦不以介意尋陞南京都察院右都御史律已甚嚴門無私謁上疏乞起廢其所推轂咸炳々傑出海內有聲者兼操江兵亦以方畧平太倉海寇而一方陰蒙寢兵之福陞南京工部尚書 慈聖太后梓宮南祔 顯陵自京師直抵承天上下江淮 聖念殊切公殫思勞力督治巨艦以奉安之 梓宮賴安履無虞成 聖天子至孝而竟不一自伐工部物直往々以黠商賂先物未入而給吏緣為奸公為立定式以釐之宿弊盡去常修都城按藉以程工而人不敢懈事城益堅改南京刑部尚書 九廟災坐自劾免晦養者三年御史交劾論薦起為工部尚書督河政疏請修溝洫以防河決其事凡五皆不易之規給授資德大夫正治上鄉數月改督漕運尋入為都察院左都御史每御史按畿省公輒誠天下刑獄有濫極宜悉心推詳長吏貪墨首先劾去民斯得所矣例考察京朝官公合諸御史詳稽各曹賢不肖狀于自籍記彙隲其等以丹墨第別之所黜惟太甚不務苛碎然公至親乃亦在黜中天下以

此翕然稱公九載秩滿加太子少保拜寶鏹工尊之  
賜吏部尚書唐公罷部修其缺工命推大賢以聞  
衆推公工俞之特以為吏部尚書吏部銓品自頃  
悉由尚書尚書或委之即或寄之吏兩侍郎諸寮  
署惟謹非有大事不相參決遂沿以為常公以謂集  
衆思廣忠益緊臣子當爾况於吏部一切奮然懲之  
時宛洛韓公少湖徐公西陂劉公皆當代偉人實前  
後為侍郎公虛心咨諏求盡天下之情不自怙其諳  
職諸司劾之亦各展所見以相佑助而吏遂不得用  
事績用日著公蒞政勤甚疾作會冬天下吏群然述  
職於朝公祇承天子重命大計其治日取部使  
者所上籍詳稽之不遺纖微事甫竣而公卒是為嘉  
靖丁未正月十九日時公年七十二嗚呼公所謂以  
死勤事非耶訃聞天子嗟悼不已贈太子太保謚  
恭肅命給傳舟歸其喪命諭祭者四命有司營其葬  
事所以褒卹之者甚備公之大父若父皆以公為南  
京右都御史皆得贈如其官妣皆夫人配施封孺人  
先卒贈夫人生子男四人由施出者一曰國南今以  
公蔭為右軍都督府都事由側室姜出者三曰兆南  
為太學生曰式南乾南為縣學生孫男八人曰京甸

為縣學生曰采旬齋士餘尚幼孫女二人長適縣學生顧名義次適張尚志曾孫男一女二公性極孝友童子時父母有疾即憂苦不知所為焚香籲天割股肉雜粥以進人罕有知之者父母歿哀毀骨立蔬茹苦寢者各三年不一日變常曰吾以仕官不及歛親喪誠不勝抱痛終天藉吾弟克慎大事少追不孝之罪以故待弟逾厚有妹適陸氏年十九無子而寡守節踰三十年公念之敬愛尤篤公簡靜寡慾歷官且四十年以家人相隨者纔數年餘皆子然以處自奉殊淡薄終身所御食未常過二味人有餽遺雖果蔬之微見之亦不悅治家嚴毅有法每訓諸子讀書明理學為善人君子初不令問生產好覽經史雖以蔡氏書發科顧尤喜易著讀易日記因發明序其指意而禮經亦其所長廣中兩試士兩刻公禮經文以程天下公與人言懇懇見悃誠故雖躁妄者遇之自消其習凡章奏必親屬草詳檢以進凡理獄訟必面察兩造疑麗其罪小大必情一不以屬吏胥疾革少湖公日往視因竊問公飲食狀於公嗣公日且暝遽呼曰兒無及外事問一二有所稱說雖不可悉解要皆繫天下國家者其忠慎之心瀕死不渝如此古語有之

帝王之德莫大於知人知人則百寮任職天工不曠  
竊惟 聖天子銳意興治謂舉賢建官主之銓曹糾  
慝繩違典之憲臺二署得人則天下之治可不勞而  
自致故每太宰及御史大夫缺輒廣咨老成人以克  
非其人寧不備不輕授是何 聖天子之明也方公  
被 召入院繼視篆吏部天下莫不喜悅交口頌  
聖天子知人者不絕何者公之行潔義修嫻於謀謨  
固足以服天下之心而克荷大任也 聖天子既知  
而用之矣乃公益矢天心砥節早夜翼 為 聖天子  
進賢絀不肖不勸用弼成天下至治天下亦方顯然  
賴公冀終睹治化之隆而胡公之忽長逝哉不亦痛  
乎公之卒其家不能具棺直公嗣國南稱貸僅具公  
之清操切後滋見國南卜以戊申年三月二十二日  
塋公澄源鄉西亢之原乞得名筆著公平生以勒示  
後之人屬 訥整齊公行事之次用備採擇昔仲尼稱  
叔向古之遺直子產古之遺愛 訥不佞竊以謂公實  
惟兼之謹狀如右伏候青雲之論

太子少保吏部尚書贈太子太保謚恭肅周公

墓誌銘

徐階

公姓周諱用字行之號白川蘇之吳江人也少以文  
有名弘治壬戌舉進士拜行人司行人正德初遷南  
京兵科給事中後九年改禮科給事中當是時士大  
夫重內徙得輒動色以賀公獨曰南於我便乃復以  
為南京兵科給事中武皇帝好佛遣中貴人迎大  
寶法王於西番公上書諫甚力已又論倖進諸大臣  
及鎮守江西中貴人不法其身引而南其所論奏願  
保俟出北臺諫上久之遷廣東叅議督兵討賊之逋

誅者凡戮九百餘人平寨十有八猶以前敢言功不  
得錄 今上即位天下士有聲實者率起為大官公  
於是得浙江副使未幾遭母憂服除改山東副使整  
飭臨清兵備為捕盜格若干條盡臨清之境盜不敢  
入遂遷福建按察使故事鎮守市舶中貴人日給食  
三山驛費錢至若干公敕驛減十二且曰吾將以漸  
盡去之踰年遷河南右布政使歲侵 詔發內帑以  
賑會汝寧分守缺公輒自請攝事盡罷俗吏所為具  
文苛法全活甚衆事聞超拜都察院右副都御史提  
督南贛軍務捕斬劇賊若干人已而曰民之為盜非  
得已也夫事固有源不窒其源流終不可得塞徒多  
殺人父子兄弟何為移書屬邑薄賦稅平徭役緩軍  
餉之徵行之期年盜果不復作 召還協理院事晉  
吏部右侍郎轉左侍郎尚書有所薦引失宰相意而  
尚書故與宰相比因諉過於公調南京刑部右侍郎  
公終不自辨後兩人相繼罷去即拜公南京都察院  
右都御史遷南京工部尚書工部市物於民吏受賕  
率先給直而故緩其入黠賈者因據以為利公令民  
有物得自輸輸已授之直罔後弊頓革嘗修都城召  
匠與之分地籍而藏諸官匠內自畏城以不速圮改

刑部尚書 九廟災上疏致其仕嘉靖二十二年癸

卯公自吏侍去國至是十年矣 上久而益明其賢

用御史薦徵拜工部尚書總督河道數月改督理漕

運未至以為都察院左都御史士之干譽喜進者傳

聞望見不待戒以絕明年當考察京朝官公廉得其

人賢不肖狀輒手書於籍又第其高下丹鉛識別之

其改定或至三四苟賢矣雖仇不問苟不肖雖親有

勢力必黜天下服其公又明年滿九載加太子少保

賜寶襁牽羊上尊其秋太宰唐公罷 上若曰

孝宗時舊臣而賢者誰乎于時公廷推在第三 特

詔以為吏部尚書自近歲來郎中於為政專尚書至  
不暇有所可否而侍郎遞相踵以噤不出語為知體  
郎中者其智與力困則盡以任吏於是銓部之政幾  
由吏出公將有所舉措必謀諸侍郎兩侍郎莫不樂  
為公盡而郎中亦遂以簿書任其僚吏不得為奸私  
故公之典銓不嚴而肅公素強及為吏部勞然以新  
被命勇不自顧惜疾遽作會冬當大計羣吏之治奮  
曰此重典也吾不可以病自懈晝夜取部使者所上  
籍閱之又採輿議品隲其賢不肖去留之疾增劇丁  
未春正月僅訖事以其月十九日卒距生成化丙申



九月二十二日享年七十二公性孝友而薄於嗜慾  
歷官四十餘年恒不以家自隨人餽之物即果蔬見  
之輒不憚故其卒也至無以市棺教諸子嚴予嘗候  
公其子國南竊語予寢食狀公目且瞑遽呼曰兒母  
及外事其不亂如此曾大父諱景芳大父諱瑄父諱  
昂連兩世以公貴贈資政大夫南京都察院右都御  
史母計封太孺人贈夫人配施封孺人先卒贈夫人  
子男四長即國南以公廕為右軍都督府都事施出  
次兆南太學生式南乾南縣學生俱側室姜出孫男  
八京甸來甸賚士京甸縣學生其二尚幼孫女二長  
適縣學生顧名義次許嫁張某公卒既踰月國南以  
訃聞上震悼贈太子太保諡恭肅賜祭四壇命有  
司治葬事給驛舟歸其喪大臣之卹典於是乎備然  
而衆莫不曰宜某年某月某日國南葬公澄源鄉西  
亢之原先事請予銘墓予故與苑洛韓公西陂劉公  
以侍郎樂為公畫者也故既為詩三章哭公又叙其  
事而為之銘曰

維古大臣社稷是謀厥後為身與時湛浮公昔始  
官擇衆所棄直聲凜然聞者震悸再仆而興以歷  
畏途衆所逡巡獨奮以趨國有公議吾秉吾植國

有奸良吾黜吾陟始冬迄春早夜孜孜吾志必酬  
吾死徇之身之弗圖矧其細者歸視于家蕭然貧  
也笄笄叅軍貸錢市棺公身則儉公心孔安榮哀  
始終 天子有詔我銘著之來者是告

太子少保吏部尚書恭肅周公墓表

嚴嵩

太子少保吏部尚書周公以嘉靖丁未正月二十九  
日卒于位 皇帝既加贈太子太保議謚恭肅賜之  
祭命以其喪乘傳舟濟而歸已又遣有司治其葬地  
於是嗣子國南乃請予表其隧公之為南司寇也蓋  
致其政且數年矣其復起而為司空治河于濟俄兼  
右都御史而督漕于淮當是時 聖天子將大計朝  
吏之治而汰其不肖者而都察院吏部實柄其事於  
是召為左都御史掌院其明年合凡京朝官聽察其  
賢否去留之而公則欽承 聖天子明命詳為廉覈

留其賢者而降黜其不肖者天下翕然謂至公至明而吏治一清又明年進冢宰掌銓而大計天下之吏亦然然為宰纔兩閱月以疾告遂至不祿天下惜焉公世吳江人諱用字行之初舉進士授行人以材掄為南京兵科給事中丁外艱服闋改禮科遷廣東叅議浙江按察副使丁內艱服闋改山東臨清兵備尋遷福建按察使河南右布政使拜都察院右副都御史提督軍務南贛居二年召管院事未幾陞吏部右侍郎轉左以註誤調南京刑部右侍郎明年轉南京都察院右都御史管院事陞南京刑部尚書會廟災自陳致仕乃復起而至正位冢鄉前後歷官蓋四十餘年所涖有茂功馨名其詳具狀誌余不論論其大者正德間天下所疾苦莫如逆豎妖僧然時方用事氣勢薰灼人莫之敢嬰公獨抗疏諫迎西番法王及劾中貴人擅政不法乞貶竄以謝天下處嶺以南最久蓋人人有父母之愛番禺盜作亂親履行間督兵剿之級幾千號有大蹟然盡縱其所獲配類之可疑者而不肯妄戮一人以彌千級之數又見其察坐未有首功當免輒以已所斬級投而掩之以故公蹟不見旌於朝而物論則歸之臨清多盜公諭使相

首免罪而盜以戢又抑鎮守中貴人橫征傳給民賴其便洛中大饑公為方伯清戎責不在已然急民之窮不忍安坐以視則為躬循問閭設方畧賑而活之盜萃汀贛之間為患積歲公至不急捕告其屬各務澄其源既緩稅蠲逋而德化四流於是盜黨自悔欲來乞生公因召令自翦其強不悛者而盜悉平民之得所與否大抵係守令歲遣臺臣出按苟不舛於揚激則守令得而民安矣公掌臺獨切切以誠臺臣故事太宰典銓少宰禁不與謂大體當爾公獨脫去常格忘已以相質蘄必當乃止故其所藻鑑無不合於輿論公素鮮嗜欲官藩臬時即獨居不以家隨是以既老益強凡享年七十有二曾大父景芳大父瑄父昂皆不仕而大父父則以公貴贈資政大夫右都御史二妣皆贈夫人配施氏封孺人加贈夫人子四人國南右府都事兆南太學生式南乾南縣學生孫男八人孫女二人公有至性少時父母疾嘗剗股進愈之而絕不以言及後居二喪哀毀逾禮終三載不御酒肉端慤自持不苟笑言自律甚廉自奉甚約誠可稱篤行醇德君子矣予昔在吏侍於公為寮寀雅相愛以道義交也隧上之文雖微國南之請予猶將為



以西僧言遣貴璫往烏思藏迎佛廷臣莫敢諫公抗  
疏劾其不經江西鎮守內臣不法公劾罷之人皆稱  
快陞廣東布政司左叅議後山盜起撫臣檄諸道兵  
夾勦公監哨龍川擒斬九百餘級嶺南勦賊例首功  
千以上者陞俸一級公不妄殺又以餘功議同事者  
故不滿千受賞而已嘉靖更化陞浙江按察司副使  
以內艱去服除補山東按察司副使兵備臨清臨清  
地當衝要而不逞之徒時復竊發公鎮之以靜地方  
以寧尋陞福建按察使削鎮守市舶內臣妄費決獄  
稱平轉河南布政司右布政使中州久旱民相食公  
至雨輒隨至又力任賑濟之責民乃大蘇上知公  
賢召為都察院右副都御史提督南贛汀漳軍務公  
令于衆曰民之為盜上失其政故也乃汰贓吏緩征  
科撫流移踰年盜亦屏息召公入理院事轉吏部右  
侍郎未幾轉左侍郎以註誤左遷南京刑部右侍郎  
尋陞南京都察院右都御史轉南京工部尚書慈  
聖太后擇宮附葬顯陵道經江淮公為治艦綜理  
周密太慰上心改南京刑部尚書九廟災兩京  
大臣皆自陳公得致仕家居者甫二載以言官薦復  
起為工部尚書督理河道尋改督漕運召入為左都

御史總憲內臺值考察京官公廉察精當所汰去者  
允愜輿論公以二品歷俸九載考滿進太子少保  
賜寶鬮羊酒吏部尚書唐公罷有 詔遴選廷臣才  
望堪任者僉擬公第三 上注意公遂以公為吏部  
尚書前此吏部進退人才皆文選即執簿與尚書密  
議左右侍郎通不與聞公獨破格虛心咨問而左右  
侍郎亦竭誠相告故所用皆得人是冬公忽遭疾適  
天下諸司入 覲公感 上知遇乃力疾甄別賢否  
疾乃轉劇甫竣事遂不起時嘉靖丁未正月十九日  
也訃聞 上震悼贈太子太保諭祭者四給傳歸其

喪命有司治葬如制公姓孝友純篤為詩文典則而  
有葩藻書法俊逸尤善繪事與人交無疾言遽色尤  
不喜表暴督兵龍門時各哨爭先報捷公獨後或問  
之則曰吾寧無功不可妄殺也部使者不甚知公公  
亦不求知惟總督上虞張公薦公自代人始驚訝既  
而公敷歷中外樹有偉蹟人始信張公知人公長髯  
早白初至山東有餽染藥者公笑曰吾昨已見撫按  
諸公今忽變白為黑得無異乎其從容樂易類若此  
然其中則有毅然不可撓者在東廣時常習射一都  
閩善射與公甚洽及同事軍中都閩恣行科罰公勸

之弗悛竟叅劾置之法在南贛一兵憲剛愎不受節制遂劾罷之弗少假借至於處家待母弟明農君甚厚家嗣南京中府經歷國南為施夫人出施早世遂弗娶餘子太學生兆南縣學生式南乾南俱側出恂恂無間言刑于之化尤吳中所難者所著詩文奏議若干卷

論曰在昔公叅藩廣東時余適為按察僉事每見公之言動氣象溫然如玉即其議論規模宏闊而條緒分明嘗私竊嘆曰此有道之士也然猶以為生質之美既而以公務同至海上偶過公舟公方危坐觀書几上惟置薛文清公讀書錄一冊字字皆圈點謂余曰此皆吾對病之藥也於是始知公之所學蓋有所本而非苟焉者嗟夫今之以學為政者鮮矣而所謂學不過務博覽逞詞華而已間有從事於身心者率皆徒為口說而未嘗實用其力如公者不立門戶而踐履功夫無間隱顯豈非豪傑之士也哉余素受公知故知公益詳乃以誌碑所未載者表而出之



聞莊簡公傳

汪道昆

聞莊簡公名淵字靜中鄞人也其先徙居石馬塘者  
五世公始生別號石塘公生而莊不疾趨不苟笑即  
邵兒以狎侮至正容受之生八年夢一老父據石上  
持公踵相公曰爾文王子孫也幸勿忘十有三年而  
孤哀毀如禮世父遣公受博士易補弟子員太宰屠  
襄惠公居里中部使者為之樹表襄惠昔夢一偉丈  
夫立表下自釋衰絰授之旦日遇公與夢合弘治甲  
子公舉於鄉時年二十五山陰人蕭鳴鳳為舉首語  
公曰文王既沒周以甲子興疇昔之夢徵矣明年舉

進士授禮部主客司主事正德初劉瑾亂政裁主事員改公刑部廣東司公孳孳治法家言文無害尚書鄔陵劉公在部大奇之會部中失囚公與同舍郎當坐時襄惠起為中執法獨急公陰使人召公曰君來吾力猶能為君地不然彼且齟齬君矣公謝曰罪在臣何敢抵鄉大夫撓天子法即無罪彼其如我何卒不往同舍郎蒲伏謁瑾公委蛇自如瑾曰聞郎貌似夫子遇辱不驚固賢者卒謝罷公於是朝士聞之皆稱聞夫子及瑾逆節著對簿大廷瑾睚眦廷中詞不服公操筆具獄數瑾曰瑾偽造符璽私蓄甲兵人臣無將當大逆瑾語塞遂伏誅宗室真鑄反詔繫真鑄以下六百人公論罪輕重有差無不厭服大學士丹徒楊公居太宰改公吏部員外郎遞轉考功郎中丁丑當上計時朱寧用事諸所關說無不從貪吏孫某張某賂寧幸得漏網太宰姑蘇陸公計未決乃私語公二豪得寧寧能得上即議斥上不從柰何公對曰三載黜陟官守之謂何即弗從守官可也乃竟議斥有詔從中留之公益以譎譎聞矣會禮部校士公與馬舉馬汝驥等二十餘人多良士尋轉選部益有聲會譎成諸爭臣公為部尚書具疏救之不聽明

年進南京通政司右通政居三年進應天府府尹故  
事中官守備南京者往往受民詞檄下府幕幕吏奉  
行唯謹朔望必往謁藉公事未辦者受程期公至語  
中官曰中貴人安得受詞幕吏安得為中貴人議獄  
非制也有詔則可悉罷之嘉靖初永嘉張公安仁桂  
公茲以南南部郎議大禮衆持論不合公獨然之張私  
謁公幸得借公名列疏首公謝不可終不欲勦說以  
結主知及張桂召入京師詣應天請舟往公正色曰  
君命召不俟駕安得舟游張桂自此嗾公矣尋改順  
天府府尹勲貴諸豪舉皆歛手千里稱平進太常寺

卿詔求直言上脩省五事 上納之 上齋宿南郊  
群校有囂者 上問左右謬曰大官庖人 上命太  
常察囂者以聞衆大恐必坐一二人以應命公入奏  
曰百執事咸在昏夜莫之誰何請寬之 上乃罷有  
頃進南京兵部右侍郎詔求直言復上脩省五事公  
視部事薦武臣馬永等十餘曹其後皆有塞外功稱  
名將及張公執政桂公任吏部尚書會刑部缺右侍  
郎張公舉所知者桂公不悅曰此吏部事執政安得  
侵官及桂公舉所知張公不可必吾與若皆不便者  
乃以公補刑部右侍郎公既入朝兩公且有德色面

與公約退朝則飯公家既兩公來公卒未嘗治具兩  
公相目笑而去乃飯于其隣公進左侍郎歷三品者  
九載始進南京刑部尚書南京訟故煩晨持牒者數  
十百人聚廷下公語諸郎曰守備中官受告密侵刑  
部權釋此不問顧獨下行有司事日治城旦書何為  
乎自今民間大事必詣通政司達刑部其餘一切付  
司城公視爰書甚或中夜不寢諸子以為請公歎曰  
此疑獄也少羊文吏深入之吾將為之求生忽不自  
知其罷耳公始以尚書就道張公囑曰僕往在南京  
刑部嘗題詩郎舍中公至願為我勒石樹公後堂公  
不答其後僚屬遞至皆為張公致丁寧公徐徐曰此  
部尚書堂也紀法在焉淵待罪尚書安敢以相君今  
日故為郎官勒石卒不許張益以此嘆公九廟災公  
有事闕下乃從諸大臣自陳不職擬旨則以致仕免  
公上曰朕方欲用淵淵非老非疾柰何輒令致仕  
卒留之其後改南京吏部尚書己亥當考察公務去  
泰甚無繁苛人言某子甲多流言公留者何也公曰  
某子甲操下急群下起而中之假令其說行善者懼  
矣其後某子甲卒以清白顯衆以公為名言尋改刑  
部尚書從上意也刑部諸郎曹解事率以優游相

高公至則以藉授司門藉記諸郎入舍先後於是諸郎皆折節勤事公以躬行先之日論報上十餘竟無留獄若楚世子代庶人皆以弒逆抵罪悉決於公歷二品者九年僅加太子少保以不阿忤袁州相國尋復削之丁未公拜吏部尚書竊嘆曰使臣得先十年庶幾猶可自效乃今事權去矣臣何能為上書力辭不許尋上便宜七事務正已以表庶官嘗問諸郎曰先朝太宰孰優對曰無如蹇忠定王忠肅公曰固也耿文恪方可否事少宰從左右贊一辭文恪宣言曰天子建天官一人耳安得二天官邪宰正百官文恪近之美諸郎退相語也公無讓三君子云司務某率其鄉人謁諸郎公聞其狀跪司務堂下讓之曰爾從事天官顧不能杜門謝請謁乃為他人持羔鴈布諸門惡用此於是諸郎惴惴皆為司務謝罪乃罷司務令得自新御史艾朴論文選司郎中張舜臣公力爭曰郎中無罪罪在尚書必欲罷郎中願免尚書以謝御史上以公辭直議格不行信州相國釋憾於鄉人連坐考功司郎中雷禮詔已下公不能持喟然歎曰世顧求多於善人吾未知所稅駕矣輒欲辭去會溫旨累下不忍言當是時袁州信州相搆上遣中使

就問公署意在公公故為刑部侍郎業已廷推入閣  
其後推者凡八九公悉與焉及國秉歸袁州事遂寢  
若郊天祈穀視牲攝祭諸大禮 上亟遣公公愈益  
謙謙端居守已而已歷尚書十二年考始加太子太  
保授榮祿大夫司封進曰故尚書始進一品輒得為  
曾大父母請封公業已踰十二年其以例請公謝曰  
息自工出非臣下所敢干淵未有尺寸功柰何干數  
世之澤時袁州胄子干國政睥睨公卿獨父事公執  
子弟禮然心固憚公公亦不樂久居位已酉上疏曰  
臣入官四十五載受國恩最深 陛下不以臣為不

才置百官長臣未能以秋毫報塞狗馬心終不能忘  
明年當察計吏諸年老者吏部悉以致仕請罷之臣  
幸得受杖國中固引年之期也臣復強顏在事其何  
辭於庶官願乞骸骨 上高其義許之諸子聞公歸

逆公津口公既濟語諸子曰吾自弱至老往往為數  
千里游備嘗險阻艱難不可勝述今既濟吾知免矣  
小子戒之公蚤貴且歷美官其節儉出于天性即退  
食尚書署十年著一敝冠位置有常不失尺寸朝食  
及日中無加豆夕則飲水一杯家食十餘年不問諸  
子生業癸亥公以天年終有司以聞 先帝輟朝三

日乃贈少保謚莊簡祭塋錄蔭部議悉從優制曰可  
汪道昆曰余始通藉則庭謁莊簡公其為人閎廓深  
沉若涉北海不可為量當其持重不發不啻注一矢  
而引千鈞發則百步之外無留行莫不中命余從諸  
公卿後豈不多賢要以填始令終名實純粹唯莊簡  
公一人耳昔仲尼之徒雍可南面漢武得人為盛黯  
獨稱社稷臣雍也以簡黯也以莊公兼之矣知臣莫  
若主其信然哉其信然哉

